

॥ श्री ॥

भगवती आराधना

आ. शिवार्य · प्राकृत · २१३९ पद्य · ~३२१ मिनट

सिद्धे जयप्पसिद्धे चउव्विहाराहणाफलं पत्ते ।
वंदिता अरिहंते वोच्छं आराहणा कमसो॥ 1॥

उज्जोवणमुज्जवणं, णिव्वहणं साहणं च णित्थरणं ।
दंसणणाणचरित्तं - तवाणमाराहणा भणिदा॥ 2॥

दुविहा पुण जिणवयणे, भणिदा आराहणा समासेण ।
सम्मत्तम्मि य पढमा, विदिया य हवे चरित्तम्मि॥ 3॥

दंसणमाराहंतेण णाणमारयहिदं हवे णियमा ।
णाणं आराहंतेण दंसणं होदि भयणिज्जं॥ 4॥

सुद्धणया पुण णाणं, मिच्छादिठिस्स वेति अण्णाणं ।
तम्हा मिच्छादिट्ठी, णाणस्साराहओ णेव॥ 5॥

संजमाराहंतेण तवो आराहिओ हवे णियमा ।
आराहंतेण तवं चारित्तं होदि भयणिज्जं॥ 6॥

सम्मादिठिस्स वि अविरदस्स ण तवो महागुणो होदी ।
होदि हु हत्थिण्हाणं चं दुच्चुदकम्म तं तस्स॥ 7॥

अहवा चारित्ताराहणाए आराहिदं हवदि सव्वं ।
आराहणाए सेसस्स चारित्ताराहणा भज्जा॥8॥

कादव्वमिणमकादव्वं इत्ति णादूण होदि परिहारो ।
तं चेव हवदि णाणं तं चेव य होदि सम्मत्तं॥9॥

चरणम्मि तम्मि जो उज्जमो य आउंजणा य जो होदि ।
सो चेव जिणेहिं तवो भणिदो असढं चरंतस्स॥10॥

णाणस्स दंसणस्स य, सारो चरणं हवे जहाखादं ।
चरणस्स तस्स सारो, णिव्वाणमणुत्तरं भणिदं॥11॥

चक्खुस्स दंसणस्स य, सारो सप्पादिदोस-परिहरणं ।
चक्खू होदि णिरत्थं, दट्ठूण बिले पडंतस्स॥12॥

णिव्वाणस्स य सारो, अव्वाबाहं सुहं अणोवमियं ।
कादव्वा हु तदट्ठं, आदहिद-गवेसिणा चेट्ठा॥13॥

जम्हा चरित्तसारो, भणिदा आराहणा पवयणम्मि ।
सव्वस्स पवयणस्स य, सारो आराहणा तम्हा॥14॥

सुचिरमवि णिरदिचारं, विहरित्ता णाणदंसणचरित्ते ।
मरणे विराधयित्ता, अणंतसंसारिओ दिट्ठो॥15॥

समिदीसु य गुत्तीसु य, दंसणणाणे य णिरदिचाराणं ।
आसादणबहुलाणं, उक्कस्सं अंतरं होदी॥16॥

दिट्ठा अणादिमिच्छादिट्ठी जम्हा खणेण सिद्धा य ।

आराहगा चरित्तस्स तेण आराहणा सारो॥17॥

जदि पवयणस्स सारो मरणे आराहणा हवदि दिट्ठा ।

किंदाइं सेसकालं जदिददि तवे चरित्ते य॥18॥

आराहणाए कज्जे परियम्मं सव्वदा हि कादव्वं ।

परियम्म-भाविदस्स हु सुह-सज्झाराहणा होदी॥19॥

जह रायकुलपसूदो जोग्गं णिच्चमवि कुणदि परियम्मं ।

तो जिदकरणो जुद्धे कम्मसमत्थो भविस्सदि हि॥20॥

इय सामण्णंसाहूवि कुणदि णच्चमवि जोग्गपरियम्मं ।

तो जिदकरणो मरणे झाणसमत्थो भविस्संति॥21॥

जोग्गो भाविदकरणो सत्तू जेदूण जुद्धरंगम्मि ।

जह सो कुमारमल्लो रज्जपडागं बला हरदि॥22॥

तह भाविदसामण्णोमिच्छत्तादी रिवू विजेदूण ।

आराहणापडागं हरदि सुसंथार - रंगम्मि॥23॥

पुव्वमभाविदजोग्गो आराधेज्ज मरणे जदि वि कोई ।

खण्णूगदिट्ठंतो सो तं खु पमाणं ण सव्वत्थ॥24॥

मरणाणि सत्तरस देसिदाणि तित्थंकरेहि जिणवयणे ।

तत्थ वि य पंच इह संगहेण मरणाणि वोच्छामि॥25॥

पंडिदपंडिदमरणं पंडिदयं बालपंडिदं चेव ।

बालमरणं चउत्थं पंचमयं बालबालं च॥26॥

पंडिदपंडिद मरणं च पंडिदं बालपंडिदं चेव ।

एदाणि तिण्णि मरणाणि जिणा णिच्चं य पसंसति॥27॥

पंडिदपंडिद मरणे खीणकसाया मरंति केवलिणो ।

विरदाविरदा जीवा मरंति तदियेण मरणेण॥28॥

पायोपगमणमरणं भत्तपइण्णा य इंगिणी चेव ।

तिविहं पंडिदमरणं साहुस्स जहुत्तचारिस्स॥29॥

अविरदसम्मादिट्ठी मरंति बालमरणे चउत्थम्मि ।

मिच्छादिट्ठी य पुणो पंचमए बालबालम्मि॥30॥

तत्थोवसमियसम्मत्तं खइयं खओवसमियं वा ।

आराहंतस्स हवे सम्मताराहणा पढमा॥31॥

सम्मादिट्ठी जीवो उवइट्ठं पवयणं तु सद्वहदि ।

सद्वहदि असम्भावं अजाणमाणो गुरुणियोगा॥32॥

सुत्तादो तं सम्मं दरिसिज्जंतं जदा ण सद्वहदि ।

सो चेव हवदि मिच्छादिट्ठी जीवो तदो पहुदि॥33॥

सुत्तं गणहरकहिदं तहेव पत्तेयबुद्धिकहिदं च ।

सुदकेवलिणा कहिदं अभिण्णदसपुव्वि-कहिदं च॥34॥

गिहिदत्थो संविग्गो अत्थुवदेसे ण संकणिज्जो हु ।
सो चेव मंदधम्मो अत्थुवदेसम्मि भयणिज्जो॥35॥

धम्माधम्मागासाणि पोग्गला कालदव्व जीवे य ।
आणाए सदहंतो सम्मत्ताराहओ भणिदो॥36॥

संसारसमावण्णा य छव्विहा सिद्धिमस्सिदा जीवा ।
जीवणिकाया एदे सदहदव्वा हु आणाए॥37॥

आसवसंवरणिज्जरबंधो मोक्खो य पुण्णपावं च ।
तह एव जिणाणाए सदहदव्वा अपरिसेसा॥38॥

पदमक्खरं च एक्कं पि जो ण रोचेदि सुत्तणिद्धिं ।
सेसं रोचंतो वि हु मिच्छादिट्ठी मुणेदव्वो॥39॥

मोहोदएण जीवो उवदिट्ठं पवयणं ण सदहदि ।
सदहदि असभावं उवदिट्ठं अणुवदिट्ठं वा॥40॥

मिच्छत्तं वेदंतो जीवो विवरीयदंसणो होदी ।
ण य धम्मं रोचेदि हु महुरं खु रसं जहा जरिदो॥41॥

सुविहयमिमं पवयणं असदहंतेणिमेण जीवेण ।
बालमरणाणि तीदे मदाणि काले अणंताणि॥42॥

णिगंथं पव्वयणं इणमेव अणुत्तरं सुपरिसुद्धं ।
इणमेव मोक्खमग्गोत्ति भदी कायव्विया तम्हा॥43॥

सम्मत्तादीचारा संका कंखा तहेव विदिगिंछा ।

परदिट्ठीण पसंसा अणायदणसेवणा चेव॥44॥

उवगूहणठिदिकरणं वच्छल्लपभावणा गुणा भणिदा ।

सम्मत्तविसोधीए उवगूहणकारया चउरो॥45॥

अरहंतसिद्धचेदिय सुदे य धम्मे य साधुवग्गे य ।

आयरिय-उवज्झाए सुपवयणे दंसणे चावि॥46॥

भत्ती पूया वण्णजणणं च णासणमवण्णवादस्स ।

आसादणपरिहारो दंसणविणओ समासेण॥47॥

सद्दहया पत्तियया रोचय फासंतया पवयणस्स ।

सयलस्स जे णरा ते सम्मताराहया होंति॥48॥

एवं दंसणमाराहतो मरणे असंजदो जदि वि कोवि ।

सुविसुद्धतिव्वलेस्सो परित्तसंसारिओ होदी॥49॥

तिविहा सम्मताराहणा य उक्कस्समज्झिमजहण्णा ।

उक्कस्साए सिज्झादि उक्कस्स-ससुक्कलेस्साए॥50॥

सेसा य हुंति भवसत्त मज्झिमाए य सुक्कलेस्साए ।

संखेज्जाऽसंखेज्जा वा सेसा भव जहण्णाए॥51॥

उक्कस्सा केवलिणो मज्झमिया सेस-सम्मदिट्ठीणं ।

अविरदसम्मादिट्ठिस्स संकिलिठुस्स हु जहण्णा॥52॥

बेमाणियणरलोये सत्तट्ठभवेसु सुखमणुभूय ।
सम्मत्तमणुसरंता करंति दुक्खक्खयं धीरा॥53॥

जे पुण सम्मत्ताओ पभट्ठा ते पमाददोसेण ।
भामंति दु भव्वा वि हु संसारमहण्णवे भीमे॥54॥

संखेज्जमसंखेज्जगुणं वा संसारमणुसरित्थं ।
दुक्खक्खयं करंते जे सम्मत्तेणणुसरंति॥55॥

लद्धूण य सम्मत्तं मुहुत्तकालमवि जे परिवडंति ।
तेसिमणंताणंता ण भवदि संसारवासद्धा॥56॥

जो पुण मिच्छादिट्ठी दढचरित्तो अदढचरित्तो वा ।
कालं करेज्ज ण हु सो कस्सा हु आराहगो होदि॥57॥

तं मिच्छत्तं जमसद्दहणं तच्चाण होइ अत्थाणं ।
संसइयमभिग्गहियं अणभिग्गहियं च तं तिविहं॥58॥

जे वि अहिंसादिगुणा मरणे मिच्छत्तकडुगिदा होति ।
ते तस्स कडुगदुद्धियगदं व दुद्धं हवे अफला॥59॥

जह भेसजं पि दोसं आवहइ विसेण संजुदं संतं ।
तह मिच्छत्तविसजुदा गुणा वि दोसावहा होति॥60॥

दिवसेण जोयणसयं पि गच्छमाणो सगिच्छिदं देसं ।
अण्णंतो गच्छंतो जह पुरिसो णेव पाउणदि॥61॥

धणिदं पि संजमंतो मिच्छादिट्ठी तहा ण पावेदि ।

इट्ठं णिवुदिमग्ग उग्गेण तवेण जुत्तो वि॥62॥

जस्स पुण मिच्छादिट्ठिस्स णत्थि सीलं वदं गुणो चावि ।

सो मरणे अप्पाणं किह ण कुणदि दीहसंसारं॥63॥

एक्कं पि अक्खरं जो अरोचमाणो मरेज्ज जिणदिट्ठं ।

सो वि कुजोणि-णिवुट्ठो किं पुण सव्वं अरोचंतो॥64॥

संखेज्जासंखेज्जाणंता वा होति बालबालम्मि ।

सेसा भव्वस्स भवा णंताणंता अभव्वस्स॥65॥

पुव्वं ता वण्णेसिं भत्तपइण्णं पसत्थमरणेसु ।

उस्सण्णं सा चेव हु सेसाणं वण्णणा पच्छा॥66॥

दुविहं तु भत्तपच्चक्खाणं सविचारमध अविचारं ।

सविचारमणागाढे मरणे सपरक्कमस्स हवे॥67॥

सविचारभत्तपच्चक्खाणस्सिणमो उवक्कमो होदि ।

तत्थ य सुत्तपदाइं चत्तालं होति णेयाइं॥68॥

अरिहे लिंगे सिक्खा विणयसमाधी य अणियदं विहारे ।
परिणामोवधिजहणा सिदी य तह भावणाओ य॥69॥
हणा दिसा खमणा यअणुसिट्ठिपरगणे चरिया ।
मग्गण सुट्ठिय उवसंपया य पडिछा य पडिलेहा॥70॥
आपुच्छा य पडिच्छणमेगस्सालोचना य गुणदोसा ।
सेज्जा संथारो वि य णिज्जवग पयासणा हाणी॥71॥
पच्चक्खाणं खामणं खमणं अणुसट्ठिसारणाकवचे ।
समदाज्झाणे लेस्सा फलं विजहणा य णेयाइं॥72॥

अहं

वाहिव्व दुप्पसज्झा जरा य समण्णजोग्गहाणिकरी ।
उवसग्गा वा देविय-माणुस-तेरिच्छिया जस्स॥73॥
अणुलोमा वा सत्तू चारित्तविणासगा हवे जस्स ।
दुब्भिकखे वा गाढे अडवीए विप्पणट्ठो वा॥74॥
चक्खुं व दुब्बलं जस्स होज्ज सोदं व दुब्बलं जस्स ।
जंघाबलपरिहीणो जो ण समत्थो विहरिदुं वा॥75॥
अण्णम्मि चावि एदारिसम्मि आगाढकारणे जादे ।
अरिहो भत्तपइण्णाए होदि विरदो अविरदो वा॥76॥
उस्सरदि जस्स चिरमवि सुहेण सामण्णमणदिचारं वा ।
णिज्जावया य सुलहा दुब्भिकखभयं च जदि णत्थ॥77॥
तस्स ण कप्पदि भत्तपइण्णं अणुवट्ठिदे भये पुरदो ।
सो मरणं पच्छिंतो होदि हु सामण्ण-णिव्विण्णो॥78॥

लिंग

उस्सगियलिंगकदस्स लिंगमुस्सगियं तयं चेव ।
अववादियलिंगस्स वि पसत्थमुवसगियं लिंगं॥79॥

जस्स वि अव्वभिचारी दोसो तिट्ठाणिगो विहारम्मि ।
सो वि हु संधारगदो गेण्हेज्जोस्सुगियं लिंगं॥80॥

आवसथे वा अप्पाउग्गे जो वा महद्धिओ हिरिमं ।
मिच्छजणे सजणे वा तस्स होज्ज अववादियं लिंगं॥81॥

अच्चेलक्कं लोचो वोसट्टसरीरदा य पडिलिहणं ।
एसो हु लिंगकप्पो चदुव्विहो होदि उस्सग्गे॥82॥

इत्थी वि य जं लिंगं दिट्ठं उस्सगियं च इदरं वा ।
तं तह होदि हु लिंगं परित्तमुवधिं करेंतीए॥83॥

जत्तासाधणचिह्नकरणं खु जगपच्चयाद-ठिदिकरणं ।
गिहिभावविवेगो वि य लिंगगहणे गुणा होति॥84॥

गंथच्चाओ लाघवमप्पडिलिहणं च गदभयत्तं च ।
संसज्जाणपरिहारो परिकम्मविवज्जाणा चेव॥85॥

विस्सासकरं रूवं अणादरो विसय-देह-सुखेसु ।
सव्वत्थ अप्पवसदा परिसह-अधिवासणा चेव॥86॥

जिणपडिरूवं विरियायारो रागादिदोसपरिहरणं ।
इच्चेवमादिबहुगा अच्चेलक्के गुणा होति॥87॥

इय सव्वसमिदकरणो ठाणासणसयणगमणकिरियासु ।

णिगिणं गुत्तिमुवगदो पग्गहिवददरं परक्कमदि॥88॥

अववादियलिंगकदो विसयासत्तिं अगूहमाणो य ।

णिंदणगरहणजुत्तो सुज्झदि उवधिं परिहरंतो॥89॥

केसा संसज्जंति हु णिप्पडिकारस्स दुपरिहारा य ।

सयणादिसु ते जीवा दिट्ठा आगंतुया य तहा॥90॥

जूगाहिं य लिक्खाहिं य बाधिज्जंतस्स संकिलेसो य ।

सघट्टिज्जंति य ते कंडुयणे तेण सो लोचो॥91॥

लोचकदे मुंडत्तं मुंडत्ते होइ णिव्वियारत्तं ।

तो णिव्वियाकरणो य पग्गहिददरं परक्कमदि॥92॥

अप्पा दमिदो लोएण होइ ण सुहे य संगमुवयादि ।

साधीणदा य णिद्वोसदा य देहे य णिम्ममदा॥93॥

आणक्खिदा य लोचेण अप्पणो होदि धम्मसट्ठा य ।

उग्गो तवो य लोचो तहेव दुक्खस्स सहणं च॥94॥

सिण्हाणभंगुव्वट्टणाणि णहकेसमंसु संठप्पं ।

दंतोठ्ठकण्णमुहणासियच्छिभमुहाइं संठप्पं॥95॥

वज्जेदि बंभचारी गंधं मल्लं च धूववासं वा ।

संवाहणपरिमद्दणपिणिद्धणादीणि य विमुत्ती॥96॥

जल्लविलित्तो देहो लुक्खो लोयकदवियडबीभत्थो ।

जो रूढणक्खलोमो सा गुत्ती बंभचेरस्स॥97॥

इरियादाणणिखेवे विवेगठाणे णिसीयणे सयणे ।

उव्वत्तणपरिवत्तण पसारणउं टणामरसे॥98॥

पडिलेहणेण पडिलेहिज्जइ चिह्मं च होइ सगपक्खे ।

विस्सासियं च लिंगं संजय पडिरूवदा चेव॥99॥

रयसेयाणमगहणं मद्दव सुकुमालदा लघुत्तं च ।

जत्थेदे पंच गुणा तं पडिलिहणं पसंसंति॥100॥

शिक्षा

णिउणं विउलं सुद्धं णिकाचिदमणुत्तरं च सव्वहिदं ।

जिणवयणं कलुसहरं अहो य रत्ती य पढिदव्वं॥101॥

आदहिदपइण्णा भावसंवरो णवणवो य संवेगो ।

णिककंपदा तवो भावणा य परदेसिगत्तं च॥102॥

णाणेण सव्वभावा जीवाजीवासवादिया तहिया ।

णज्जदि इहपरलोए अहिदं च तहा हियं चेव॥103॥

आदहिदमयाणंतो मुज्झदि मूढो समादियदि कम्मं ।

कम्मणिमित्तं जीवो परीदि भवसायरमणंतं॥104॥

जाणंतस्सादहिदं अहिदणियत्ती हिदपवत्ती य ।

होदि य तो से तम्हा आदहिदं आगमेदव्वं॥105॥

सज्झायं कुव्वंतो पंचेदियसंवुडो तिगुत्तो य ।
हवदि य एयग्गमणो विणयेण समाहिदो भिक्खू॥106॥

जह जह सुदमोग्गाहदि अदिसयरसपसरमसुदपुव्वं तु ।
तह तह पल्हादिज्जदि णवणवसंवेगसङ्गाए॥107॥

आयापायविदण्हू दंसणणाणतबसंजमे ठिच्चा ।
विहरदि विसुज्झमाणो जावज्जीवं च णिक्कंपो॥108॥

बारसविहम्मि य तवे सभंतरवाहिरे कुसलदिठ्ठे ।
ण वि अत्थि ण वि य होहिदि सज्झायसमं तवो कम्मं ॥109॥

जं अण्णाणी कम्मं खवेदि भवसयसहस्सकोडीहिं ।
तं णाणी तिहिं गुत्तो खवेदि अंतोमुहुत्तेण॥110॥

छट्ठमदसमदुबालसेहिं अण्णाणियस्स जा सोही ।
तत्तो बहुगुणदरिया होज्ज हु जिमिदस्स णाणिस्स ॥111॥

सज्झायभावणाए य भाविदा होंति सव्वगुत्तीओ ।
गुत्तीहिं भाविदाहिं य मरणे आराधओ होदि ॥112॥

आदपरसमुद्धारो आणा वच्छल्लदीवणा भत्ती ।
होदि परदेसगत्ते अव्वोच्छिन्ती य तित्थस्स॥113॥

विनय

विणओ पुणओ पंचविहो णिद्धिठ्ठो णाणदंसणचरित्ते ।
तवविणवो य चउत्थो चरिमो उवयारिओ विणओ ॥114॥

काले विणये उवधाणे बहुमाणे तहे व णिण्हवणे ।
वंजण अत्थ तदुभये विणओ णाणम्मि अट्ठविहो ॥115॥

उवगूहणमादिया पुव्वुत्ता तह भत्तियादिया य गुणा ।
संकादिवज्जणं पि य णेओ सम्मत्तविणओ सो ॥116॥

इंदियकसायपणिधाणं पि य गुत्तीओ चेव समिदीओ ।
एसो चरित्तविणओ समासदो होइ णायव्वो ॥117॥

पणिधाणं पि य दुविहं इंदिय णोइंदियं च वोधव्वं ।
सद्दादि इंदियं पुण कोधाईयं भवे इदरं ॥118॥

सद्दरसरूवगंधे फासे य मणोहरे य इदरे य ।
जं रागदोसगमणं पंचविहं होदि पणिधाणं ॥119॥

णोइंदियपणिधाणं कोधो माणो तहेव माया य ।
लोभो य णोकसाया मणपणिधाण तु तं वज्जे ॥120॥

उत्तरगुणउज्जमणे सम्मं अधिआसणं च सट्ठाय ।
आवासयाणमुचिदाण अपरिहाणी अणुस्सेओ ॥121॥

भत्ती तवोधिगंमि य तवम्मि य अहीलणा य सेसाणं ।
एसो तवम्मि विणओ जहुत्तचारिस्स साहुस्स ॥122॥

काइयवाइयमाणसिओत्ति तिविधोहु पंचमो विणओ ।
सो पुण सव्वो दुविहो पच्चक्खो चेव पारोक्खो ॥123॥

अभुट्टाणं किदियम्मं णवणं अंजली य मुंडाणं ।
पच्चुग्गच्छणमेते पच्छिदस्स अणुसाधणं चेव॥124॥

णीचं ठाणं णीचं गमणं णीचं च आसणं सयणं ।
आसणदाणं उवकरणदाणमोगासदाणं च॥125॥

पडिरूवकायसंफासणदा पडिरूवकालकिरिया य ।
पेसणकरणं संथारकरणमुवकरणपडिलिहणं॥126॥

इच्चेवमादिविणओ जो उवयारो कीरदे सरीरेण ।
एसो काइयविणओ जहारिहो साहुवग्गम्मि॥127॥

पूयावयणं हिदभासणं च मिदभासणं महुरं च ।
सुत्ताणुवीचिवयणं अणिट्ठुरमकक्कसं वयणं॥128॥

उवतसंतवयणमगहित्थवयणमकिरियमहीलणं वयणं ।
एसो वाइयविणओ जहारिहो होदि कादव्वो॥129॥

पापविसोत्तिय परिणामवज्जणं पियहिदे य परिणामे ।
णायव्वो संखेवेण एसो माणस्सिओ विणओ॥130॥

इय एसो पच्चक्खो विणओ पारोक्खिओ वि जं गुरुणो ।
विरहम्मि विविट्ठिज्जइ आणाणिद्देसचरियाए॥131॥

राइणिय अराइणीएसु अज्जासु चेव गिहिवग्गे ।
विणओ जहारिहो सो कायव्वो अप्पमत्तेण॥132॥

विणयेण विप्पहूणस्स हवदि सिक्खा णिरत्थिया सव्वा ।
विणओ सिक्खाए फलं विणयफलं सव्वकल्लाणं॥133॥

विणओ मोक्खोद्धारं विणयादो संजमो तवो णाणं ।
विणयेणाराहिज्जइ आयरिओ सव्वसंघो य॥134॥

आयारजीदकप्पगुणदीवणा अत्तसोधि णिज्झंझा ।
अज्जव मद्दव लाघव भत्ती पल्हादकरणं च॥135॥

कित्ती मित्ती माणस्स भंजणं गुरुजणे य बहुमाणे ।
तित्थयराणं आणा गुणाणुमोदो य विणयगुणा॥136॥

समाधि

चित्तं समाहिदं जस्स होज्ज वज्जिदविसोत्तियं वसियं ।
सो वहदि णिरदिचारं सामण्णधुरं अपरिसंतो॥137॥

चालणिगयं व उदयं सामण्णं गलइ अणिहुदमणस्स ।
कायेण य वायाए जदवि जधुत्तं चरदि भिक्खू॥138॥

वादुभ्रामो व मणो परिधावइ अट्ठिदं तह समंता ।
सिग्घं च जाइ दूरं पि मणो परमाणुदव्वं वा॥139॥

अंधलयबहिरमूगोव्व मणो लहुमेव विप्पणासेइ ।
दुक्खो य पडिणियत्ते दुं जो गिरिसरिदसोदं वा॥140॥

तत्तो दुक्खे पंथे पाडेदुं दुद्धओ जहा अस्सो ।
वीलणमच्छोव्व मणो णिग्घेत्तुं दुक्करो धणिदं॥141॥

जस्स य कदेण जीवा संसारमणंतयं परिभमंति ।
भीमासुहगदिबहुलं दुक्खसहस्साणि पावंता॥142॥

जम्हि य वारिदमेत्ते सव्वे संसारकारया दोसा ।
णासंति रागदोसादिया हु सज्जो मणुस्सस्स॥143॥

इय दुट्ठयं मणं जो वारेदि पडिठुवेदि य अकंपं ।
सुहसंकप्पपयारं च कुणदि सज्झायसण्णिहिदं॥144॥

जो वियविणिप्पडंतं मणं णियत्तेदि सह विचारेण ।
णिग्गहदि य मणं जो करेदि अदिलज्जियं च मणं॥145॥

दासं व मणं अवसंसवसं जो कुणदि तस्स सामण्णं ।
होदि समाहिदमविसोत्तियं च जिणसासणाणुगदं॥146॥

अनियतविहार

दंसणसोधी ठिदिकरणभावणा अदिसयत्तकुसलत्तं ।
खेत्तपरिमग्गणावि य अणियदवासे गुणा होति॥147॥

जम्मण-अभिणिक्खवणंणाणुप्पत्ती य तित्थणिसिहीओ ।
पासंतस्स जिणाणं सुविसुद्धं दंसणं होदि ॥148॥

संविग्गं संविग्गाणं जणयदि सुविहिदो सुविहिदाणं ।
जुत्तो आउत्ताणं विसुद्धलेस्सो सुलेस्साणं॥149॥

पियधम्मवज्जभीरु सुत्तत्थविसारदो असढभावो ।
संवेग्गाविदि य परं साधू णियदं विहरमाणो॥150॥

संविग्गदरे पासिय पियधम्मदरे अवज्जभीरुदरे ।
संयमवि पियथिरधम्मो साधू विहरंतओ होदि॥151॥

चरिया छुहा य तण्हा सीदं उण्हं च भाविदं होदि ।
सेज्जा वि अपडिबद्धा य विहरणेणाधिआसिया होदि॥152॥

णाणादेसे कुसलो णाणादेसे गदाण सत्थाणं ।
अभिलाव अत्थकुसलो होदि य देसप्पवेसेण॥153॥

सुत्तत्थथिरीकरणं अदिसयिदत्थाण होदि उवलद्धी ।
आयरियदंसणेण दु तह्मा सेवेज्ज आयरियं॥154॥

णिक्खवणपवेसादिसु आयरियाणं बहुप्पयाराणं ।
सामाचारीकुसलो य होदि गणसंपवेसेण॥155॥

कंठगदेहिं वि पाणेहिं साहूणा आगमो हु कादव्वो ।
सुत्तस्स य अत्थस्स य सामाचारी जध तहेव॥156॥

संजदजणस्स य जहिं फासुविहारो य सुलभवुत्ती य ।
तं खेत्तं विहरंतो णाहिदि सल्लेहणाजोग्गं॥157॥

वसधीसु य उवधीसु य गामे णयरे गणे य सण्णिजणे ।
सव्वत्थ अपडिबद्धो समासदो अणियदविहारो॥158॥

परिणाम

अणुपालिदो य दीहो परियाओ वायणा य मे दिण्णा ।
णिप्पादिदा य सिस्सा सेयं खलु अप्पणो कादुं॥159॥

किण्णु अधालंदविधी भत्तपइण्णेगिणी य परिहारो ।
पादोवगमणजिणकप्पियं च विहरामि पडिवण्णो॥160॥

एवं विचारयित्ता सदि माहप्पे य आउगे असदि ।
अणिगूहिदबलविरिओ कुणदि मदिं भत्तवोसरणे॥161॥

पुव्वुत्ताणण्णदरे सल्लेहणकारणे समुप्पण्णे ।
तह चेव करिज्ज मदिं भत्तपइण्णाए णिच्छयदो॥162॥

जाव य सुदी ण णस्सदि जाव य जोगा ण मे पराहीणा ।
जाव य सद्धा जायदि इंदियजोगा अपरिहीणा॥163॥

जाव य खेमसुभिक्षं आयरिया जाव णिज्जवणजोगा ।
अत्थि तिगारवरहिदा णाणचरणदंसणविसुद्धा॥164॥

ताव खमं मे कादुं सरीरणिक्खेवणं विदुपसत्थं ।
समयपडायाहरणं भत्तपइण्णाणियमजण्णं॥165॥

एवं सदिपरिणामो जस्स दढो होदि णिच्छिदमदिस्स ।
तिव्वाए वेदणाए वोच्छिज्जदि जीविदासा से॥166॥

उपधित्याग

संजमसाधणमेत्तं उवधिं मोत्तूण सेसयं उवधिं ।
पजहदि विसुद्धलेस्सो साधू मुत्तिं गवेसंतो॥167॥

अप्पपरियम्म उवधिं बहुपरियम्मं च दोवि वज्जेइ ।
सेज्जा संथारादी उस्सग्गदं गवेसंतो॥168॥

पंचविहं जे सुद्धिं अपाविदूण मरणमुवणमंति ।
पंचविहं च विवेगं ते खु समाधिं ण पावेंति॥169॥

पंचविहं जे सुद्धिं पत्ता णिखिलेण णिच्छिदमदीया ।
पंचविहं च विवेगं ते हु समाधिं परमुवेंति॥170॥

आलोयणाए सेज्जासंथारुवहीण भत्तपाणस्स ।
वेज्जावच्चकराणं य सुद्धी खलु पंचहा होइ॥171॥

अहवा दंसणणाणचरित्तसुद्धी य विणयसुद्धी य ।
आवासयसुद्धी वि य पंच वियप्पा हवदि सुद्धी॥172॥

इंदियकसायउवधीण भत्तपाणस्स चावि देहस्स ।
एस विवेगो भणिदो पंचविधो दव्वभावगदो॥173॥

अहवा सरीरसेज्जा संथारुवहीण भत्तपाणस्स ।
वेज्जावच्चकराण य होइ विवेगो तहा चेव॥174॥

सव्वत्थ दव्वपज्जयममत्तिसंगविजडो पणिहिदप्पा ।
णिप्पणयपेमरागो उवेज्ज सव्वत्थ समभावं॥175॥

श्रिति

जा उवरि उवरि गुणपडिवत्ती सा भावदो सिदी होदि ।
दव्वसिदी णिम्मेणी सोवाण आरुहंतस्स॥176॥

सल्लेहणं करेंतो सव्वं सुहसीलयं पयहिदूण ।
भावसिदिमारुहिता विहरेज्ज सरीरणिव्विणो॥177॥

दव्वसिदिं भावसिदिं अणिओगवियाणया विजाणंता ।

ण खु उट्ठगमणकज्जे हेट्ठिल्लपदं पसंसंति॥178॥

गणिणा सह संलाओ कज्जं पइ सेसएहिं साहूहिं ।

मोणं से मिच्छजणे भज्जं सण्णीसु सजणे य॥179॥

सिदिमारुहित्तु कारणपरिभुत्तं उवधिमणुवधिं सेज्जं ।

परिकम्मादिउवहदं वज्जित्ता विहरदि विदण्हू॥180॥

तो पच्छिमंमि काले वीरपुरिससेवियं परमघोरं ।

भत्तं परिजाणंतो उवेदि अभुज्जदविहारं॥181॥

भावना

इत्तिरियं सव्वमणं विधिणा वित्तिरिय अणुदिसाए दु ।

जहिदूण संकिलेसं भावेइ असंकिलेसेण॥182॥

जावंतु केइ संग्हा उदीरया होति रागदोसाणं ।

ते वज्जित्तो जिणदि हु रागं दोसं च णिस्संगो॥183॥

कंदप्पदेवखिभिस अभिओगा आसुरी य सम्मोहा ।

एदा हु संकिलिट्ठा पंचविहा भावणा भणिदा॥184॥

कंदप्पकुक्कुआइय चलसीला णिच्चहासणकहो य ।

विभावित्तो य परं कंदप्पं भावणं कुणइ॥185॥

णाणस्स केवलीणं धम्मस्साइरिय सव्वसाहूणं ।

माइय अवण्णवादी खिभिसियं भावणं कुणइ॥186॥

मंताभिओगकोदुगभूदीयम्मं पउंजदे जो हु ।
इड्डिरससादहेदुं अभिओगं भावणं कुणइ॥187॥

अणुबंधरोसविग्गहसंसत्ततवो णिमित्तपडिसेवी ।
णिक्किवणिराणुतावी आसुरिअं भावणं कुणदि॥188॥

उम्मग्गदेसणो मग्गदूसणो मग्गविप्पडिवणी च ।
मोहेण य मोहिनो संमोह भावणं कुणइ॥189॥

एदाहिं भावणाहिं य विराधओ देवदुग्गदिं लहइ ।
तत्तो चुदो समाणो भमिहिदि भवसागरमणंतं॥190॥

एदाओ पंच वज्जिय इणमो छट्ठीए विहरदे धीरो ।
पंचसमिदो तिगुत्तो णिस्संगो सव्वसंगेसु॥191॥

तवभावणा य सुदसत्तभावणेगत्तभावणे चेव ।
धिदिबलविभावणाविय असंकिलिड्ढावि पंचविहा॥192॥

तवभावणाए पंचेंदियाणि दंताणि तस्स वसमेति ।
इंदियजोगायरिओ समाधिकरणाणि सो कुणइ॥193॥

इंदियसुहसाउलओ घोरपरीसहपराजियपरस्सो ।
अकदपरियम्म कीवो मुज्झदि आराहणाकाले॥194॥

जोगमकारिज्जंतो अस्सो सुहलालिओ चिरं कालं ।
रणभूमीए वाहिज्जमाणओ जह ण कज्जयरो॥195॥

पुव्वमकारिदजोग्गो समाधिकामो तहा मरणकाले ।
ण भवदि परीसहसहो विसयसुहपरम्महो जीवो ॥196॥
जोग्गमकारिज्जंतो अस्सो दुहभाविदो चिरं कालं ।
रणभूमीए वाहिज्जमाणओ कुणदि जह कज्जं ॥197॥
पुव्वं कारिदजोग्गो समाधिकामो तहा मरणकाले ।
होदि हु परीसहसहो विसयसुहपरम्महो जीवो ॥198॥

सुदभावणाए णाणं दंसण तव संजमं च परिणवइ ।
तो उवओगपइण्णा सुहमच्चविदो समाणेइ ॥199॥
जदणाए जोग्गपरिभाविदस्स जिणवयणमणुगदमणस्स ।
सदिलोवं कादंु जे ण चयंति परीसहा ताहे ॥200॥

जदणाए जोग्गपरिभाविदस्स जिणवयणमणुगदमणस्स ।
सदिलोवं कादंु जे ण चयंति परीसहा ताहे ॥200॥

देवेहिं भेसिदो वि हु कयावराधो व भीमरूवेहिं ।
तो सत्तभावणाए वहइ भरं णिभओ सयलं ॥201॥

खणणुत्तावणवालण - वीयणविच्छेत्तणावरोदत्तं ।
चिंतिय दुहं अदीहं मुज्झदि णो सत्तभाविदो दुक्खे ॥202॥
बालमरणाणि साहू सुचिंतिदूणप्पणो अणंताणि ।
मरणे ससुट्ठिएविहि मुज्झइ णो सत्तभावणाणिरदो ॥203॥

बहुसो वि जुद्ध भावणाए ण भडो हु मुज्झदि रणम्मि ।
तह सत्त भावणाए ण मुज्झदि मुणी वि वोसग्गे ॥204॥

एयत्तभावणाए ण कामभोगे गणे सरीरे वा ।
सज्जइ वेरग्गमणो फासेदि अणुत्तरं धम्मं॥205॥

भयणीए विधम्मिज्जंतीए एयत्तभावणाए जहा ।
जिणकप्पिदो ण मूढो खवओ वि ण मुज्झइ तधेव॥206॥

कसिणा परीसहचमू अभुठुइ जइ वि सोवसग्गावि ।
दुद्धरपहकरवेगा भयजणणी अप्पसत्ताणं॥207॥

धिदिधणिदवद्धकच्छो जोधेइ अणाइलो तमच्चाई ।
धिदिभावणाए सूरु संपुण्णमणोरहो होई॥208॥

एयाए भावणाए चिरकालं हि विहरेज्ज सुद्धाए ।
काऊण अत्तसुद्धिं दंसणाणाणे चरित्ते य॥209॥

सल्लेखना

एवं भावेमाणो भिक्खू सल्लेहणं उवक्कइ ।
णाणविहेण तवसा बज्झेणभंतरेण तहा॥210॥

सल्लेहणा य दुविहा अभंतरिया य बाहिरा चेव ।
अभंतरा कसायेसु बाहिरा होदि हु सरीरे॥211॥

सव्वे रसे पणीदे णिज्जूहिता दु पत्तलुक्खेण ।
अण्णदरेणुवधाणेण सल्लिहइ य अप्पयं कमसो॥212॥

अणसण अवमोरियं चाओ य रसाण वृत्तिपरिसंखा ।
कायकिलेसो सेज्जा य विवित्ता बाहिरतवो सो॥213॥

अद्धाणसणं सव्वाणसणं दुविहं तु अणसणं भणियं ।
विहरंतस्स य अद्धाणसणं इदरं च चरिमंते॥214॥

होइ चउत्थं छठ्ठमाइ छम्मासखवणपरियंतो ।
अद्धाणसणविभागो एसो इच्छाणुपुव्वीए॥215॥

बत्तीसं किर कवला आहारो कुक्खिपूरणो होइ ।
पुरिसस्स महिलियाए अट्ठावीसं हवे कवला॥216॥

एगुत्तरसेढीए जावय कवलो वि होदि परिहीणो ।
ऊमोदरियतवो सो अद्धकवलमेव सिच्छं च॥217॥

चत्तारि महावियडीओ होंति णवणीदमज्जमंसमहू ।
कंखापसंगदप्पाऽसंजमकारीओ एदाओ॥218॥

आणाभिकंखिणावज्जभीरुणा तवसमाधिकामेण ।
तावो जावज्जीवं णिज्जूढाओ पुरा चेव॥219॥

खीरदधिसप्पितेल्लं गुडाण पत्तेगदो व सव्वेसिं ।
णिज्जूहणमोगाहिम पणकुसणलोणमादीणं॥220॥

अरसं च अण्णवेलाकदं च सुद्धोदणं च लुक्खं च ।
आयंबिलमायामोदण च विगडोदणं चेव॥221॥

इच्चेवमादि विविहो णायब्बो हवदि रसपरिच्चाओ ।
एस तवो भजिदव्वो विसेसदो सल्लिहंतेण॥222॥

गत्तापच्चागदं उज्जुवीहि गोमुत्तियं च पेलवियं ।

संबूकावट्टं पि य पदंगवीधी य गोयरिया ॥ 223 ॥

पाडयणियंसणभिव्खा परिमाणं दत्तिघासपरिमाणं ।

पिंडेसणा य पाणेसणा य जागूय पुग्गलया ॥ 224 ॥

संसिट्ठ फलिह परिखा पुप्फोवहिदं व सुद्धगोवहिदं ।

लेवडमलेवडं पाणयं च णिस्सित्थगमसित्थं ॥ 225 ॥

पत्तस्स दायगस्स व अवग्गहो बहुविहो ससत्तीए ।

इच्चेवमादिविधिणा णादव्वा वुत्तिपरिसंखा ॥ 226 ॥

अणुसूरी पडिसूरी य उड्डसूरी य तिरियसूरी य ।

उभागेण य गमणं पडिआगमणं च गंतूणं ॥ 227 ॥

साधारणं सवीचारं सणिरुद्धं तहेव वोसट्टं ।

समपादमेगपादं गिद्धोलीणं च ठाणाणि ॥ 228 ॥

समपलियं क णिसेज्जा समपदगोदोहिया च उक्कुडिया ।

मगरमुह हत्थिसंुडी गोणणिसेज्जद्धपलियं का ॥ 229 ॥

वीरासणं च दंडा य उड्डसाई य लगडसाई य ।

उत्ताणो मच्छिय एगपाससाई य मडयसाई य ॥ 230 ॥

अभावगाससयणं अणिठ्ठुवणा अकंडगुं चेव ।

तणफलयसिलाभूमी सेज्जा तह केसलोचे य ॥ 231 ॥

अभ्रुट्ठणं च रादो अण्हाणमदंतधोवणं चेव ।
कायकिलेसो एसो सीदुण्हादावणादी य॥232॥

जत्थ ण सोत्तिग अत्थि दु सद्वरसरूवगंधफासेहिं ।
सज्झायज्झाणवाघादो वा वसधी विवित्ता सा॥233॥

वियडाए अवियडाए समविसमाए बहिं च अंतो वा ।
इत्थिणउंसयपसुवज्जिदाए सीदाए उसिणाए॥234॥

उग्गमउप्पादणएसणाविसुद्धाए अकिरियाए दु ।
वसदि असंसत्ताए णिप्पाहुडियाए सेज्जाए॥235॥

सुण्णघरगिरिगुहारुक्खमूल - आगंतुगारदेवकुले ।
अकदप्पभारारामघरादीणि य विचित्ताई॥236॥

कलहो बोलो झंझा वामोहो संकरो ममत्तिं च ।
ज्झाणाज्झयणविघादो णत्थि विवित्ताए वसधीए॥237॥

इय सल्लीणमुवगदो सुहप्पवत्तेहिं तित्थजोएहिं ।
पंचसमिदो तिगुत्तो आदठ्ठपरायणो होदि॥238॥

जो णिज्जरेदि कम्मं असंवुडो सुमहदावि कालेण ।
तं संवुडो तवस्सी खवेदि अंतोमुहुत्तेण॥239॥

एवमवलायमाणो भावेमाणो तवेण एदेण ।
दोसे णिग्घाडंतो पग्गहिददरं परक्कमदि॥240॥

सो णाम बाहिरतवो जेण मणो दुक्कडं ण उट्ठेदि ।
जेण य सट्ठा जायदि जेण य जोगा ण हायंति॥241॥

बाहिरतवेण होदि हु सव्वा सुहसीलदा परिच्चत्ता ।
सल्लिहिदं च सरीरं ठविदो अप्पा य संवेगे॥242॥

दंताणि इंदियाणि य समाधिजोगा य फासिदा होति ।
अणिगूहिदवीरियओ जीविदतण्हा य वोच्छिण्णा॥243॥

दुक्खं च भाविदं होदि अप्पडिबद्धो य देहरससुक्खे ।
मुसमूरिया कसाया विसएसु अणायरो होदि॥244॥

कदजोगदाददमणं आहारणिरासदा अगिद्धी य ।
लाभालाभे समदा तित्तिक्खणं वंभचेरस्स॥245॥

णिद्वाजओ य दढझाणदा विमुत्ती य दप्पणिग्घादो ।
सज्झायजोगणिव्विग्घदा य सुहदुक्खसमदा य॥246॥

आदा कुल गणो पवयणं च सोभाविदं हवदि सव्वं ।
अलसत्तणं च विजट्ठं कम्मं च विणिद्धुयं होदि॥247॥

बहुगाणं संवेगो जायदि सोमत्तणं च मिच्छाणं ।
मग्गो य दीविदो भगवदो य आणाणुपालिया होदि॥248॥

देहस्स लाघवं णेहलूहणं उवसमो तहा परमो ।
जवणाहारो संतोसदा य जहसंभवेण गुणा॥249॥

एवं उग्गमउप्पादणेसणासुद्धभत्तपाणेण ।
मिदलहुयविरसलुक्खेण य तवमेदं कुणदि णिच्चं॥250॥

उल्लीणोल्लीणेहिं य अहवा एक्कंतवट्ठमाणेहिं ।
सल्लिहइ मुणी देहं आहारविधिं पयणुगितो॥251॥

अणुपुव्वेणाहारं संवट्ठंतो य सल्लिहइ देहं ।
दिवसुग्गहिण तवेण चावि सल्लेहणं कुणइ॥252॥

विविहाहिं एसणाहिं य अवग्गहेहिं विविहेहिं उग्गेहिं ।
संजममविराहितो जहाबलं सल्लिहइ देहं॥253॥

सदि आउगे सदि बले जाओ विविधाओ भिक्खुपडिमाओ ।
ताओ वि ण बाधंते जहाबल सल्लिहंतस्स॥254॥

सल्लेहणा सरीरे तवोगुणविधी अणेगहा भणिदा ।
आयंबिलं महेसी तत्थ दु उक्कस्सयं विति॥255॥

छट्ठमदसमदुबालसेहिं भत्तेहिं अदिविकट्ठेहिं ।
मिदलहुगं आहारं करेदि आयंबिल बहुसो॥256॥

उक्कस्स एण भत्तपइण्णाकालो जिणेहिं णिदिट्ठो ।
कालम्मि संपहुत्ते बारसवरिसाणि पुण्णाणि॥257॥

जोगेहिं विचित्तेहिं दु खवेइ संवच्छराणि चत्तारि ।
वियडी णिज्जूहिता चत्तारि पुणो वि सोसेदि॥258॥

आयंबिलणिव्वियडीहिं दोण्णि आयंबिलेण एक्कं च ।

अद्धं णादिविगट्टेहिं अदो अद्धं विगट्टेहिं॥259॥

भत्तं खेत्तं कालं धादुं च पडुच्च तह तवं कुज्जा ।

वादो पित्तो सिंभो व जहा खोभं ण उवयंति॥260॥

एवं सरीरसल्लेहणाविहिं बहुविहा वि फासेंतो ।

अज्झवसाणविशुद्धिं खणमवि खवओ ण मुंचेज्जा॥261॥

अज्झवसाणविसुद्धीए वज्जिदा जे तवं विगट्ठं पि ।

कुव्वंति बहिल्लेस्सा ण होइ सा केवला सुद्धी॥262॥

अविगट्ठं पि तवं जो करेइ सुविसुद्धसुक्कलेस्साओ ।

अज्झवसाणविशुद्धो सो पावदि केवला सुद्धिं॥263॥

अज्झवसाणविसुद्धी कसायकलुसीकदस्स णत्थित्ति ।

अज्झवसाणविसुद्धी कसायसल्लेहणा भणिदा॥264॥

कोधं खमाए माणं च मद्दवेणाज्जवं च मायं च ।

संतोषेण य लोहं जिणदु खु चत्तारि वि कसाए॥265॥

कोहस्स य माणस्स मायालोभाण सो ण एदि वसं ।

जो ताण कसायाणं उप्पत्तिं चेव वज्जेइ॥266॥

तं वत्थुं मोत्तव्वं जं पडि उप्पज्जदे कसायग्णि ।

तं वत्थुमल्लिएज्जो जत्थोवसमो कसायाणं॥267॥

जइ कहवि कसायगी समुठिदो होज्जा विज्झवेदव्वो ।

रागदोसुप्पत्ती विज्झादि हु परिहरंतस्स॥268॥

जावंति केइ संग्गा उदीरया होंति रागदोसाणं ।

ते वज्जंतो जिणदि हु रागं दोसं च णिस्संगो॥269॥

पडिचोदणासहणवायखुभिदपडिवयणइंधणाइद्धो ।

चण्डो हु कसायगी सहसा संपज्जालेज्जाहि॥270॥

कसायगी चरित्तसारं डह

सम्मत्तं पि विराधिय अणंतसंसारियं कुज्जा॥271॥

तम्हा हु कसायगी पावं उपज्जामाणयं चेव ।

इच्छामिच्छादुक्कडवंदणसलिलेण विज्झाहि॥272॥

तह चेव णोकसाया सल्लिहियव्वा परेसुवसमेण ।

सण्णाओ गारवाणि य तह लेस्साओ य असुहाओ॥273॥

परिवट्ठिदोवधाणो विगडसिराणहारुपासुलिकडाहो ।

सल्लिहिदतणुसरीरो अज्झप्परदो हवदि णिच्चं॥274॥

एवं कदपरियम्मो सभंतरवाहिरम्मि सल्लिहणो ।

संसारमोक्खबुद्धी सव्वुवरिल्लं तवं कुणदि॥275॥

दिशा

वोढुं गलादि देहं पव्वोढव्वमिणसुचिभारोत्ति ।

तो दुक्खभारभीदो कदपरियम्मो गणमुवेदि॥276॥

सल्लेहणं करंतो जदि आयरिओ हवेज्ज तो तेण ।
ताए वि अवत्थाए चिंतेदव्वं गणस्स हियं॥277॥

कालं संभावित्ता सव्वगणमणुदिसं च वाहरिय ।
सोमतिहितरणणक्खत्तविलग्गे मंगलोगासे॥278॥

गच्छाणुपालणत्थं आहोइय अत्तगुणसमं भिक्खू ।
तो तम्मि गणविसग्गं अप्पकहाए कुणदि धीरो॥279॥

अव्वोच्छित्तिणिमित्तं सव्वगुणसमोयरं तयं णच्चा ।
अणुजाणेदि दिसं सो एस दिसा वोत्ति बोधित्ता॥280॥

क्षमण

आमंतेऊण गणिं गच्छम्मि य तं गणिं ठवेदूण ।
तिविहेण खमावेदि हु स बालउड्डाउलं गच्छं॥281॥

जं दीहकालसंवासदाए ममकारणेहरागेण ।
कडुगपरुसं च भणिया तमहं सव्वं खमावेमि॥282॥

वंदिय णिसुडिय पडिदो तादारं सव्ववच्छलं तादिं ।
धम्मायरियं णिययं खामेदि गणो वि तिविहेण॥283॥

अनुशिष्टि

संवेगजिणियहासो सुत्तत्थविसारदो सुदरहस्सो ।
आदट्टचिंतओ वि हु चिंतेदि गणं जिणाणाए॥284॥

णिद्धमहुरगंभीरं गाहुगपल्हादणिज्जापत्थं च ।
अणुसिट्ठिं देइ तहि गणाहिवइणो गणस्स वि य॥285॥

वढ्ढंतओ विहारो दंसणणाणचरणेसु कायव्वो ।
कप्पाकप्पठिदाणं सव्वेसिमणागदे मग्गे॥286॥

संखित्ता वि य पवहे जह वचइ वित्थरेण वढ्ढंती ।
उदधिं तेण वरणदी तह गुणसीलेहिं वट्ठाहि॥287॥

मज्जाररसिदसरिसोवमं तुमं मा हु काहिसि विहारं ।
मा णासेहिसि दोण्णि वि अप्पाणं चेव गच्छं च॥288॥

जो सघरं पि पलित्तं णेच्छदि विज्झविदुमलसदोसेण ।
किह सो सद्दहिदव्वो परघरदाहं पसामेदुं॥289॥

वज्जेहि चयणकप्पं सगपरपक्खे तहा विरोधं च ।
वादं असमाहिकरं विसग्गिभूदे कसाए य॥290॥

णाणम्मि दंसणम्मि य चरणम्मि य तीसु समयसारेसु ।
ण चाएदि जो ठवेदुं गणमप्पाणं गणधरो सो॥291॥

णाणम्मि दंसणम्मि य चरणम्मि य तीसु समयसारेसु ।
चाएदि जो ठवेदुं गणमप्पाणं गणधरो सो॥292॥

पिंडं उवहिं सेज्जं उग्गमउप्पादणेसणादीहिं ।
चारित्तरक्खणटठं सोधिंतो होदि सुचरित्तो॥293॥

पिंडं उवहिं सेज्जं अविसोहिय जो हु भंजमाणो हु ।
मूलठाणं यत्तो मूलोत्ति य समणपेल्लो सो॥294॥

एसा गणधरमेरा आयारत्थाण वण्णिया सुत्ते ।
लोगसुहाणुरदाणं अप्पच्छंदो जहिच्छाए॥295॥

सीदावेइ विहारं सुहसीलगुणेहिं जो अबुद्धीओ ।
सो णवरि लिंगधारी संजमसारेण णिस्सारो॥296॥

पिण्डं उवधिं सेज्जामविसोधिय जो खु भंजमाणो हु ।
मूलठाणं पत्तो बालोत्तिय णो समणबालो॥297॥

कुलगामणयररज्जं पयहिय तेसु कुणइ दु ममत्तिं जो ।
सो णवरि लिंगधारी संजमसारेण णिस्सारो॥298॥

अपरिस्सावी सम्मं समपासी होहि सव्वकज्जोसु ।
संरक्ख सचक्खुंपि व सबालउट्ठाउलं गच्छं॥299॥

णिवदिविहूणं खेत्तं णिवदी वा जत्थ दुट्ठओ होज्ज ।
पव्वज्जा च ण लभ्भदि संजमचादो व तं वज्जो॥300॥

कुणइ अपमादमावासएसु संजमतवोवधाणेसु ।
णिस्सारे माणुस्से दुल्लहबोहिं वियाणित्ता॥301॥

समिदा पंचसु समिदीसु सव्वदा जिणवयणमणुगदमदीया ।
तिहिं गारवेहिं रहिदा होइ तिगुत्ता य दंडेसु॥302॥

सण्णाउ कसाए वि य अट्ठं रुद्धं च परिहरह णिच्चं ।
दुट्ठाणि इंदियाणि य जुत्ता सव्वप्पणा जिणह॥303॥

धण्णा हु ते मणुस्सा जे ते विसयाउलम्मि लोयम्मि ।
विहरंति विगदसंगा णिराउला णाणचरणजुदा॥304॥

सुस्सूसया गुरूणं चेदियभत्ता य विणयजुत्ता य ।
सज्झाए आउत्ता गुरुपवयणवच्छला होह॥305॥

दुस्सहपरीसहेहिं य गामवचीकंटएहिं तिक्खेहिं ।
अभिभूदा वि हु संता मा धम्मधुरं पमुच्चेह॥306॥

तित्थयरो चदुणाणी सुरमहिदो सिज्झिदव्वयधुवम्मि ।
अणिगूहिदबलविरिओ तवोविधाणम्मि उज्जमदि॥307॥

किं पुण अवसेसाणं दुक्खक्खयकारणाय साहूणं ।
होइ ण उज्जम्मिदव्वं सपच्चवायम्मि लोयम्मि॥308॥

सत्तीए भत्तीए विज्जावच्चुज्जदा सदा होइ ।
आणाए णिज्जेरेत्ति य सबालउट्ठाउले गच्छे॥309॥

सेज्जागासणिसेज्जा उवधी पडिलेहणाउवग्गहिदे ।
आहारो सहवायणविकिंचणुव्वत्तणादीसु॥310॥

अद्धाण तेण सावयरायणदीरोधगासिवे ऊमे ।
वेज्जावच्चं उत्तं सगहणारक्खणोवेदं॥311॥

अणिगूहिदबलविरिओ वेज्जावच्चं जिणोवदेसेण ।
जदि ण करेदि समत्थो संतो सो होदि णिद्धम्मो॥312॥

तित्थयराणाकोधो सुदधम्मविराधणा अणायारो ।
अप्पापरोपवयणं च तेण णिज्जूहिदं होदि॥313॥

गुणपरिणामो सट्ठा वच्छाल्लं भत्तिपत्तलंभो य ।
संधाणं तवपूया अव्विच्छत्ती समाधी य॥314॥

आणा संजमसाखिल्लदा य दाणं च अविदिगिंछा य ।
वेज्जावच्चस्स गुणा पभावणा कज्जपुण्णाणि॥315॥

मोहग्गिणादिमहदा घोरमहावेयणाए फुट्ठंतो ।
डज्झदि हु धगधगंतो ससुरासुरमाणुसो लोओ॥316॥
एदम्मि णवरि मुणिणो णाणजलोवग्गहेण विज्झविदे ।
डाहुम्मक्का होति हु दमेण णिव्वेदणा चेव॥317॥
णिग्गहिदिंदियदारा समाहिदा समिदसव्वचेट्ठंगा ।
धण्णा णिरावयक्खा तवसा विधुणंति कम्मरयं॥318॥
इय दढगुणपरिणामो वेज्जावच्चं करेदि साहुस्स ।
वेज्जावच्चेण तदो गुणपरिणामो कदो होदि॥319॥

जह जह गुणपरिणामो तह तह आरुहइ धम्मगुणसेट्ठिं ।
वट्ठदि जिणवरमग्गे णवणवसंवेगसट्ठावि॥320॥

सट्ठाए वट्ठियाए वच्छलं भावदो उवक्कमदि ।
तो तिव्वधम्मराओ सव्वजगसुहावहो होइ॥321॥

अरहंतसिद्धभत्ती गुरभत्ती सव्वासाहुभत्ती य ।
आसेविदा समग्गा विमला वरधम्मभत्ती य॥322॥

संवगजणियकरणा णिस्सल्ला मन्दरुव्व णिक्कंपा ।
जस्स दढा जिणभत्ती तस्स भयं णत्थि संसारे॥323॥

पंचमहव्वयगुत्तो णिग्गहिदकसायवेदणो दंतो ।
लभ्भदि हु पत्तभूदो णाणासुदरयणणिधिभूदो॥324॥

दंसणणाणे तव संजमे य संधाणदा कदा होइ ।
तो तेण सिद्धिमग्गे ठविदो अप्पा परो चेव॥325॥

वेज्जावच्चकरो पुण अणुत्तरं तवसमाधिमारूढो ।
पप्फोडिंतो विहरदि बहुभवबाधाकरं कम्मं॥326॥

जिणसिद्धसाहुधम्मा अणागदातीदवट्टमाणगदा ।
तिविहेण सुद्धमदिणा सव्वे अभिपूइया होति॥327॥

आइरियधारणाए संघो सव्वो वि धारिओ होदि ।
संघस्स धारणाए अव्वोच्छित्ती कया होई॥328॥

साधुस्स धारणाए वि होइ तह चेव धारिओ संघो ।
साधू चेव ही संघो ण हु संघो साहूवदिरित्तो॥329॥

गुणपरिणामादीहि अणुत्तरविहीहिं विहरमाणेण ।
जा सिद्धिसुहसमाधी सा वि य उवगूहिया होदि॥330॥

अणुपालिदा य आणा संजमजोगा य पालिदा होति ।
णिग्गहियाणि कसायेंदियाणि साखिल्लदा य कदा॥331॥

अदिसयदाणं दत्तं णिव्वीदिगिंच्छा य दरिसिदा होइ ।
पवयणपभावणा वि य णिव्वूढं संघकज्जं च॥332॥

गुणपरिणामादीहिं य विज्जावच्चुज्जदो समज्जेदि ।
तित्थयरणामकम्मं तिलोयसंखोभयं पुण्णं॥333॥

एदे गुणा महल्ला वेज्जावच्चुज्जवस्स बहुया य ।
अप्पठ्ठिदो हु जायदि सज्झायं चेव कुव्वंतो॥334॥

वज्जेह अप्पमत्ता अज्जासंसग्गमग्गिविससरिसं ।
अज्जाणुचरो साधु लहदि अकित्तिं खु अचिरेण॥335॥

थेरस्स वि तवसिस्स वि बहुस्सुदस्स वि पमाणभूदस्स ।
अज्जासंसग्गीए जणजंपणयं हवेज्जादि॥336॥

किं पुण तरुणो अबहुस्सुदोयअणुकिट्ठ
अज्जासंसग्गीए जणजंपणयं ण पावेज्ज॥337॥

जदि वि सयं थिरबुद्धी तहा वि संसग्गिलद्दपसराए ।
अग्निसमीवे व घदं विलेज्ज चित्तं खु अज्जाए॥338॥

सव्वत्थ इत्थिवग्गम्मि अप्पमत्तो सया अवीसत्थो ।
णित्थरदि बम्भचेरं तव्विवरीदो ण णित्थरदि॥339॥

सव्वत्तो वि विमुत्तो साहू सव्वत्थ होइ अप्पवसो ।
सो चेव होदि अज्जाओ अणुचरंतो अणप्पवसो॥340॥

खेलपडिदमप्पाणं ण तरदि जह मच्छिया विमोचेदुं ।
अज्जाणुचरो ण तरदि तह अप्पाणं विमोचेदुं॥341॥

साधुस्स णत्थि लोए अज्जासरिसी खु बंधणे उवमा ।
चम्मेण सह अवेंतो ण य सरिसो जोणिकसिलेसो॥342॥

अण्णं पि तहा वत्थुं जं जं साधुस्स बंधणं कुणदि ।
तं तं परिहरह तदो होहदि दढसंजदा तुज्झ॥343॥

पासत्थादीपणयं णिच्चं वज्जेह सव्वधा तुम्हे ।
हंदि हु मेलणदोसेण होइ पुरिसस्स तम्मयदा॥344॥

लज्जं तदो विहिंसं पारंभं णिव्विसंकदं चेव ।
पियधम्मो वि कमेणारुहंतओ तम्मओ होइ॥345॥

संविग्गस्सवि संसग्गीए पीदी तदो य बीसंभो ।
सदि वीसम्भे य रदी होइ रदीए वि तम्मयदा॥346॥

जइ भाविज्जइ गंधेण मट्टिया सुरभिणा व इदरेण ।
किह जोएण ण होज्जो परगुणपरिभाविओ पुरिसो॥347॥

जो जारिसीय मेत्ती केरइ सो होइ तारिसो चेव ।
वासिज्जइ च्छुरिया सा रिया वि कणयादिसंगेण॥348॥

दुज्जणसंसग्गीए पजहदिं णियगं गुणं खु सुजणो वि ।
सीयलभावं उदयं जह पजहदि अग्गिजोएण॥349॥

सुजणो वि होइ लहुओ दुज्जणसंमेलणाए दोसेण ।
माला वि मोल्लगरुया होदि लहू मडयसंसिद्धा॥350॥

दुज्जणसंसग्गीए संकिज्जदि संजदो वि दोसेण ।
पाणागारे दुद्धं पियंतओ बम्भणो चेव॥351॥

परदोसगहणलिच्छो परिवादरदो जणो खु उस्सूणं ।
दोसत्थाणं परिहरह तेण जणजंपणोगासं॥352॥

अदिसंजदो वि दुज्जणकएण दोसेण पाउणइ दोसं ।
जह घूगकए दोसे हंसो य हओ अपावो वि॥353॥

दुज्जणसंसग्गीए विभाविदो सुयणमज्झयारम्मि ।
ण रमदि रमदि य दुज्जणमज्झे वेरग्गमवहाय॥354॥

जहदि य णिययं दोसं पि दुज्जणो सुयणवइयरगुणेण ।
जह मेरुमल्लियंतो काओ णिवयच्छविं जहदि॥355॥

कुसुममगंधमवि जहा देवयसेसत्ति कीरदे सीसे ।
तह सुयणमज्झवासी वि दुज्जणो पूइओ होइ॥356॥

संविग्गाणं मज्झे अप्पियधम्मो वि कायरो वि णरो ।
उज्जमदि करुणचरणे भावणभयमाणलज्जाहिं॥357॥

संविग्गोवि य संविग्गदरो संवेगमज्झयारम्मि ।

होइ जह गंधजुत्ती पयडिसुरभिदव्वसंजोए॥358॥

पासत्थसदसहस्सादो वि सुसीलो वरं खु एक्को वि ।

जं संसिदस्स सीलं दंसणणाणचरणाणि वट्ठंती॥359॥

संजदजणावमाणं पि वरं दुज्जणकदादु पूजादो ।

सीलविणासं दुज्जणसंसग्गी कुणदि ण दु इदरं॥360॥

आसयवसेण एवं पुरिसा दोसं गुणं व पावंती ।

तह्मा पसत्थगुणमेव आसयं अल्लिएज्जाह॥361॥

पत्थं हिदयाणिट्ठं पि भण्णमाणस्स सगणवासिस्स ।

कडुगं व ओसहं तं महरविवायं हवइ तस्स॥362॥

पत्थं हिदयाणिट्ठं पि भण्णमाणं णरेण घेत्तव्वं ।

पेल्लूदूण वि छूढं बालस्स घदं व तं खु हिदं॥363॥

अप्पपसंसं परिहरह सदा मा होह जसविणासयरा ।

अप्पाणं थोवंतो तणलहुहो होदि हु जणम्मि॥364॥

संतो वि गुणा कत्थंतयस्स णस्संति कंजिए व सुरा ।

सो चेव हवदि दोसो जं सो थोएदि अप्पाणं॥365॥

संतो हि गुणा अकहंतयस्स पुरिसस्स ण वि य णस्संति ।

अकहंतस्स वि जह गहवइणो जगविस्सुदो तेजो॥366॥

ण य जायंति असंता गुणा विकत्थंतयस्स पुरिसस्स ।

धंति हु महिलायंतो व पंडवो पंडवो चेव॥367॥

संतं सगुणं कित्तिज्जंतं सुजणो जणम्मि सोदूणं ।

लज्जदि किह पुण सयमेव अप्पगुणकित्तणं कुज्जा॥368॥

अविकत्थंतो अगुणो वि होइ सगुणो व सुजणमज्झम्मि ।

सो चेव होदि हु गुणो जं अप्पाणं ण थोएइ॥369॥

वायाए जं कहणं गुणाण तं णासणं हवे तेसिं ।

होदि हु चरिदेण गुणाणकहणमुभासणं तेसिं॥370॥

वायाए अकहंता सुजणो चरिदेहिं कहियगा होति ।

विकहिंतगा य सगुणे पुरिसा लोगम्मि उवरीव॥371॥

सगुणम्मि जणे सगुणो वि होइ लहुगो णरो विकत्थितो ।

सगुणो वा अकहितो वायाए होति अगुणेसु॥372॥

चरिएहिं कत्थमाणो सगुणं सगुणेसु सोभदे सगुणो ।

वायाए वि कहितो अगुणो व जणम्मि अगुणम्मि॥373॥

सगणे व परगणे वा परपरिपवादं च मा करेज्जाह ।

अच्चासादणविरदा होह सदा वज्जभीरू य॥374॥

आयासवेरभयदुक्खसोयलहुगत्तणाणि य करेइ ।

परणिंदा वि हु पावा दोहग्गकरी सुयणवेसा॥375॥

किच्चा परस्स णिंदं जो अप्पाणं ठवेदुमिच्छेज्ज ।
सो इच्छदि आरोगं परम्मि कडुओसहे पीए॥376॥

दट्ठूण अण्णदोसं सप्पुरिसो लज्जिओ सयं होइ ।
रक्खइ य सयं दोसं व तयं जणजंपणभएण॥377॥

अप्पो वि परस्स गुणो सप्पुरिसं पप्प बहुदरो होदि ।
उदए व तेल्लविदू किह सो जंपिहिदि परदोसं॥378॥

एसो सव्वसमासो तह जतह जहा हवेज्ज सुजणम्मि ।
तुज्झं गुणेहिं जणिदा सव्वत्थ वि विस्सुदा किन्ती॥379॥

एस अखंडियसीलो बहुस्सुदो व अपरोवताबी य ।
चरणगुणसुट्ठिदोत्तिय धण्णस्स खु घोसणा भमदि॥380॥

वाढत्ति भाणिदूणं एदं णो मंगलोत्ति यि गणो सो ।
गुरुगुणपरिणदभावो आणंदंसं णिवाडेइ॥381॥

भगवं अणुग्गहो मे जं तु सदेहोव्व पालिदा अम्हे ।
सारणवारणपडिचोदणाओ धण्णा हु पावेत्ति॥382॥

अम्हे वि खमावेमो जं अण्णाणापमादरागेहिं ।
पडिलोमिदा य आणा हिदोवदेसं करिंताणं॥383॥

सहिदय सकण्णयाओ कदा सचक्खू य लद्धसिद्धिपहा ।
तुज्झ वियोगेण पुणो णट्ठदिसाओ भविस्सामो॥384॥

सव्वजयजीवहिदए थेरे सव्वजगजीवणाथम्मि ।
पवसंते य मरंते देसा किर सुण्णया होंति॥385॥

सव्वजयजीवहिदए थेरे सव्वजगजीवणाथम्मि ।
पवसंते व मरंते होदि हु देसोंधयारोव्व॥386॥

सीलट्ठगुणट्ठेहिं दु बहुस्सुदेहिं अवरोवतावीहिं ।
पवसंदे य मरंते देसा ओखंडिया होंति॥387॥

सव्वस्स दायगाणं समसुहदुक्खाण णिप्पकंपाणं ।
दुक्खं खु विसहिदुं जे चिरप्पवासो वरगुरूणं॥388॥

परगणचर्या

एवं आउच्छित्ता सगणं अभुज्जदं पविहरंतो ।
आराधणाणिमित्तं परगणगमणे मइं कुणदि॥389॥

सगणे आणाकोवो करुसं कलहपरिदावणादी य ।
णित्थयसिणेहकालुगिणझाणविग्घो य असमाधी॥390॥

उट्ठाहकरा थेरा कालहिया खुड्डया खरा सेहा ।
आणाकोवं गणिनो करेज्ज तो होज्ज असमाही॥391॥

परगणवासी य पुणो अव्वावारो गणी हवदि तेसु ।
णत्थि य असमाहाणं आणाकोवम्मि वि कदम्मि॥392॥

खुट्ठे थेरे सेहे असंवुडे दट्ठ कुणइ वा परुसं ।
ममकारेण भणेज्जो भणिज्ज वा तेहिं परुसेण॥393॥

पडिचोदणासहणदाए होज्ज गणिणो दि तेहिं सह कलहो ।
परिदावणादिदोसा य होज्ज गणिणो व तेसिं वा॥394॥

कलहपरिदावणादी दोसे व अमाउले करंतेसु ।
गणिणो हवेज्ज सगणे ममत्तिदोसेण असमाधी॥395॥

रोगादंकादीहिं य सगणे परिदावणादिपत्तेसु ।
गणिणो हवेज्ज दुक्खं असमाधी वा सिणेहो वा॥396॥

तण्हादिएसु सहणिज्जेसु वि सगणम्मि णिभओ संतो ।
जाएज्ज व सेएज्ज य अकप्पिदं किं पि वीसत्थो॥397॥

उट्ठे सअंकवट्ठिय बाले अज्जाउ तह अणाहाओ ।
पासंतस्स सिणेहो हवेज्ज अच्चंतियविओगे॥398॥

खुट्ठा य खुट्ठियाओ अज्जाओ वि य करेज्ज कोलुणियं ।
तो होज्ज ज्झाणविग्घो असमाधी वा गणधरस्स॥399॥

भत्ते वा पाणे वा सुस्सूसाए व सिस्सवग्गम्मि ।
कुव्वंतम्मि पमादं असमाधी होज्ज गणवदिणो॥400॥

एदे दोसा गणिणो विसेसदो होंति सगणवासिस्स ।
भिक्षुस्स वि तारिसयस्स होंति पाएण ते दोसा॥401॥

एदे सव्वे दोसा ण होंति परगणाणिवासिणो गणिणो ।
तम्हा सगणं पयहिय बच्चदि सो परगणं समाधीए॥402॥

संते सगणे अहं रोचेदूणागदो गणमिमोत्ति ।

सव्वादरसत्तीए भत्तीए वढ्ढइ गणो से॥403॥

गीदत्थो चरणत्थो पच्छेदूणागदस्स खवयस्स ।

सव्वादरेण जुत्तो णिज्जवगो होदि आयरिओ॥404॥

संविग्गवज्जभीरुस्स पादमूलम्मि तस्स विहरंतो ।

जिणवयणसव्वसारस्स होदि आराधओ तादी॥405॥

मार्गणा

पंचच्छसत्तजोयणसदाणि तत्तोऽहियाणि वा गंतु ।

णिज्जावगमण्णेसदि समाधिकामो अणुण्णादं॥406॥

एक्कं व दो व तिण्णि य बारसवरिसाणि वा अपरिदंतो ।

जिणवयणमणुण्णादं गवेसदि समाधिकामो दु॥407॥

गच्छेज्ज एगरादियपडिमा अज्झेणपुच्छणाकुसलो ।

थंडिल्लो संभोगिय अप्पडिबद्धो य सव्वत्थ॥408॥

आलोयणापरिणदो सम्मं संपच्छिदो गुरुसयासं ।

जदि अंतरा हु अमुहो हवेज्ज आराहओ होज्ज॥409॥

आलोचनापरिणदो सम्मं संपच्छिदो गुरुसयासं ।

जदि अंतरम्मि कालं करेज्ज आराहओ होइ॥410॥

आलोचनापरिणदो सम्मं संपच्छिदो गुरुसयासं ।

जदि आयरिओ अमुहो हवेज्ज आराहओ होइ॥411॥

आलोचनापरिणदो सम्मं संपच्छिदो गुरुसयासं ।
जदि आयरिओ कालं करेज्ज आराहओ होइ॥412॥

सल्लं उद्धरिदुमणो संवेगुव्वेगतिव्वसद्धाओ ।
जं जादि सुद्धिहेदुं सो तेणाराहओ भवदि॥413॥

आयारजीदकप्पगुणदीवणा अत्तसोधिणिज्झंझा ।
अज्जवमद्वलाघवतुट्ठीपह्लादणं च गुणा॥414॥

आएसं एज्जंतं अभुट्ठिति सहसा हु दठ्ठणं ।
आणासंगहवच्छल्लदाए चरणे य णादुंजे॥415॥

आगंतुगवच्छव्वा पडिलेहाहिं तु अण्णमण्णेहिं ।
अण्णोण्णचरणकरणं जाणणहेदुं परिक्खंति॥416॥

आवासयठाणादिसु पडिलेहणवयणगहणणिक्खेवे ।
सज्झाए य विहारे भिक्खग्गहणे परिच्छंति॥417॥

आएसस्स तिरत्तं णियमा संघाडओ दु दादव्वो ।
सेज्जा संथारो वि य जइ वि असंभोइओ होइ॥418॥

तेण परं अवियाणिय ण होदि संघाडओ दु दादव्वो ।
सेज्जा संथारो वि य गणिणा अविजुत्तजोगिस्स॥419॥

उग्गमउप्पादणएसणासु सोधी ण विज्जदे तस्स ।
अणगारमणालोइय दोसं सभुज्जमाणस्स॥420॥

विणएणुवक्कमिता उवसंपज्जदि दिवा व रादो वा ।
दीवेदि कारणं पि य विणएण उवठ्ठिए संते॥421॥

उव्वादो तं दिवसं विस्सामिता गणिमुवठ्ठादि ।
उद्धरिदुमणोसल्लं विदिए तदिए व दिवसम्मि॥422॥

सुस्थित

आयारवं च आधारवं च ववहारवं पकुव्वीय ।
आयावायविदंसी तहेव उप्पीलगो चेव॥423॥

अपरिस्साई णिव्वावओ य णिज्जावओ पहिदकित्ती ।
णिज्जवणगुणोवेदो एरिसओ होदि आयरिओ॥424॥

आयारं पंचविहं चरदि चरावेदि जो णिरदिचारं ।
उवदिसदि य आयारं एसो आयारवं णाम॥425॥

दशविहठिदिकप्पे वा हवेज्ज जो सुठ्ठिदो सयायरियो ।
आयारवं खु एसो पवयणामादासु आउत्तो॥426॥

आचेलक्कुद्देसियसेज्जाहररायपिंड किरियम्मे ।
जेट्ठपडिक्कमणे वि य मासं पज्जो सवणकप्पो॥427॥

एदेसु दससु णिच्चं समाहिवो णिच्चवज्जभीरू य ।
खवयस्स विसद्धं सो जधुत्तचरियं उवविधेदि॥428॥

पंचविधे आचारे समुज्जदो सव्वसमिदचेट्ठाओ ।
सो उज्जमेदि खवयं पंचविधे सुट्ठु आयारे॥429॥

सेज्जोवधिसंथारं भत्तं पाणं च चयणकप्पगदो ।
उवकप्पिज्ज असुद्धं पडिचरए वा असंविगे॥430॥

सल्लेहणं पयासेज्ज गंधं मल्लं च समणुजाणिज्जा ।
अप्पाउगं व कधं करिज्ज सइरं व जंपिज्ज॥431॥

ण करेज्ज सारणं वारणं च खवयस्स चयणकप्पगदो ।
उद्देज्ज वा महल्लं खवयस्स वि किंचणारंभं॥432॥

आयारत्थो पुण से दोसे सव्वे वि ते विवज्जेदि ।
तम्हा आयारत्थो णिज्जवओ होदि आयरिओ॥433॥

चोद्धसदसणवपुव्वी महामदी सायरोव्व गंभीरो ।
कप्पववहारधारी होदि हु आधारवं णाम॥434॥

णासेज्ज अगीदत्थो चउरंगं तस्स लोगसारंगं ।
णट्ठम्मि य चउरंगे ण उ सुलहं होइ चउरंगं॥435॥

संसारसावरम्मि य अणंतबहुतिव्वदुक्खसलिलम्मि ।
संसरमाणो दुक्खेण लहदि जीवो मणुस्सत्तं॥436॥

तह चेव देसकुलजाइरूवमारोग्गमाउगं बुद्धी ।
सवणं गहणं सट्ठा य संजमो दुल्लहो लोए॥437॥

एवमवि दुल्लहपरंपरेण लद्धू ण संजमं खवओ ।
ण लहिज्ज सुदी संवेगकरी अबहुस्सुयसयासं॥438॥

सम्मं सुदिमलहंतो दीहद्धं मुत्तिमुवगमित्ता वि ।
परिवडइ मरणकाले अकदाधारस्स पासम्मि॥439॥

सक्का वंसी छेत्तुं तत्तो उक्कट्ठिओ पुणो दुक्खं ।
इय संजमस्स वि मणो विसएसुक्कट्ठिदुं दुक्खं॥440॥

आहारमओ जीवो आहारेण य विराधिदो संतो ।
अट्टदुहट्टो जीवो ण रमदि णाणे चरित्ते य॥441॥

सुदिपाणयेण अणुसट्ठिभोयणेण य पुणो उवग्गहिदो ।
तण्हाछुहाकिलंतो वि होदि झाणे अवक्खित्तो॥442॥

पढमेण व दोवेण व वाहिज्जंतस्स तस्स खवयस्स ।
ण कुणदि उवदेसादि समाधिकरणं अगीदत्थो॥443॥

सो तेण विडज्झंतो पप्पं भावस्स भेदमप्पसुदो ।
कलुणं कोलुणियं वा जायणकिविणत्तणं कुणइ॥444॥
उक्वेज्ज व सहसा वा पिएज्ज असमाहिपाणयं चावि ।
गच्छेज्ज व मिच्छत्तं मरेज्ज असमाधिमरणेण॥445॥
संथारपदोसं वा णिभच्छिज्जंतओ णिगच्छेज्जा ।
कुव्वंते उट्ठाहो णिच्चुभंते विकित्ते वा॥446॥

गीदत्थो पुण खवयस्स कुणदि विधिणा समाधिकरणाणि ।
कण्णाहुदीहिं उवढोइदो य पज्जलइ ज्झाणग्गी॥447॥

खवयस्सिच्छासंपादणोण देहपडिकम्मकरणेण ।
अण्णेहिं वा उवाएहिं सो समाहिं कुणइ तस्स॥448॥

णिज्जूढं पि य पासिय मा भीही देइ होइ आसासो ।
संधेइ समाधिं पि य वारेइ असंवुडगिरं च॥449॥

जाणदि फासुयदव्वं उवकप्पेदुं तहा उदिण्णाणं ।
जाणइ पडिकारं वादपित्तसिंभाण गीदत्थो॥450॥

अहव सुदिपाणयं से तहेव अणुससिद्धिभोयणं देइ ।
तण्हाछुहाकिलिंतो वि होदि ज्झाणे अविक्खित्तो॥451॥

गीदत्थपादमूले होंति गुणा एवमादिया बहुगा ।
ण य होइ संकिलेसो ण चावि उप्पज्जदि विवत्ती॥452॥

पंचविहं ववहारं जो जाणइ तच्चदो सवित्थारं ।
बहुसो य दिट्ठकयपठवणो ववहारवं होइ॥453॥

आगमसुद आणाधारणा य जीदेहिं हुंति ववहारा ।
एदेसिं सवित्थारा परूवणा सुत्तणिद्धिद्वा॥454॥

दव्वं खेतं कालं भावं करणपरिणाममुच्छाहं ।
संघदणं परियायं आगमपुरिसं च विण्णाय॥455॥

मोत्तूण रागदोसे ववहारं पठवेइ सो तस्स ।
ववहारकरणकुसलो जिणवयणविसारदो धीरो॥456॥

ववहारमयाणंतो ववहरणिज्जं च ववहरंतो खु ।
उस्सीयदि भवपंके अयसं कम्मं च आदियदि॥457॥

जह ण करेदि तिगिंछं वाधिस्सतिगिंछ
ववहारमयाणंतो ण सोधिकामो बिसुज्जेइ॥458॥

तम्हा णिव्विसिदव्वं ववहारवदो हु पादमूलम्मि ।
तत्थ हु विज्जा चरणं समाधिसोधी य णियमेण॥459॥

जो णिक्खवणपवेसे सेज्जासंथारउवधिसंभोगे ।
ठाणणिसेज्जागासे अगदूण विक्किंचणाहारे॥460॥
अभुज्जदचरियाए उवकारमणुत्तरं वि कुव्वंतो ।
सव्वादरसत्तीए वट्टइ परमाए भत्तीए॥461॥
इय अप्पपरिस्सममगणित्ता खवयस्स सव्वपडिचरणे ।
वट्टंतो आयरिओ पकुव्वओ णाम सो होइ॥462॥

खवओ किलामिदंगो पडिचरयगुणेण णिव्वुदिं लहइ ।
तम्हा णिव्विसिदव्वं खवएण पकुव्वयसयासे॥463॥

खवयस्स तीरपत्तस्स वि गुरुगा होति रागदोसा हु ।
तम्हा छुहादिएहिं य खवयस्स विसोत्तिया होइ॥464॥

थोणाइदूण पूव्वं तप्पडिवक्खं पुणो वि आवण्णो ।
खवओ तं तह आलोचेदुं लज्जेज्ज गारविदो॥465॥

तो सो हीलणभीरू पूयाकामो ठवेणइत्तो य ।
णिज्जूहणभीरू वि य खवओ विनदो वि णालोचे॥466॥

तस्स अवायोपायविदंसी खवयस्स ओघपण्णवओ ।
आलोचेंतस्स अणुज्जगस्स दंसेइ गुणदोसे॥467॥

दुक्खेण लहइ जीवो संसारमहण्णवम्मि सामण्णं ।
तं संजमं खु अबुहो णासेइ ससल्लमरणेण॥468॥

जह णाम दव्वसल्ले अणुद्धुदे वेदणुद्धिदो होदि ।
तह भिक्खू वि ससल्लो तिव्वदुहट्टो भयोव्विगो॥469॥

कंटकसल्लेण जहा वेधाणी चम्मखीलणाली य ।
रप्पइयजालगत्तागदो य पादो सडदि पच्छा॥470॥

एवं तु भावसल्लं लज्जागारवभएहिं पडिबद्धं ।
अप्पं पि अणुद्धरियं वदसीलगुणे वि णासेइ॥471॥

तो भट्टबोधिलाभो अणंतकालं भवण्णए भीमे ।
जम्मणमरणावत्ते जोणिसहस्साउलो भमदि॥472॥

तत्थ य कालमणंतं घोरमहावेदणासु जोणीसु ।
पच्चंतो पच्चंतो दुक्खसहस्साइ पप्पेदि॥473॥

तं न खु खमं पमादा मुहुत्तमवि अत्थिदुं ससल्लेण ।
आयरियपादमूले उद्धरिदव्वं हवदि सल्लं॥474॥

तम्हा जिणवयणरुई जाइजरामरणदुक्खवित्तत्था ।
अज्जवमद्दणसंपण्णा भयलज्जाउ मोत्तूण॥475॥

उप्पाडित्ता धीरा मूलमसेसं पुणभवलयाए ।
संवेंगजणियकरणा तरंति भवसायरमणंतं॥476॥

इय जइ दोसे य गुणे गुरु आलोयणाए दंसेइ ।
ण णियत्तइ सो तत्तो खवओ ण गुणे ण परिणमइ॥477॥

तह्मा खवएणाओपायविदंसिस्स पायमूलम्मि ।
अप्पा णिव्विसिदव्वो धुवा हु आराहणा तत्थ॥478॥

आलोचणगुणदोसे कोई सम्मं पि पण्णविज्जंतो ।
तिव्वेहिं गारवदिहिं सम्मं णालोचए खवए॥479॥

णिद्धं मधुरं हियंगमं च पल्हादणिज्जमेगंते ।
तो पल्हावेदव्वो खवओ सो पण्णवंतेण॥480॥

णिद्धं मधुरं हियंगमं च पल्हादणिज्जमेगंते ।
कोइत्तु पण्णविज्जंतओ वि णालोचेए सम्मं॥481॥

तो उप्पीलेदव्वा खवयस्सोप्पीलएण दोसा से ।
वामेइ मंसमुदरमवि गदं सीहो जह सियालं॥482॥

उज्जस्सी तेजस्सी वच्चस्सी पहिदकित्तिायारिओ ।
सीहाणुओ य भणिओ जिणेहिं उप्पीलगो णाम॥483॥

पिल्लेदूण रडंत पि जहा बालस्स मुहं विदारित्ता ।
पज्जेइ घदं माया तस्सेव हिदं विचिंतंती॥484॥

तह आयारिओ वि अणुज्जयस्स खवयस्स दोसणीहरणं ।
कुणदि हिदं से पच्छा होहिदो कडु ओसहं वत्ति॥485॥

जिभ्राए वि लिहंतो ण भद्दओ जत्थ सारणा णत्थि ।
पाएण वि ताडितो स भद्दओ जत्थ सारणा अत्थि॥486॥

सुलहा लोए आदट्टचिंतगा परहिदम्मि मुक्कधुरा ।
अ दट्टं व परट्टं चिंतता दुल्लहा लोए ॥487॥

आदट्टमेव चित्तेदुमुट्ठिदा जे परट्टमवि लोगे ।
कडुप फरुसेहिं साहेति ते हु अदिदुल्लहा लोए ॥488॥

खवयस्य जइ ण दोसे उग्गालेइ सुहमेव इदरे वा ।
ण णियत्तइ सो तत्तो खवओ ण गुणे य परिणमइ॥489॥

तह्मा गणिणा उप्पीलएण खवयस्स सव्वदो साहु ।
ते उग्गालेदव्वा तस्सेव हिदं तहा चेव॥490॥

लोहेण पीदमुदयं व जस्स आलोचिंदा अदीचारा ।
ण परिस्सवंति अण्णत्तो सो अप्परिस्सवो होदि॥491॥

दंसणणाणादिचारे वदादिचारे तवादिचारे य ।
देसच्चाए विविधे सव्वच्चाए य आवण्णो॥492॥
आयरियाणं वीसत्थदाए कहोदि सगदोसे ।
कोई पुण णिद्धम्मो अण्णसिं कहेदि ते दोसे॥493॥
तेण रहस्सं भिंदंतएण साधु तदो य परिचत्तो ।
अप्पा गणो य संघो मिच्छत्ताराधणा चेव॥494॥

लज्जाए गारवेण व कोई दोसे परस्स कहिदोवि ।
विप्परिणामिज्ज उधावेज्ज व गच्छाहि वा णिज्जा ॥495॥

कोई रहस्यभेदे कदे पदोसं गवो तमायरियं ।

उद्वावेज्ज व गच्छं भिंदेज्ज वहेज्ज पडिणीओ ॥496॥

जह धरिसिदो इमो तह अम्हं कारिज्ज धरिसरामि मोत्ति ।

सव्वो वि गणो विप्परिणसेज्ज छंडेज्ज वायरियं॥497॥

तह चेव पवयणं सव्वमेव विप्परिणयं भवे तस्य ।

तो से दिसावहारं करेज्ज णिज्जूहणं चावि॥498॥

जदि धरिसणमेरिसयं करेदि सिस्स चेव आयरिओ ।

धिद्धि अपुठुधम्मो समणोत्ति भणेज्ज मिच्छजणो ॥499॥

इच्चेवमादिदोसा ण होंति गुरुणो रहस्सधारिस्स ।

पुठ्ठेव अपुठ्ठे वा अपरिस्साइस्स धीरस्स॥500॥

संथारभत्तपाणे अमणुण्णे वा चिरं व कीरंते ।

पडिचरगपमादेण य सेहाणमसंवुडगिराहिं॥501॥

सीदुण्हछुहा तण्हाकिलामिदो तिव्वेदणाए वा ।

कुविदो हवेज्ज खवओ मेरं वा भेतुमिच्छेज्ज॥502॥

णिव्ववएण तदो से चित्तं खवयस्स णिव्वेदव्वं ।

अक्खोभेण खमाए जुत्तेण पणट्ठमाणेण॥503॥

अंगसुदे य बहुविधे णो अंगसुदे य बहुविधविभत्ते ।

रदणकरंडयभूदो खुण्णो अणिओगकरणम्मि॥504॥

वत्ता कत्ता च मुणी विचित्तसुदधारओ विचित्तकहो ।
तह य अपायविदण्हू मइसंपण्णो महाभागो॥505॥

पगदे णिस्सेसं गाहुगं च आहरणहेदुजुत्तं च ।
अणुसासेदि सुविहिदो कुविदं सण्णिव्वेमाणो॥506॥

णिद्धं मधुरं गम्भीरं मणप्पसादणकरं सवणकंतं ।
देह कह णिव्ववगो सदीसमण्णाहरणहेउं॥507॥

जह पक्खुभिदुम्मीए होदं रदणभरिदं समुद्धम्मि ।
णिज्जवओ धारेदि हु जिदकरणो बुद्धिसंपण्णो॥508॥

तह संजमगुणभरिदं परिस्सहुम्मीहिं खुभिदमाइद्धं ।
णिज्जवओ धारेदि हु महुरेहिं हिदोवदेसेहिं॥509॥

धिदिबलकरमादहिदं महुरं कण्णाहुदिं जदि ण देइ ।
सिद्धिसुहमावहंती चत्ता साराहणा होइ॥510॥

इय णिव्ववओ खवयस्स होइ णिज्जावओ सदायरिओ ।
होइ य किन्ती पधिदा एदेहिं गुणेहिं जुत्तस्स॥511॥

इय अठ्ठगुणोवेदो कसिणं आराधणं उवविधेदि ।
खवगो वि तं भयवदी, उवगूहदि जादसंवेगो॥512॥

उपसंपत्त

एवं परिमग्गित्ता णिज्जवयगुणेहिं जुत्तमायरियं ।
उवसंपज्जइ विज्जाचरणसमग्गो तगो साहू॥513॥

तियरणसव्वावासयपडिपुणं तस्स किरिय किरियम्मं ।
विणएणमंजलिकदो वाइयबसभं इमं भणदि॥ 514॥

तुज्जेत्थ बारसंगसुदपारया सवणसंघणिज्जवया ।
तुज्झं खु पादमूले सामण्णं उज्जवेज्जाम्मि॥ 515॥

पव्वज्जादी सव्वं कादूणालोयणं सुपरिसुद्धं ।
दंसणणाणचरित्ते णिस्सल्लो विहरिदुं इच्छे॥ 516॥

एवं कदे णिसग्गे तेरा सुविहिदेण वायओ भणइ ।
अणगार उत्तमठुं साधेहि तुमं अविग्घेण॥ 517॥

धण्णोसि तुमं सुविहिद एरिसओ जस्स णिच्छओ जाओ ।
संसारदुक्खमहणीं घेतुं आराहणपडायं॥ 518॥

परीक्षा

अच्छाहि ताम सुविहिद वीसत्थो मा य होहि उव्वादो ।
पडिचरएहिं समंता इणमठुं संपहरेमो॥ 519॥

तो तस्स उत्तमठे करणुच्छाहं पडिच्छदि विदण्हू ।
खीरोदणदव्वुग्गहदुगुंछणाए समाधीए॥ 520॥

प्रतिलेखन

खवयस्सुवसंपण्णस्स तस्स आराधणा अविक्खेवं ।
दिव्वेण णिमित्तेण य पडिलेहदि अप्पमत्तो सो॥ 521॥

रज्जं खेत्तं अधिवदिगणमप्पाणं च पडिलिहित्ताणं ।
गुणसाधणो पडिच्छदि अप्पडिलेहाए बहुदोसा॥ 522॥

आपृच्छा

पडिचरए आपुच्छिय तेहिं णिसिट्ठं पडिच्छदे खवयं ।
तेसिमणापुच्छाए असमाधी होज्ज तिण्हंपि॥ 523॥

प्रतीच्छन

एगो संथारगदो जजइ सरीरं जिणोवदोसेण ।
एगो सल्लिहदि मुणी उग्गेहिं तवोविहाणेहिं॥ 524॥

तदिओ णाणुण्णादो जजमाणस्स हु हवेज्ज वाघादो ।
पडिदेसु दोसु तीसु य समाधिकरणाणि हायंति॥ 525॥

तम्हा पडिचरयाणं सम्मदमेयं पडिच्छदे खवयं ।
भणदि य तं आयरिओ खवयं गच्छस्स मज्झम्मि॥ 526॥

आलोचना

फासेहि तं चरित्तं सव्वं सुहसीलयं पयहिदूण ।
सव्वं परीसहचमुं अधियासंतो धिदिबलेण॥ 527॥

सद्धे रूवे गंधे रसे य फासे य णिज्जिणाहि तुमं ।
सव्वेसु कसाएसु य णिग्गहपरमा सदा होह॥ 528॥

हंतूण कसाए इंदियाणि सव्वं च गारवं हंता ।
तो मलिदरागदोसो करेहि आलोयणासुद्धिं॥529॥

छत्तीसगुणसमण्णागदेण वि अवस्समेव कायव्वा ।
परसक्खिया विसोधी सुट्ठुवि ववहारकुसलेण॥530॥

आयारवमादीया अट्ठगुणा दसविधो य ठिदिकप्पो ।
बारस तव छावासय छत्तीसगुणा मुणेयव्वा॥531॥

सव्वे वि तिण्णसंगा तित्थयरा केवली अणंतजिणा ।
छदुमत्थस्स विसोधिं दिसंति ते वि य सदा गुरुसयासे॥532॥

जह सुकुसलो वि वेज्जो अण्णस्स कहेदि आदुरो रोगं ।
वेज्जस्स तस्स सोच्चा सो वि य पडिकम्ममारभइ॥533॥

एवं जाणंतेण वि पायच्छित्तविधिमप्पणो सव्वं ।
कादव्वादपरविसोधणाए परसक्खिगा सोधी॥534॥

तम्हा पव्वज्जादी दंसणणाणचरणादिचारो जो ।
तं सव्वं आलोचेहि णिरवसेसं पणिहिदप्पा॥535॥

काइयवाइयमाणसियसेवणा दुप्पओगसंभूया ।
जइ अत्थि अदीचारं तं आलोचेहि णिस्सेसं॥536॥

अमुगंमि इदो काले देसे अमुगत्थ अमुगभावेण ।
जं जह णिसेविदं तं जेण य सह सव्वमालोचे॥537॥

आलोयणा हु दुविहा ओघेण य होदि पदविभागी य ।

ओघेण मूलपत्तस्स पयविभागी य इदरस्स॥538॥

ओघेणालोचेदि हु अपरिमिदवराधसव्वघादी वा ।

अज्जोपाए इत्थं सामण्णमहं खु तुच्छोत्ति॥539॥

पव्वज्जादी सव्वं कमेण जं जत्थ जेण भावेण ।

पडिसेविदं तहा तं आलोचिंतो पदविभागी॥540॥

जह कंटएण विद्धो सव्वंगो वेदणुद्धो दो होदि ।

तहि दु समुट्ठिदे सो णिस्सल्लो णिव्वुदो होदि॥541॥

एवमणुद्धुददोसो माइल्लो तेण दुक्खिदो होइ ।

सो चेव वंददोसो सुविसुद्धो णिव्वुदो होइ॥542॥

मिच्छादंसणसल्लं मायासल्लं णिदाणसल्लं च ।

अहवा सल्लं दुविहं दव्वे भावे य बोधव्वं॥543॥

तिविहं तु भावसल्लं दंसणणाणे चरित्तजोगे य ।

सच्चित्ते य अचित्ते य मिस्सगे वा वि दव्वम्मि॥544॥

एगमवि भावसल्लं अणुद्धरित्ताण जो कुणइ कालं ।

लज्जाए गारवेण य ण सो हु आराधओ होदि॥545॥

कल्ले परे व परदो काहं दंसणचरित्तसोधित्ति ।

इय संकप्पमदीया गयं पि कालं ण याणंति॥546॥

रागद्वोसाभिहदा ससल्लमरणं मरंति जे मूढा ।
ते दुक्खसल्लबहुले भमंति संसारकांतरे ॥ 547 ॥

तिविहं पि भावसल्लं समुद्धरित्ताण जो कुणदि कालं ।
पव्वज्जादी सव्वं स होइ आराधओ मरणे ॥ 548 ॥

जे गारवेहिं रहिदा णिस्सल्ला दंसणे चरित्ते य ।
विहरंति मुत्तसंगा खवंति ते सव्वदुक्खाणि ॥ 549 ॥

तं एवं जाणंतो महंतयं लाभयं सुविहिदाणं ।
दंसणचरित्तसुद्धो णिस्सल्लो विहर तो धीर ॥ 550 ॥

तम्हा सतूलमूलं अविछूढमविप्पुदं अणुंविग्गो ।
णिम्मोहियमणिगूढं सम्मं आलोचए सव्वं ॥ 551 ॥

जह बालो जंपंतो कज्जमकज्जं व उज्जुअं भणइ ।
तह आलोचेदव्वं मायामोसं च मोत्तूणं ॥ 552 ॥

दंसणणाणचरित्ते कादूणालोचणं सुपरिसुद्धं ।
णिस्सल्लो कदसुद्धी कमेण सल्लेहणं कुणसु ॥ 553 ॥

तो सो एवं भणिओ अब्भुज्जदमरणणिच्छिदमदीओ ।
सव्वंगजादहासो पीदीए पुलइदसरीरो ॥ 554 ॥

पाचीणोदीचिमुहो चेदियहुत्तो व कुणदि एगंते ।
आलोयणपत्तीयं काउस्सगं अणाबाधे ॥ 555 ॥

एवं खु वोसरित्ता देहे वि उवेदि णिम्मत्तं सो ।
णिम्ममदा णिस्संगो णिस्सल्लो जाइ एयत्तं॥556॥

तो एयत्तमुवगदो सरेदि सव्वे कदे सगे दोसे ।
आयरियपादमूले उप्पाडिस्सामि सल्लत्ति॥557॥

इय उजुभावमुपगदो सव्वे दोसे सरित्तु तिक्खुत्तो ।
लेस्साहिं विसुज्झंतो उवेदि सल्लं समुद्धरिदुं॥558॥

आलोयणादिया पुण होइ पसत्थे य सुद्धभावस्स ।
पुव्वण्हे अवरण्हे व सोमतिहिरक्खवेलाए॥559॥

णिप्पत्तकंटइल्लं विज्जुहदं सुक्खरुक्खकडुदद्धं ।
सुण्णधरुद्धदेउल - पत्थररासिट्टियापुंजं॥560॥
तणपत्तकट्टुछारिय असुइ सुसाणं च भग्गपडिदं वा ।
रुद्धाणं खुद्धाणं अधिउत्ताणं च ठाणाणि॥561॥
अण्णं व एवमादी य अप्पसत्थं हवेज्ज जं ठाणं ।
आलोचणं ण पडिच्छदि तत्थ गणी से अविग्घत्थं॥562॥

अरहंतसिद्धसागरपउमसरं खीरपुप्फफलभरियं ।
उज्जाणभवणतोरणपासादं णागजक्खघरं॥563॥

अण्णं च एवमादिय सुपसत्थं हवइ जं ठाणं ।
आलोयणं पडिच्छदि तत्थ गणी से अविग्घत्थं॥564॥

पाचीणोदीचिमुहो आयदणमुहो व सुहणिसण्णो हु ।
आलोयणं पडिच्छदि एक्को एक्कस्स विरहम्मि॥565॥

काऊण य किरियम्मं पडिलेहणमंजलीकरणसुद्धो ।
आलोएदि सुविहिदो सव्वे दोसे पमोत्तूणं॥566॥

अवलोकन

आकम्पिय अणुमाणि य जं दिट्ठं बादरं च सुहुमं च ।
छण्णं सद्दाउलयं बहुजण, अव्वत्त तस्सेवी॥567॥

भत्तेण व पाणेण व उवकरणेण किरियकम्मकरणेण ।
अणुकंपेऊण गणिं करेइ आलोयणं कोइ॥568॥

आलोइदं असेसं होहिदि काहिदि अणुग्गहमिमोत्ति ।
इय आलोचंतस्स हु पढमो आलोयणादोसो॥569॥

केदूण विसं पुरिसो पिएज्ज जह कोइ जीविदत्थीओ ।
मण्णंतो हिदमहिदं तधिमा सल्लुद्धरणसोधी॥570॥

वण्णरसगंधजुत्तं किंपाकफलं जहा दुहविवागं ।
पच्छा णिच्छयकडुयं तधिमा सल्लुद्धरणसोधी॥571॥

किमिरागकंबलस्स व सोधी जदुरागवत्थसोधीव ।
अवि सा हवेज्ज किह इण तधिमा सल्लुद्धरणसोधी॥572॥

धीरपुरिसचिण्णाइं पवददि अतिधम्मिओ व सव्वाइं ।

धण्णा ते भगवंता कुव्वंति तवं विकट्टं जे॥573॥

थामापहारपासत्थदाए सुहसीलदाए देहेसु ।

वददि णिहीणो हु अहं जं ण समत्थो अणसणस्स॥574॥

जाणह य मज्झ थामं अंगाणं दुब्बलदा अणारोगं ।

णेव समत्थोमि अहं तवं विकट्टं पि कादुं जे॥575॥

आलोचेमि य सव्वं जइ मे पच्छा अणुग्गहं कुणह ।

तुज्झ सिरीए इच्छं सोधी जह णिच्छरेज्जामि॥576॥

अणुमाणेदूण गुरुं एवं आलोचणं तदो पच्छा ।

कुणइ ससल्लो सो से विदिओ आलोचना दोसो॥577॥

गुणकारिओत्ति भुंजइ जहा सुहत्थी अपत्थमाहारं ।

पच्छा विवायकडुगं तधिमा सल्लद्धरणसोधी॥578॥

जं होदि अण्णदिट्ठं तं आलोचेदि गुरुसयासम्मि ।

अद्धिट्ठं गूहंतो मायिल्लो होदि णायव्वो॥579॥

दिट्ठं व अदिट्ठं वा जदि ण कहेइ परमेण विणएण ।

आयरियपायमूले तदिओ आलोयणादोसो॥580॥

जह वालुयाए अवडो पूरदि उक्कीरमाणओ चेव ।

तह कम्मादाणकरी इमा हु सल्लुद्धरणसुद्धी॥581॥

बादरमालोचेंतो जत्तो जत्तो वदाओ पडिभग्गो ।

सुहुमं पच्छादेंतो जिणवयणपरंमुहो होइ॥582॥

सुहुमं व बादरं व जइ ण कहेज्ज विणएण सुगुरूणं ।
आलोचनाए दोसो एसो हु चउत्थओ होदि॥583॥

जह कंसियभिंजारो अंतो णीलमइलो बहिं चोक्खो ।
अंतो ससल्लदोसा तधिमा सल्लुद्धरणसोधी॥584॥

चंकमणे य ठ्ठाणे णिसेज्जउवट्टणे य सयणे य ।
उल्लामाससरक्खे य गत्थिणी बालवत्थाए॥585॥

इय जो दोसं लहुगं समालोचेदि गूहदे थूलं ।
भयमयमायाहिदओ जिणवयणपरंमुहो होदि॥586॥

सुहुमं व बादरं वा जइ ण कहेज्ज विणएण स गुरूणं ।
आलोयणाए दोसो पंचमओ गुरुसयासे से॥587॥

रसपीदयं व कडयं अहवा कवडुक्कडं जहा कडयं ।
अहवा जदुपूरिदयं तधिमा सल्लुद्धरणसोधी॥588॥

जदि मूलगुणे उत्तरगुणे य कस्सइ विराहणा होज्ज ।
पढमे विदिए तदिए चउत्थए पंचमे च वदे॥589॥

को तस्स दिज्जइ तवो केण उवाएण वा हवदि सुद्धो ।
इय पच्छणं पुच्छदि पायच्छित्तं करिस्सत्ति॥590॥

इय पच्छणं पुच्छिय साधू जो कुणइ अप्पणो सुद्धिं ।
तो सो जिणेहिं वुत्तो छट्ठो आलोयणा दोसो॥591॥

धादोहवेज्ज अण्णो जदि अण्णम्मि जिमिदम्मि संतम्मि ।
तो परववदेसकदा सोधी अण्णं विसोधिज्ज ॥ 592 ॥

तवसंजमम्मि अण्णेण कदे जदि सुग्गदिं लहदि अण्णो ।
तो परववदेसकदा सोधी सोधिज्ज अण्णं पि ॥ 593 ॥

मयतण्हादो उदयं इच्छइ चंदपरिवेसणा कूरं ।
जो सो इच्छइ सोधी अकहंतो अप्पणो दोसे ॥ 594 ॥

पक्खिय चाउम्मासिय संवच्छरिएसु सोधिकालेसु ।
बहुजणसद्दाउलए कहेदि दोसे जहिच्छाए ॥ 595 ॥

तो दोसे कहेइ सगुरूणं ।
आलोचनाए दोसो सत्तमओ सो गुरुसयासे ॥ 596 ॥

अरहट्टघडीसरिसी अहवा चुंदछुदोवमा होइ ।
भिण्णघडसरिच्छा वा इमा हु सल्लुद्धरणसोधी ॥ 597 ॥

आयरियपादमूले हु उवगदो वंदिरुण तिविहेण ।
कोई आलोचेज्ज हु सव्वे दोसे जहावत्ते ॥ 598 ॥
तो दंसणचरणाधारएहिं सुत्तत्थमुव्वहंतेहिं ।
पवयणकुसलेहिं जहारिहं तवो तेहिं से दिण्णो ॥ 599 ॥

णवमम्मि य जं पुव्वे भणिदं कप्पे तहेव ववहारो ।
अंगेसु सेसएसु य पइण्णए चावि तं दिण्णं ॥ 600 ॥
तेसिं असद्वहंतो आइरियाणं पुणो वि अण्णाणं ।
जइ पुच्छइ सो आलोयणाए दोसो हु अट्टमओ ॥ 601 ॥

पगुणो वणो ससल्लं जध पच्छा आदुरं ण तावेदि ।
बहुवेदणाहिं बहुसो तधिमा सल्लुद्धरणसोधी॥602॥

आगमदो जो बालो परियाएण व हवेज्ज जो बालो ।
तस्स सगं दुच्चरियं आलोचेदूण बालमदी॥603॥

आलोचिदं असेसं सव्वं एदं मएत्ति जाणादि ।
बालस्सलोचेंतो णवमो आलोचना दोसो॥604॥

कूडहिरण्णं जह णिच्छएण दुज्जणकदा जहा मेत्ती ।
पच्छा होदि अपत्थं तधिमा सल्लुद्धरणसोधी॥605॥

पासत्थो पासत्थस्स अणुगदो दुक्कडं परिकहेइ ।
एसो वि मज्झसरिसो सव्वत्थवि दोससंचइओ॥606॥

जाणादि मज्झ एसो सुहसीलत्तं च सव्वदोसे य ।
तो एस मे ण दाहिदि पायच्छित्तं महल्लित्ति॥607॥

आलोचिदं असेसं सव्वं एदं मएत्ति जाणादि ।
सो पवयणपडिकुद्धो दसमो आलोचना दोसो॥608॥

जह कोइ लोहिदकयं वत्थं धोवेज्ज लोहिदेणेव ।
ण य तं होदि विसुद्धं तधिमा सल्लुद्धरणसोधी॥609॥

पवयणणिण्हवयाणं जह दुक्कडपावयं करेंताणं ।
सिद्धिगमणमइदूरं तधिमा सल्लुद्धरणसोधी॥610॥

सो दस वि तदो दोसे भयमायामोसमाणलज्जाओ ।
णिज्जूहिय संसुद्धो करेदि आलोयणं विधिणा॥611॥

णट्टचलवलियगिहिभासमूगदद्दुरसरं च मोत्तूण ।
आलोचेदि विणीदो सम्मं गुरुणो अहिमुहत्थो॥612॥

पुढविदगागणिपवणे य बीयपत्तेयणंतकाए य ।
विगतिगचदुपंचिदियसत्तारम्भे अणेयविहे॥613॥
पिंडोवधिसेज्जाए गिहिमत्तणिसेज्जवाकुसे लिंगे ।
तेणिवक्कराइभत्ते मेहूणपरिग्गहे मोसे॥614॥

णाणे दंसणतववीरिये य मणवयणकायजोगेहिं ।
कदकारिदेणुमोदे आदपरपओगकरणे य॥615॥

अद्धाण रोहगे जणवए य रादो दिवा सिवे ऊमे ।
दप्पादिसमावण्णे उद्धरदि कमं अभिंदंतो॥616॥

दप्पपमादआणाभोगआपगा आदुरे य तित्तिणिदा ।
संकिदसहसाकारे य भयपदोसे य मीमंसं॥617॥

अण्णाणणेहगारव अणप्पवसअलस उपधि सुमिणंते ।
पलिकुंचणं संसोधी करेंति वीसंतवे भेदे॥618॥

इय पयविभागियाए व ओधियाए व सल्लमुद्धरियं ।
सव्वगुणसोधिकखी गुरूवएसं समायरइ॥619॥

कदपावो वि मणुस्सो आलोयणणिंदओ1 गुरुसयासे ।
होदि अचिरेण लहुओ उरुहिय2भारोव्व भारवहो॥620॥

सुबहुस्सुदा विसंता जे मूढा सीलसंजमगुणेसु ।
ण उवेंति भावसुद्धिं ते दुक्खणिहेलणा होंति॥621॥

आलीयणं सुणित्ता तिकखुत्तो भिक्खुणो उवायेण ।
जदि उज्जुगोत्ति णिज्जइ जहाकदं पट्टवेदव्वं॥622॥

आदुरसल्ले मोसे मालागरराय कज्ज तिकखुत्तो ।
आलीयणाए वक्काए उज्जुगाए य आहरणे॥623॥

पडिसेवणातिचारे जदि णो जंपदि जधाकमं सव्वे ।
ण करेति तदो सुद्धिं आगमववहारिणो तस्स॥624॥

एत्थ दु उज्जुगभावा ववहरिदव्वा भवन्ति ते पुरिसा ।
संका परिहरिदव्वा सो से पट्टाहि जहि विसुद्धा॥625॥

पडिसेवणादिचारे जदि आजंपदि जहाकमं सव्वे ।
कुव्वन्ति तहो सोधिं आगमववहारिणो तस्स॥626॥

सम्मं खवणालोचिदम्मि छेदसुदजाणग गणी से ।
तो आगममीमंसं करेदि सुत्ते य अत्थे य॥627॥

पडिसेवादो हाणी वट्ठी वा होइ पावकम्मस्स ।
परिणामेण दु जीवस्स तत्थ तिव्वा व मंदा वा॥628॥

सावज्जसंकिलिट्ठो गालेइ गुणे णवं च आदियदि ।
पुव्वकदं व दढं सो दुग्गदिभवबंधणं कुणदि॥629॥

पडिसेवित्ता कोई पच्छत्तावेण डज्झमाणमणो ।
संव्वेगजणिदकरणो देसं घाएज्ज सव्वं वा॥630॥

तो णच्चा सुत्तविदू णालियधमगो व तस्स परिणामं ।
जावदिण विमुज्झदि तावदियं देदि जिदकरणो॥631॥

आउव्वेदसमत्ती तिगिंछिदे मदिविसारदो वेज्जा ।
रोगादंकाभिहदं जह-णिरुजं आदुरं कुणइ॥632॥

एवं पवयणसारसुयपारगो सो चरित्तसोधीए ।
पायच्छित्तविदण्हू कुणइ विमुद्धं तयं खवयं॥633॥

एदारिसंमि थेरे असदि गणत्थे तहा उवज्झाए ।
होदि पवत्ती थेरो गणधरवसहो य जदणाए॥634॥

सो कदसामाचारी सोज्झं कट्टं विधिणा गुरुसयासे ।
विहरदि सुविसुद्धप्पा अभुज्जदचरणगुणं करवी॥635॥

एवं वासारत्ते फासेदूण विविधं तवोकम्मं ।
संथारं पडिवज्जदि हेमंते सुहविहारम्मि॥636॥

सव्वपरियाइयगस्सय पडिक्कमित्तु गुरुणो णिओगेण ।
सव्वं समारुहित्ता गुणसंभारं पविहरिज्ज॥637॥

शैय्या

गंधव्वणट्टजट्टस्सचक्कजंतगिकम्मफरुसे य ।
णत्तियरजया पाडहिडोंवणडरायमग्गे य॥638॥

चारणकोट्टगकल्लालकरकचे पुप्फदयसमीपे य ।
एवंविधवसधीए होज्ज समाधीए वाधादो॥639॥

पंचेंदियप्पयारो मणसंखोभकरणो जहिं णत्थि ।
चिट्ठदि तहिं तिगुत्तो ज्झाणेण सुहप्पवत्तेण॥640॥

उग्गमउप्पादणएसणाविसुद्धाए अकिरियाए हु ।
वसइ असंसत्ताए णिप्पाहुडियाए सेज्जाए॥641॥

सुहणिकखवणपवेसणघणाओ अवियडअणंधयाराओ ।
दो तिण्णि वि सालाओ घेतत्त्वावो विसालाओ॥642॥

घणकुट्टे सकवाडे गामबहिं बालवुह्मगणजोग्गे ।
उज्जाणघरे गिरिकंदरे गुहाए व सुण्णहरे॥643॥

आगंतुघरादीसु वि कडएहिं य चिलिमिलीहिं कायव्वो ।
खवयस्सोच्छागारो धम्मसवणमंडवादी य॥644॥

संस्तर

पुढवीसिलामओ वा फलयमओ तणमओ य संथारो ।
होदि समाधिणिमित्तं उत्तरसिर तहव पुव्वसिरो॥645॥

अघसे समे असुसिरे अहिसुअविले य अप्पपाणे य ।
असिणिद्धे घणगुत्ते उज्जोवे भूमिसंथारो॥646॥

विद्धत्थो य अफुडिदो णिक्कंपो सव्वदो असंसत्तो ।
समपट्ठो उज्जोवे सिलामओ होदि संथारो॥647॥

भूमिसमरुंदलहुओ अकुडिल एगंगि अप्पपाणो य ।
अच्छिद्दो य अफुडिदो लण्हो वि य फलयसंथारो॥648॥

णिस्संधी य अपोल्लो णिरुवहदो समधिवास्सणिज्जंतु ।
सुहपडिलेहो मउओ तणसंथारो हवे चरिमो॥649॥

जुत्तो पमाणरइओ उभयकालपडिलेहणासुद्धो ।
विधिविहितो संथारो आरोहव्वो तिगुत्तेण॥650॥

णिसिदिता अप्पाणं सव्वगुणसमण्णिदंमि णिज्जवए ।
संथारम्मि णिसण्णो विहरदि सल्लेहणा विधिणा॥651॥

निर्यापक

पियधम्मा दढधम्मा संवेगावज्जभीरुणो धीरा ।
छंदण्हू पच्चइया पच्चक्खाणम्मि य विदण्हू॥652॥

कप्पाकप्पे कुसला समाधिकरणुज्जदा सुदरहस्सा ।
गीदत्था भयवंता अडदालीसं तु णिज्जवया॥653॥

आमासणपरिमासणचंकमणासयण णिसीदणे ठाणे ।
उव्वत्तणपरियत्तणपसारणा उंटणादीसु॥654॥

संजदकमेण खवयस्स देहकिरियासु णिच्चमाउत्ता ।
चदुरो समाधिकामा ओलग्गंता पडिचरंति॥655॥

भत्तित्थिराजजणवदकंदप्पत्थणडणट्टियकहाओ ।
वज्जित्ता विकहाओ अज्झप्पविराधणकरीओ॥656॥

अखलिदममिडिदमव्वाइठ्ठमणुच्चमविलंविदममंदं ।
कंतममिच्छामेलिदमणत्थहीणं अपुणरुत्तं॥657॥

णिद्धं मधुरं ह्रियंगमं च पल्हादणिज्ज पत्थं च ।
चत्तारि जणा धम्मं कहंति णिच्चं विचित्तकहा॥658॥

खवयस्स कहेदव्वा दु सा कहा जं सुणित्तु सो खवओ ।
जहिदविसोत्तिगभावं गच्छदि संवेगणिव्वेगं॥659॥

आक्खेवणी य संवेगणी य णिव्वेयणी य खवयस्स ।
पावोग्गा होंति कहा ण कहा विक्खेवणी जोग्गा॥660॥

आक्खेवणी कहा सा विज्जाचरणमुवदिस्सदे जत्थ ।
ससभयपरसमयगदा कथा दु विक्खेवणी णाम॥661॥

संवेयणी पुण कहा णाणचरित्तं तववीरिय इह्मिगदा ।
णिव्वेयणी पुण कहा सरीरभोगे भवोघे ये॥662॥

विक्खेवणी अणुरदस्स आउगं जदि हवेज्ज पक्खीणं ।
होज्ज असमाधिमरणं अप्पागमियस्स खवगस्स॥663॥

आगममाहप्पगओ विकहा विक्खेवणी अपाउग्गा ।
अभुज्जदम्मि मरणे तस्स वि एदं अणायदणं॥664॥

अभुज्जदंमि मरणे संथारत्थस्स चरमवेलाए ।
तिविहं पि कहंति कहं तिदंडपरिमोडया तम्हा॥665॥

जुत्तस्स तवधुराए अभुज्जदमरणवेणुसीसंमि ।
तह ते कहेंति धीरा जह सो आराहओ होदि॥666॥

चत्तारि जणा भत्तं उवकप्पेति अगिलाए पाओग्गं ।
छंदियमवगददोसं अमाइणो लद्धिसंपण्णा॥667॥

चत्तारि जणा पाणयमुवकप्पंति अगिलाए पाओग्गं ।
छंदियमवगददोसं अमाइणो लद्धिसंपण्णा॥668॥

चत्तारि जणा रक्खंति दवियमुवकप्पियं तयं तेहिं ।
अगिलाए अप्पमत्ता खवयस्स समाधिमिच्छंति॥669॥

काइयमादी सव्वं चत्तारि पदिट्ठवंति खवयस्स ।
पडिलेहंति य उवधीकाले सेज्जुवधिसंथारं॥670॥

खवयस्स घरदुवारं सारक्खंति जणा चत्तारि ।
चत्तारि समोसरणदुवारं रक्खंति जदणाए॥671॥

जिदणिद्दा तल्लिच्छा रादौ जग्गंति तह य चत्तारि ।
चत्तारि गवेसंति खु खेत्ते देसप्पवत्तीओ॥672॥

वाहिं असद्दवडियं कहंति चउरो चदुव्विधकहाओ ।
ससमयपरसमयविदू परिसाए सा समोसदाए खु॥673॥

वादी चत्तारि जणा सीहाणुग तह अणेयसत्थविदू ।
धम्मकहयाण रक्खाहेदुं विहरंति परिसाए॥674॥

एवं महाणुभावा पग्गाहिदाए समाधिजदणाए ।
तं णिज्जवंति खवयं अडयालीसं हि णिज्जवया॥675॥

जो जारिसओ कालो भरदेरवदेसु होइ वासेसु ।
ते तारिसया तदिया चोद्दालीसं पि णिज्जवया॥676॥

एवं चदुरो चदुरो परिहावेदव्वगा य जदणाए ।
कालम्मि संकिलिट्ठंमि जाव चत्तारि सार्धेति॥677॥

णिज्जावया य दोण्णि वि होति जहण्णेण काल-संसयणा ।
एक्को णिज्जावयओ ण होइ कइया वि जिणसुत्ते॥678॥

कालाणुसारिणो दो भरहेरावदभवा जहण्णेण ।
णिज्जावया य जइणो घेतव्वा गुणमहल्ला दु ॥679॥

एगो जइ णिज्जवओ अप्पा चत्तो परोपवयणं च ।
वसणमसमाधिमरणं उड्डाहो दुग्गदी चावि॥680॥

खवगपडिजग्गणाए भिक्खग्गहणादिमकुणमाणेण ।
अप्पा चत्तो तव्विवरीदो खवगो हवदि चत्तो॥681॥

खवयस्स अप्पणो वा चाए चत्तो हु होइ जइधम्मो ।
णाणस्स य उच्छेदो पवयणचाओ कओ होदि॥682॥

चायम्मि कीरमाणे वसणं खवयस्स अप्पणो चावि ।
खवयस्स अप्पणो वा चायम्मि हवेज्ज असमाधि॥683॥

सेवेज्ज वा अकप्पं कुज्जा वा जायणाइ उड्डाहं ।
तण्हाछुधादिभग्गो खवओ सुण्णम्मि णिज्जवए॥684॥

असमाधिणा व कालं करिज्ज सो सुण्णगम्मि णिज्जवगे ।
गच्छेज्ज तओ खवओ दुग्गदिमसमाधिमरणेण॥685॥

सल्लेहणं सुणिता जुत्ताचारेण णिज्जवेज्जंतं ।
सव्वेहिं वि गंतव्वं जदीहिं इदरत्थ भयणिज्जं॥686॥

सल्लेहणाए मूलं जो वच्चइ तिव्वभत्तिराएण ।
भोत्तूण य देवसुहं सो पावदि उत्तमं ठाणं॥687॥

एगम्मि भवग्गहणे समाधिमरणेण जो मदो जीवो ।
ण हु सो हिंडदि बहुसो सत्तठ्ठभवे पमोत्तूण॥688॥

सोदूण उत्तमट्ठस्स साधणं तिव्वभत्तिसंजुत्तो ।
जदि णोवयादि का उत्तमट्ठमरणम्मि से भत्ती॥689॥

जस्स पुण उत्तमट्ठमरणम्मि भत्ती ण विज्जदे तस्स ।
किह उत्तमट्ठमरणं संपज्जदि मरणकालम्मि॥690॥

सद्दवदीणं पासं अल्लियदु असंवुडाण दादव्वं ।
तेसिं असंवुडगिराहिं होज्ज खवयस्स असमाधी॥691॥

भत्तादीणं तत्ती गीदत्थेहिं वि ण तत्थ कादव्वा ।
आलोयण वि हु पसत्थमेव कादव्विया तत्थ॥692॥

पच्चक्खाणपडिक्कमणोवदेसणिवओगतिविहवोसरणे ।
पट्ठवणापुच्छाए उवसंपण्णो पमाणं से॥693॥

तेल्लकसायादीहिं य बहुसो गंडूसया दु घेतव्वा ।
जिभाकण्णाण बलं होहिदि तुण्डं च से विसदं॥694॥

प्रकाशन

दव्वपयासमकिच्चा जइ कीरइ तस्स तिविहवोसरणं ।
कह्मिवि भत्तविसेसंमि उस्सुगो होज्ज सो खवओ॥695॥

तह्मा तिविहं वोसरिहिदित्ति उक्कस्सयाणि दव्वाणि ।
सोसित्ता पविआसि चरिमाहारं पयासेज्ज॥696॥

पासित्तु कोइ तादी तीरं पत्तस्सिमेहिं किं मेत्ति ।
वेरग्गमणुप्पत्तो संवेगपरायणो होदि॥697॥

आसादित्ता कोई तीरं पत्तस्सिमेहिं किं मेत्ति ।
वेरग्गमणुप्पत्तो संवेगपरायणो होदि॥698॥

देसं भोच्चा हा हा तीरं पत्तस्सिमेहिं किं मेत्ति ।
वेरग्गमणुप्पत्तो संवेगपरायणो होदि॥699॥

सव्वं भोच्चा धिद्धी तीरं पत्तस्सिमेहिं किं मेत्ति ।
वेरग्गमणुप्पत्तो संवेगपरायणो होदि ॥700॥

आहार की हानि

कोई तमादयित्ता मणुण्णरसवेदणाए संगिवद्धो ।

तं चेवणुबंधेज्ज हु सव्वं देसं च गिद्धीए॥701॥

तत्थ अवाओवायं दंसेदि विसेसदो उवदिसंतो ।

उद्धरिदु मणोसल्लं सुहुमं सण्णिव्वेमाणो॥702॥

सुच्चा सल्लमणत्थं उद्धरदि असेसमप्पमादेण ।

वेरग्गमणुप्पत्तो संवेगपरायणो खवओ॥703॥

अणुसज्जमाणए पुण समाधिकामस्स सव्वमुवहरिय ।

एक्केक्कं हावेंतो ठवेदि पोराणमाहारे॥704॥

अणुपुव्वेण य ठविदे संवट्टेदूण सव्वमाहारं ।

पाणयपरिक्कमेण दु पच्छा भावेदि अप्पाणं॥705॥

प्रत्याख्यान

सच्छं बहलं लेवडमलेवडं च ससित्थयमसित्थं ।

छव्विहपाणयमेयं पाणयपरिकम्मपाओग्गं॥706॥

आयंबिलेण सिंभं खीयदि पित्तं च उवसमं जादि ।

वादस्स रक्खणठ्ठं एत्थ पयत्तं खु कादव्वं॥707॥

तो पाणएण परिभाविदस्स उदरमलसोधणित्थाए ।

मधुरं पज्जेदव्वो मंदं च विरेयणं खवओ॥708॥

आणाहवत्तियादीहिं वा वि कादव्वमुदरसोधणयं ।

वेदणमुप्पादेज्ज हु करिसं अच्छंतयं उदरे॥709॥

जावज्जीवं सव्वाहारं तिविहं च वोसरिहिदित्ति ।
णिज्जवओ आयरिओ संघस्स णिवेदणं कुज्जा॥ 710॥

खामेदि तुह्म खवओत्ति कुंचओ तस्स चेव खवगस्स ।
दावेदव्वो णेदूण सव्वसंघस्स वसधीसु॥ 711॥

आराधणपत्तीयं खवयस्स व णिरुवसग्गपत्तीयं ।
काओसग्गो संघेण होइ सव्वेण कादव्वो॥ 712॥

खवयं पच्चक्खावेदि तदो सव्वं च चदुविधाहारं ।
संघसमवायमज्झे सागारं गुरुणिओगेण॥ 713॥

अहवा समाधिहेदुं कायव्वो पाणयस्स आहारो ।
तो पाणयंपि पच्छा वोसरिदव्वं जहाकाले॥ 714॥

जं पाणयपरियम्ममि पाणयं छव्विहं समक्खादं ।
तं से ताहे कप्पदि तिविहाहारस्स वोसरणे॥ 715॥

क्षामण

तो आयरियउवज्झायसिस्ससाधम्मिगे कुलगणे य ।
जो होज्जकसाओ स सव्वं तिविहेण खामेदि॥ 716॥

अब्भहिदजादहासो मत्थम्मि कदंजली कदपणामो ।
खामेइ सव्वसंघं संवेगं संजणेमाणो॥ 717॥

मणवयणकायजोगेहिं पुरा-कदकारिदे अणुमदे वा ।
सव्वे अवराधपदे एस खमावेमि णिस्सल्लो॥ 718॥

अम्मापिदुसरिसो मे खमहु खु जगसीयलो जगाधारो ।
अहमवि खमामि सुद्धो गुणसंघायस्स संघस्स ॥ 719 ॥

क्षपण

संघो गुणसंघाओ संघो य विमोचओ य कम्माणं ।
दंसणणाणचरित्ते संघायंतो हवे संघो ॥ 720 ॥

इय खामिय वेरग्गं अणुत्तरं तवसमाधिमारूढो ।
पप्फोडंतो विहरदि बहुभवबाधाकरं कम्मं ॥ 721 ॥

वट्टति अपरिदंता दिवा य रादो य सव्वपरियम्मे ।
पडिचरया गुणहरया कम्मरयं णिज्जरेमाणा ॥ 722 ॥

जं बद्धमसंखेज्जाहिं रयं भवसदसहस्सकोडीहिं ।
सम्मत्तुप्पत्तीए खवेइ तं एयसमयेण ॥ 723 ॥

एयसमएण विधुणदि उवउत्तो बहुभवज्जियं कम्मं ।
अण्णयरम्मि य जोग्गे पच्चक्खाणे विसेसेण ॥ 724 ॥

एवं पडिक्कमणाए काओसग्गे य विणयसज्झाए ।
अणुपेहासु य जुत्तो संथारगओ धुणदि कम्मं ॥ 725 ॥

अनुशिष्टि

णिज्जवया आयरिया संथारत्थस्स दिति अणुसिट्ठिं ।
संवेगं णिव्वेगं जणंतयं कण्णजावं से ॥ 726 ॥

णिस्सल्लो कदसुद्धी विज्जावच्चकरवसधिसंधारं ।
उवधिं च सोधइत्ता सल्लेहण भो कुण इदाणि॥727॥

मिच्छत्तस्स य वमणं सम्मत्ते भावणा परा भत्ती ।
भावणमोक्काररदिं णाणुवजुत्ता सदा कुणदु॥728॥

पंचमहव्वयरक्खा कोहचउक्कस्स णिग्गहं परमं ।
दुद्धंतिदियविजयं दुविहतवे उज्जमं कुणदि॥729॥

संसारमूलहेदुं मिच्छत्तं सव्वधा विवज्जेहि ।
बुद्धिं गुणणिदं पि हु मिच्छत्तं मोहिदं कुणदि॥730॥

परिहर तं मिच्छत्तं सम्मताराहणाए दढचित्तो ।
होदि णमोक्कारम्मि य णाणे वदभावणासु धिया॥731॥

मयतण्हियाओ उदयत्ति मया मण्णंति जह सतण्हयगा ।
सभूदंति असभूदं तध मण्णंति मोहेण॥732॥

मिच्छत्तमोहणादो धत्तूरयमोहणं वरं होदि ।
वहेदि जम्ममरणं दंसणमोहो दु ण दु इदरं॥733॥

जीवो अणादिकालं पयत्तमिच्छत्तभाविदो संतो ।
ण रमेज्ज हु सम्मत्ते एत्थ पयत्तं ख कादव्वं॥734॥

अग्गिविसकिण्हसप्पादियाणि दोसं ण तं करेज्जण्हू ।
जं कुणदि महादोसं तिव्वं जीवस्स मिच्छत्तं॥735॥

अग्निविसकिण्हसप्पादियाणि दोसं करंति एयभवे ।
मिच्छत्तं पुण दोसं करेदि भवकोडिकोडीसु॥ 736॥

मिच्छत्तसल्लविद्धा तिच्चाओ वेदणाओ वेदंति ।
विसलित्तकंडविद्धा जह पुरिसा णिप्पडीकारा॥ 737॥

अच्छीणि संघसिरिणो मिच्छत्तणिकाचणेण पडिदाइं ।
कालगदो वि य संतो जादो सो दीहसंसारे॥ 738॥

कडुगम्मि अणिव्वलिदम्मि दुद्धिए कडुगमेव जह खीरं ।
होदि णिहिदं तु णिव्वलियम्मि य मधुरं सुगंधं च॥ 739॥

तह मिच्छत्तकडुगिदे जीवे तवणाणचरणविरियाणि ।
णसंति वंतमिच्छत्तम्मि य सफलाणि जायंति॥ 740॥

मा कासि तं पमादं सम्मत्ते सव्वदुक्खणासयरे ।
सम्मत्तं खु पदिट्ठा णाणचरणवीरियतवाणं॥ 741॥

णगरस्स जह दुवारं मुहस्स चक्खू तरुस्स जह मूलं ।
जह जाण सुसम्मत्तं णाणचरणवीरियतवाणं॥ 742॥

भावाणुरागपेमाणुरागमज्जाणुरागरत्तो वा ।
धम्माणुरागरत्तो य होहि जिणसासणे णिच्चं॥ 743॥

दंसणभट्टो भट्टो दंसण भट्टस्स णथि णिव्वाणं ।
सिज्झंति चरियभट्टा दंसणभट्टा ण सिज्झंति॥ 744॥

दंसणभट्टो भट्टो ण हु भट्टो होइ चरणभट्टो हु ।
दंसणममुयंतस्स हु परिवडणं णत्थि संसारे॥745॥

सुद्धे सम्मत्ते अविरदो वि अज्जेदि तित्थयरणामं ।
जादो दु सेणिगो आगमेसिं अरुहो अविरदो वि॥746॥

सम्मदंसणरयणं णग्घदि ससुरासुरो लोओ ।
सम्मत्तस्स य लंभे तेलोक्कस्स य हवेज्ज जो लंभो॥747॥

कल्लाणपरंपरयं लहंति जीवा विसुद्धसम्मत्ता ।
सम्मदंसणलंभो वरं खु तेलोक्कलंभादो॥748॥

लद्धूण वि तेलोक्कं परिवडदि हु परिमिदेण कालेण ।
लद्धूण य सम्मतं अक्खयसोक्खं हवदि मोक्खं॥749॥

अरहंतसिद्धचेदियपवयण - आयरियसव्वसाहूसु ।
तिव्वं करेहि भत्ती णिव्विदिगिच्छेण भावेण॥750॥

संवेगजणिदकरणा णिस्सल्ला मंदरोव्व णिक्कंपा ।
जस्स दढा जिणभत्ती तस्स भवं णत्थि संसारे॥751॥

एया वि सा समत्था जिणभत्ती दुग्गइं णिवारेण ।
पुण्णाणि य पूरेदुं आसिद्धिपरंपरसुहाणं॥752॥

तह सिद्धचेदिए पवयणे य आइरियसव्वसाधूसु ।
भत्ती होदि समत्था संसारुच्छेदणे तिव्वा॥753॥

विज्जा वि भत्तिवंतस्स सिद्धिमुवयादि होदि सफला य ।
किह पुण णिवुदिवीजं सिज्झहिदि अभत्तिमंतस्स॥ 754॥

तेसिं आराधणणायगाण ण करिज्ज जो णरो भत्तिं ।
धत्तिं पि संजमंतो सालिं सो ऊसरे ववदि॥ 755॥

बीएण विणा सस्सं इच्छदि सो वासमभएण विणा ।
आराधणमिच्छंतो आराधणभत्तिमकरंतो॥ 756॥

विधिणा कदस्स सस्सस्स जहा णिप्पादयं हवदि वासं ।
तह अरहादिगभत्ती णाणचरणदंसणतवाणं॥ 757॥

वंदणभत्तीमेत्तेण मिहिलाहिओ य पउमरहो ।
देविंदपाडिहेरं पत्तो जादो गणधरो य॥ 758॥

आराधणापुरस्सरमणण्हिदओ विसुद्धलेस्साओ ।
संसारस्स खयकरं मा मोचीओ णमोक्कारं॥ 759॥

मणसा गुणपरिणामो वाचा गुणभासणं च पंचण्हं ।
काएण संपणामो एस पयत्थो णमोक्कारो॥ 760॥

अरहंतणमोक्कारो एक्को वि हविज्ज जो मरणकाले ।
सो जिणवयणे दिट्ठो संसारुच्छेदणसमत्थो॥ 761॥

जो भावणमोक्कारेण विणा सम्मत्तणाणचरणतवा ।
ण हु ते होंति समत्था संसारुच्छेदणं कादुं॥ 762॥

चदुरंगाए सेणाए णायगो जह पवत्तओ होदि ।
तह भावणमोक्कारो मरणे तवणाणचरणाणं॥ 763॥

आराधणापडायं गेण्हंतस्स हु करो णमोक्कारो ।
मल्लस्स जयपडायं जह हत्थो घेतुक्कामस्स॥ 764॥

अण्णाणी वि य गोवो आराधित्ता मदो णमोक्कारं ।
चम्पाए सेट्टिकुले जादो पत्तो य सामण्णं॥ 765॥

णाणोवओगरहिदेण ण सक्को चित्तणिग्गहो काउं ।
णाणं अंकुसभूदं मत्तस्स हु चित्तहत्थिस्स॥ 766॥

विज्जा जहा पिसायं सुट्ठुवउत्ता करेदि पुरिसवसं ।
णाणं हियपिसायं सुट्ठुवउत्तं करेदि पुरिसवसं॥ 767॥

उवसमइ किण्हसप्पो जह मंतेण विधिणा पउत्तेण ।
तह हियकिण्हसप्पो सुट्ठुवजुत्तेण णाणेण॥ 768॥

आरण्णवो वि मत्तो हत्थी णियमिज्जदे वरत्ताए ।
जह तह णियमिज्जदि सो णाणवरत्ताए मणहत्थी॥ 769॥

जह मक्कडओ खणमवि मज्झत्थो अच्छिदुं ण सक्केइ ।
तह खणमवि मज्झत्थो विसएहिं विणा ण होदि मणो॥ 770॥

तह्मा सो उडुहणो मणमक्कडओ जिणोवएसेण ।
रामदेव्वो णियदं तो सो दोसं ण काहिदि से॥ 771॥

तद्वा णाणुवओगो खवयस्स विसेसदो सदा भणिदो ।

जह विंधणोवओगो चंदयवेज्झं करंतस्स॥772॥

णाणपदीओ पज्जलइ जस्स हियए विसुद्धलेस्सस्स ।

जिणदिट्ठमोक्खमग्गे पणासणभयं ण तस्सत्थि॥773॥

णाणुज्जोवो जोवो णाणुज्जोवस्स णत्थि पडिघादो ।

दीवेइ खेत्तमप्पं सूरु णाणं जगमसेसं॥774॥

णाणं पयासओ सो वओ तवो संजमो य गुत्तियरो ।

तिण्हंपि समाओगे मोक्खो जिणसासणे दिट्ठो॥775॥

णाणं करणविहूणं लिंगगहणं च दंसणविहूणं ।

संजमहीणो य तवो जो कुणदि णिरत्थयं कुणदि॥776॥

णाणुज्जोएण विणा जो इच्छदि मोक्खमग्गमुवगंतुं ।

गंतु कडिल्लमिच्छदि अंधलओ अंधयारम्मि॥777॥

जइदा खंडसिलोगेण जमो मरणा दु फेडिदो राया ।

पत्तो य सुसामण्णं किं पुण जिणउत्तसुत्तेण॥778॥

दढसुप्पो सूलदहो पंचणमोक्कारमेत्त सुदणाणे ।

उवजुत्तो कालगदो देवो जावो महहीओ॥779॥

ण य तम्मि देसयाले सव्वो वारसविधो सुदक्खंधो ।

सत्तो अणुचिंतेदुं बलिणा वि समत्थचित्तेण॥780॥

एक्कम्मि वि जम्मि पदे संवेगं वीदरागमग्गम्मि ।
गच्छदि णरो अभिक्खं तं मरणंते ण मोत्तव्वं॥ 781॥

परिहर छज्जीवणिकायवधं मणवयणकायजोएहिं ।
जावज्जीवं कदकारिदाणुमोदेहिं उवजुत्तो॥ 782॥

जह ते ण पियं दुक्खं तहेव तेसिं पि जाण जीवाणं ।
एवं णच्चा अप्पोवमिवो जीवेसु होदि सदा॥ 783॥

तण्हाछुहादिपरिदाविदो वि जीवाण घादणं किच्चा ।
पडियरं कादुंजे मा तं चिंतेसु लभसु सुदिं॥ 784॥

रदि अरदिहरिसभयउस्सुगत्तदीणत्तणादिजुत्तो वि ।
भोगपरिभोगहेदुं मा हु विचिंतेहि जीववहं॥ 785॥

महुकरिसमज्जियमहुं व संजमो थोवथोवसंगलियं ।
तेलोककसव्वसारं णो वा पूरेहि मा जहसु॥ 786॥

दुक्खेण लभदि माणुस्सजादिमदिमदिसवणदंसणचरित्तं ।
दुक्खज्जियसामण्णं मा जहसु तणं व अगणंतो॥ 787॥

तेलोककजीविदादो वरेहि एक्कदरगत्ति देवेहिं ।
भणिदो को तेलोककं वरिज्ज संजीविदं मुच्चा॥ 788॥

जं एवं तेलोककं णग्घदि सव्वस्स जीविदं तह्मा ।
जीविदघादो जीवस्स होदि तेलोककघादसमो॥ 789॥

णत्थि अणूदो अप्पं आयासादो अणूणयं णत्थि ।
जह तह जाण महल्लं ण वयमहिंसासमं णत्थि॥ 790॥

जह पव्वदेसु मेरू उच्चाओ होइ सव्वलोयम्मि ।
तह जाणसु उच्चायं सीलेसु वदेसु य अहिंसा॥ 791॥

सव्वो वि जहायासे लोगो भूमीए सव्वदीउदधी ।
तह जाण अहिंसाए वदगुणसीलाणि तिट्ठंति॥ 792॥

कुव्वंतस्स वि जत्तं तुंबेण विणा ण ठंति जह अरया ।
अरएहिं विणा य जहा णट्ठं णेमी दु चक्कस्स॥ 793॥

तह जाण अहिंसाए विणा ण सीलाणि ठंति सव्वाणि ।
तिस्सेव रक्खणट्ठं सीलाणि वदीव सस्सस्स॥ 794॥

सीलं वदं गुणो वा णाणं णिस्संगदा सुहच्चाओ ।
जीवो हिंसंतस्स हु सव्वे वि णिरत्थया होति॥ 795॥

सव्वेसिमासमाणं हिदयं गभो वसव्वसत्थाणं ।
सव्वेसिं वदगुणाणं पिंडो सारो अहिंसा हु॥ 796॥

जम्हा असच्चवयणादिएहि दुक्खं परस्स होदित्ति ।
तप्परिहारो तद्वा सव्वे वि गुणा अहिंसाए॥ 797॥

गोबंभणित्थिवधमेत्तिणियत्ति जदि हवे परमधम्मो ।
परमो धम्मो किह सो ण होइ जा सव्वभूददया॥ 798॥

सव्वे वि य संबंधा पत्ता सव्वेण सव्वजीवेहिं ।

तो भारंतो जीवो संबंधी चेव मारेइ॥799॥

जीववहो अप्पवहो जीवदया होइ अप्पणो हु दया ।

विसकंटओव्व हिंसा परिहरिदव्वा तदो होदि॥800॥

मारणसीलो कुणदि हु जीवाणं रक्खसुव्व उव्वेगं ।

संबंधिणो वि ण य विस्सम्भं मारिंतए जंति॥801॥

वधबंधरोधधणहरणजादणाओ य वेरमिह चेव ।

णिव्विसयमभोजित्तं जीवे मारंतगो लभदि॥802॥

कुद्धो परं वधित्ता सयंपि कालेण मारइज्जंते ।

हदघादयाण णत्थि विसेसो मुत्तूणं तं कालं॥803॥

अप्पाउगरोगिदयाविरूवदाविगलदा अवलदा य ।

दुम्मेहवण्णरसगंधदाय स होइ परलोए॥804॥

मारेदि एयमवि जो जीवं सो बहुसु जम्मकोडीसु ।

अवसो मारिज्जंतो मरदि बिधाणेहिं बहुएहिं॥805॥

जावइयाइं दुक्खाइं होति लोयम्मि चदुगदिदाइं ।

सव्वाणि ताणि हिंसाफलाणि जीवस्स जाणाहि॥806॥

हिंसादो अविरमणं वहपरिणामो य होइ हिंसा हु ।

तम्हा पमत्तजोगे पाणव्ववरोवओ णिच्चं॥807॥

रागी अथवा द्वषी या माही प्राणी जि करें प्रयागि ।
उसमें हिंसा हाती है इसेलए उन्हें हिंसक जानि॥808॥

आत्मा ही है हिंसा और अहिंसा, कहा ऋजनागम में ।
अप्रमत्त जि वही अहिंसक जि प्रमत्त वह हिंसक है॥809॥

जीव मरें या नहीं मरि रि हिंसा कि पिरणामों सि ।
बँधता है यह जीव, बन्ध का सार कहा है ऋनश्चय सि॥810॥

कमाब का क्षय करनि हति ज्ञानी उद्यम करति हैं ।
हिंसा में नहिं उद्यम करति वि अप्रमत्त अहिंसक हैं॥811॥

बाह्य वस्तु कि यागि मात्र सि शुद्ध जीव कि बन्ध कहें ।
वायु ओद का वध हाणि सि नहीं अहिंसक किई रहि॥812॥

पादोसिय अधिकरणिय कायिय परिदावणादिवादाए ।
एदे पंचपओगा किरियाओ होंति हिंसाओ॥813॥

तिहिं चदुहिं पंचहिं वा कमेण हिंसा समप्पदि हु ताहिं ।
बंधो वि सया सरिसो जइ सरिसो काइयपदोसो॥814॥

बीस पल तिण्णि मोदय पण्णरह पला तहेव चत्तारि ।
वारह पलिया पंच दु तेसिं पि समो हवे बंधो॥815॥

जीवगदमजीवगदं समासदो होदि दुविहमधिकरणं ।
अटुत्तरसयभेदं पढमं विदियं चदुभेदं॥816॥

संरंभसमारंभारंभं जोगेहिं तह कसाएहिं ।

कदकारिदाणुमोदेहिं तहा गुणिदा पढमभेदा॥817॥

संकल्िं किा संरंभ कहें, अरु सभारंभ संतिा प्रदान ।

उद्यम करना आरंभ कहा, नष्ट करें वशुद्ध व्रत जान॥818॥

णिक्खेवो णिव्वत्ति तहा य संजोयणा णिसग्गो य ।

कमसो चदु-दुग-दुग-तिय भेदा होति हु विदीयस्स॥819॥

सहसाणाभोगिय दुप्पमज्जिद अपच्चवेक्खणिक्खेवो ।

देहो व दुप्पउत्तो तहोवकरणं च णिव्वत्ति॥820॥

संजोयणमुवकरणाणं च तहा पाणभोयणाणं ।

दुट्ठणिसिट्ठा मणवचिकाया भेदा णिसग्गस्स॥821॥

जं जीवणिकायवहेण विणा इंदियकयं सुहं णत्थि ।

तम्हि सुहे णिस्संगो तम्हा सो रक्खदि अहिंसा॥822॥

जीवो कसायबहुलो संतो जीवाण घायणं कुणइ ।

सो जीववहं परिहरदु सया जो णिज्जियकसाओ॥823॥

आदाणे णिक्खेवे वोसरणे ठाणगमणसयणेसु ।

सव्वत्थ अप्पमत्तो दयावरो होदु हु अहिंसा ॥824॥

काएसु णिरारंभे फासुगभेजिम्मि णाणहिदयम्मि ।

मणवयणकायगुत्तिम्मि होइ सयला अहिंसा हु॥825॥

आरंभे जीववहो अप्पासुगसेवणे य अणुमोदो ।
आरंभादीसु मणो णाणरदीए विणा चरइ॥826॥

तम्हा इहपरलोए दुक्खाणि सदा अणिच्छमाणेण ।
उवओगो कायव्वो जीवदयाए सया मुणिणो॥827॥

पाणो वि पाडिहेरं पत्तो छूढो वि सुं सुमारहदे ।
एगेण एक्कदिवसक्कदेण हिंसावदगुणेण॥828॥

परिहर असंतवयणं सव्वं पि चदुव्विधं पयत्तेण ।
धत्तं पि संजमितो भासादोसेण लिप्पदि हु॥829॥

पढमं असंतवयणं संभूदत्थस्स होदि पडिसेहो ।
णत्थि णरस्स अकाले मच्चुत्ति जहेवमादीयं॥830॥

अहवा सयबुद्धीए पडिसेधो खेत्तकालभावेहिं ।
अविचारिय णत्थि इहं घडोत्ति जह एवमादीयं॥831॥

जं असभूदुभावणमेदं विदियं असंतवयणं तु ।
अत्थि सुराणमकाले मच्चुत्ति जहेवमादीयं॥832॥

अहवा जं उभावेदि असंतं खेत्तकालभावेहिं ।
अविधारिय अत्थि इहं घडोत्ति जह एवमादीयं॥833॥

तदियं असंतवयणं संतं जं कुणदि अण्णजादीगं ।
अविचारित्ता गोणं अस्सोत्ति जहेवमादीयं॥834॥

जं वा गरहिदवयणं जं वा सावज्जसंजुदं वयणं ।

जं वा अप्पियवयणं असत्तवयणं चउत्थं च॥835॥

कक्कस्सवयणं णिट्ठुरवयणं पेसुण्णहासवयणं च ।

जं किंचि विप्पलावं गरहिदवयणं समासेण॥836॥

जत्तो पाणवधादी दोसा जायंति सावज्जवयणं च ।

अविचारित्ता थेणं थेणत्ति जहेवमादीयं॥837॥

परुसं कडुयं वयणं वेर कलह च जं भयं कुणइ ।

उत्तासणं च हीलणमप्पियवयणं समासेण॥838॥

हासभयलोहकोहप्पदोसादीहिं तु मे पयत्तेण ।

एवं असंतवयणं परिहरिदव्वं विसेसेण॥839॥

तव्विवरीदं सव्वं कज्जे काले मिदं सविसए य ।

भत्तादिकहारहियं भणाहि तं चेव सुयणाहि॥840॥

जलचंदणससिमुत्ताचंदमणी तह णरस्स विव्वाणं ।

ण करंति कुणइ जह अत्थज्जुयं हिदमधुरमिदवयणं॥841॥

अण्णस्स अप्पणो वा वि धम्मिए विद्वंतए कज्जे ।

जं अपुच्छिज्जंतो अण्णेहिं य पुच्छिओ जंप॥842॥

सच्चं वदेति रिसओ रिसीहिं विहिदा उ सव्व विज्जाओ ।

मिच्छस्स वि सिज्झंति य विज्जाओ सच्चवादिस्स॥843॥

ण डहदि अग्गी सच्चेण णरं जलं च तं ण बुड्ढिइ ।
सच्चबलियं खु पुरिसं ण वहदि तिक्खा गिरिणदी वि॥844॥

सच्चेण देवदावो णवंति पुरिसस्स होंति य वसम्मि ।
सच्चेण य गहगहिदं मोएइ करेंति रक्खं च॥845॥

माया व होइ विस्सस्सणिज्ज पुज्जे गुरुव्व लोगस्स ।
पुरिसो हु सच्चवादी होदि हु सणियल्लओव्व पिओ॥846॥

सच्चं अवगददोसं वुत्तूण जणस्स मज्झयारम्मि ।
पीदिं पावदि परमं जसं च जगविस्सुदं लहइ॥847॥

सच्चम्मि तवो सच्चम्मि संजमो तह वसे सया वि गुणा ।
सच्चं णिबंधणं हि य गुणाणमुदधीव मच्छाणं॥848॥

सच्चेण जगे होदि पमाणं अण्णो गुणो जदि वि से णत्थि ।
अदिसंजदो य मोसे ण होदि पुरिसेसु तणलहुओ॥849॥

होदु सिंहंडी व जडी मुंडो वा णग्गओ व चीवरधरो ।
जदि भणदि अलियवयणं विलंवणा तस्स सा सव्वा॥850॥

जह परमण्णस्स विसं विणासयं जेह व जोव्वणस्स जरा ।
तह जाण अहिंसादी गुणाण य विणासयमसच्चं॥851॥

मादाए वि य वेसो पुरिसो अलिएण होइ इक्केण ।
किं पुण अवसेसाणं ण होइ अलिएण सत्तुव्व॥852॥

अलियं स किं पि भणिदं घादं कुणदि बहुगाण सव्वाणं ।
अदिसंकिदो य सयमवि होदि अलियभासणो पुरिसो॥853॥

अप्पच्चओ अकित्ती भंभारदिकलहवेरभयसोगा ।
वधबंधभेदणाणा सव्वे मोसम्मि सण्णिहिदा॥854॥

पापस्सासवदारं असच्चवयणं भणंति हु जिणिंदा ।
हिदएण अपावो वि हु मोसेण गदो वसू णिरयं॥855॥

परलोगम्मि वि दोस्सा ते चेव हवंति अलियवादिस्स ।
मोसादीए दोसे जत्तेण वि परिहरंतस्स॥856॥

इहलोइय परलोइय दोसा जे होंति अलियवयणस्स ।
कक्कसवयणादीण वि दोसा ते चेव णादव्वा॥857॥

एदेसिं दोसाणं मुक्को होदि अलिआदि वविदोसे ।
परिहरमाणो साधू तव्विवरीदे य लभदि गुणे॥858॥

मा कुणसु तुमं बुद्धिं बहुमप्पं वा परादियं घेत्तं ।
दंतंतरसोधणयं कलिवमेत्तं पि अविदिण्णं॥859॥

जह मक्कडओ धादो वि फलं दट्ठूण लोहिदं तस्स ।
दूरत्थस्स वि डेवदि धित्तूण वि जइ वि छंडेदि॥860॥

एवं जं जं पस्सदि दव्वं अहिलसदिं पाविदुं तं तं ।
सव्वजगेण वि जीवो लोभाइट्ठो ण तिप्पेदि॥861॥

जह मारुवो पवट्टइ खणेण वित्थरइ अब्भयं च जहा ।
जीवस्स तहा लोभो मंदो वि खणेण वित्थरइ॥862॥

लोभे च वह्निदे पुण कज्जाकज्जं णरो ण चिंतेदि ।
तो अप्पणो वि मरणं अगणितो साहसं कुणदि॥863॥

सव्वो उवहिदबुद्धि पुरिसो अत्थे हिदे य सव्वो वि ।
सत्तिप्पहारविद्धो व होदि हिदयम्मि अदिदुहिदो॥864॥

अत्थम्मि हिदे पुरिसो उम्मत्तो विगयचेयणो होदि ।
मरदि व हक्कारकिदो अत्थो जीवं खु पुरिसस्स॥865॥

अडईगिरिदरिसागरजुद्धाणि अडंति अत्थलोभादो ।
पियबंध वेवि जीवं पि णरा पयहंति धणहेदुं॥866॥

अत्थे संतम्मि सुहं जीवदि सकलत्तपुत्तसंबंधी ।
अत्थं हरमाणेण य हिदं हवदि जीविदं तेसिं॥867॥

चोरस्स णत्थि हियए दया च लज्जा दमो व विस्सासो ।
चोरस्स अत्थहेदुं णत्थि य कादव्वयं किं पि॥868॥

लोगम्मि अत्थि पक्खो अवरद्धंतस्स अण्णमवराधं ।
णियलोया विपक्खे ण होंति चोरिक्कसीलस्स॥869॥

अण्णं अवरज्झंतस्स दिंति णियये घरम्मि आवासं ।
माया वि य ओगासं ण देह चोरिक्कसीलस्स॥870॥

परदव्वहरणमेदं आसवदारं खु वेंति पावस्स ।

सोगरियवाहपरदारएहिं चोरो हु पापदरो॥871॥

सयणं मित्तं आसयमल्लीणं पि य महल्लए दोसे ।

पाडेदि चोरियाए अयसे दुक्खम्मि य महल्ले॥872॥

बंधवधजादणाओ छायाघादपरिभवभयं सोयं ।

पावदि चोरो सयमवि मरणं सव्वस्सहरणं वा॥873॥

णिच्चं दिवा य रत्तिं च संकमाणो ण णिहमुवलभदि ।

तेणं तओ समंता उव्विग्गमओ य पिच्छंतो॥874॥

उंदुरकंदपि सद्दं सुच्चा परिवेवमाणसव्वंगो ।

सहसासमुत्थिदभओ उव्विग्गो धावदि खलंतो॥875॥

धत्तिं पि संजमंतो घेतूण किलिंदमेत्तमविदिण्णं ।

होदि हु तणं व लहुओ अप्पच्चइओ य चोरो व्व॥876॥

परलोगम्मि य चोरो करेदि णिरयम्मि अप्पणो बसदिं ।

तिव्वाओ वेदणाओ अणुभवदि हि तत्थ सुचिरंपि॥877॥

तिरियगदीए वि तहा चोरी पाउणदि तिव्वदुक्खाणि ।

पाएण णीयजोणीसु चेव संसरइ सुचिरंपि॥878॥

माणुसभवे वि अत्था हिदा व तस्स णस्संति ।

ण य से धणमुवचीयदि सयं च ओलट्टदि धणादो॥879॥

परदव्वहरणबुद्धी सिरिभूदी णयरमज्झयारम्मि ।

होदूण हदो पहदो पत्तो सो दीहसंसारं॥880॥

एदे सव्वे दोसा ण होति परदव्वहरणविरदस्स ।

तव्विवरीदा य गुणा होति सदा दत्तभोइस्स॥881॥

देविंदरायगहवइदेवदसाहम्मि उग्गहं तम्हा ।

उग्गहविहिणा दिण्णं गेण्हसु सामण्णसाहणयं॥882॥

रक्खाहि बंभचेरं अब्बंभं दसविधं तु वज्जिता ।

णिच्चं पि अप्पमत्तो पंचविधे इत्थिवेरग्गे॥883॥

जीवो बम्भा जीवम्मि चेव चरिया हविज्ज जा जदिणो ।

तं जाण बंभचेरं विमुक्कपरदेहतित्तिस्स॥884॥

इत्थिविसयाभिलासो वत्थिविमोक्खो य पणिदरससेवा ।

संसत्तदव्वसेवा तदिंदियालोयणं चेव॥885॥

सक्कारो संकारो अदीदसुमरणमणागदभिलासे ।

इट्ठविसयसेवा वि य अब्बंभं दसविहं एदं॥886॥

एवं विसग्गिभूदं अब्बंभं दसविहंपि णादव्वं ।

आवादे मधुरम्मिव होदि विवागे य कडुयदरं॥887॥

कामकदा इत्थिकदा दोसा असुचित्तबट्ठसेवा य ।

संसग्गीदोसा वि य करंति इत्थीसु वेरग्गं॥888॥

जावइया किर दोसा इहपरलोए दुहावहा होंति ।

सव्वे वि आवहदि ते मेहुणसण्णा मणुस्सस्स॥889॥

सोयदि विलपदि परितप्पदी य कामादुरो विसीयदि य ।

रत्तिदिवा य णिदं ण लहदि पज्झादि बिमणो य॥890॥

सयणे जणे य सयणासणे य गामे घरे व रण्णे वा ।

कामपिसायग्गहिदो ण रमदि य तह भोयणादीसु॥891॥

कामादुरस्स गच्छदि खणो वि संवच्छरो व पुरिसस्स ।

सीदंति य अंगाइं होदि अ उक्कंठिओ पुरिसो॥892॥

पाणिदलधरिदगंडो बहुसो चिंतेदि किंपि दीणमुहो ।

सीदे वि णिवाइज्जइ बेवदि य अकारणे अंगं॥893॥

कामुम्मत्तो संतो अंतो डज्झदि य कामचिंताए ।

पीदो व कलकलो सो रदग्गिजाले जलंतम्मि॥894॥

कामदुरो णरो पुरा कामिज्जंते जण्णे हु अलहंतो ।

धत्तदि मरिदुं बहुधा मरुप्पवादादिकरणेहिं॥895॥

संकप्पंडयजादेण रागदोसचलजमल जीहेण ।

विसयबिलवासिणा रदिमुहेण चिंतादिरोसेण॥896॥

कामभुजगेण दट्ठा लज्जाणिम्मोगदप्पदाढेण ।

णासंति णरा अवसा अणेयदुक्खावहविसेण॥897॥

आसीविसेण अवरुद्धस्स विवेगा हवंति सत्तेव ।
दस होंति पुणो वेगा कामभुअंगावरुद्धस्स॥898॥

पढमे सोयदि वेगे दट्ठं तं इच्छदे विदियवेगे ।
णिस्सदि तदियवेगे आरोहदि जरो चउत्थम्मि॥899॥

डज्झदि पंचमवेगे अंगं छट्ठे ण रोचदे भत्तं ।
मुच्छिज्जदि सत्तमए उम्मत्तो होइ अट्टमए॥900॥

णवमे ण किंचि जाणादि दसमे पाणेहिं मुच्चदि मदंधो ।
संकप्पवसेण पुणो वेगा तिव्वा व मंदा वा॥901॥

जेठ्ठामूले जोण्हे सूरु विमले णहम्मि मज्झण्हे ।
ण डहवि तह जह पुरिसं डहदि विवट्ठंतओ कामो॥902॥

सूरग्गी डहदि दिवा रत्तिं च दिवा य डहदि कामग्गी ।
सूरस्स अत्थि उच्छागारो कामग्गिणो णत्थि॥903॥

विज्झायदि सूरग्गी जलादिएहिं ण तहा हु कामग्गी ।
सूरग्गी डहदि तयं अभंतरबाहिरं इदरो॥904॥

जादिकुलं संवासं धम्मं णिय बंधवम्मि अगणितो ।
कुणदि अकज्जं पुरिसो मेहुणसण्णाए संमूढो॥905॥

कामपिसायग्गहिदो हिदमहिदं होइ वा ण अप्पणो मुणदि ।
होइ पिसायग्गहिदो वसदा पुरिसो अणप्पवसो॥906॥

णीचो व णरो बहुगं पि कदं कुलपुत्तओ वि ण गणेदि ।
कामुम्मत्तो लज्जालुओ वि तह होदि णिल्लज्जो॥907॥

कामी सुसंजदाण वि रूसदि चोरो व जग्गमाणाणं ।
पिच्छदि कामग्धत्थो हिदं भणंते व सत्तू व॥908॥

आयरियउवज्झाए कुलगणसंघस्स होदि पडिणीओ ।
कामकलिणा हु घत्थो धम्मियभावं पयहिदूण॥909॥

कामग्धत्थो पुरिसो तिलोयसारं जहदि सुदलाभं ।
तेलोककपूइदं पि य माहप्पं जहदि विसयंधो॥910॥

तह विसयामिसघत्थो तणं व तवचरणदंसणं जहइ ।
विसयामिसगिद्धस्स हु णत्थि अकायव्वयं किंचि॥911॥

अरहंतसिद्ध आयरिय उवज्झाय सव्वसाहु वग्गाणं ।
कुणदि अवण्णं णिच्चं कामुम्मत्तो विगयवेसो॥912॥

अजसमणत्थं दुक्खं इहलोए दुग्गदी य परलोए ।
संसारं पि अणंतं ण मुणदि विसयामिसे गिद्धो॥913॥

णीचं पि विसयहेदुं सेवदि उच्चो वि विसयलुद्धमदी ।
बहुगं पि य अवमाणं विसयंधो सहइ माणी वि॥914॥

णीचं पि कुणदि कम्मं कुलपुत्त दुगुंछियं विगदमाणो ।
वारित्तओ वि कम्मं अकासि जह लांधियाहिदुं॥915॥

सूरो तिकखो मुखो वि होइ वसिओ जणस्स सधणस्स ।
विसयामिसम्मि गिद्धो माणं रोसं च मोत्तूण॥916॥

माणी वि असरिसस्सवि चडुयम्मं कुणदि णिच्चमविलज्जो ।
मादापिदरे दासो वायाए परस्स कामंतो॥917॥

वयणपडिवत्ति कुसलत्तणं पि णासइ णरस्स कामिस्स ।
सत्थप्पहदा तिकखा वि मदी मंदा तहा हवदि॥918॥

होदि सचक्खू वि अचक्खू व वधिरो वा वि होइ सुणमाणो ।
दुट्ठकरेणुपसत्तो वणहत्थी चेव संमूढो॥919॥

सलिलणिवुट्ठोय णरो वुज्झंतो विगदचेयणो होदि ।
दक्खो वि होइ मंदो विसयपिसा ओवहदचित्तो॥920॥

वारसवासाणि वि संवसित्तु कामादुरो ण याणीय ।
पादंगुट्ठमसंतं गणियाए गोरसंदीवो॥921॥

सीदं उण्हं तण्हं छुहं च दुस्सेज्ज भत्त पंथसमं ।
सुकुमारो वि य कामी सहइ भारमवि गरुयं॥922॥

गायदि णच्चदि धावदि कसइ ववदि लवदि तह मलेइ णरो ।
तुण्णइ उण्णइ जाचइ कुलम्मि जादो वि विसयवसो॥923॥

सेवदि णिवादि रक्खदि गोमहिसिमजावियं हयं हत्थिं ।
ववहरदि कुणदि सिप्पं सिणेहपासेण दढबद्धो॥924॥

वेढेइ विसयहेदंु कलत्तपासेहिं दुव्विभोएहिं ।
कोसेण कोसियारुव्व दुम्मदी णिच्च अप्पाणं॥925॥

रागो दोसो मोहो कसायपेसुण्ण संकिलेसो य ।
ईसा हिंसा मोसा सूया तेणिकक कलहो य॥926॥

जंपणपरिभवणियडिपरिवादरिपुरोगसोगधणणासो ।
विसयाउलम्मि सुलहा सव्वे दुक्खावहा दोसा॥927॥

अवि य वहो जीवाणं मेहुणसेवाए होइ बहुगाणं ।
तिलणालीए तत्ता सलायवेसो य जोणीए॥928॥

कामुम्मत्तो महिलं गम्मागम्मं पुणो अविण्णाय ।
सुलहं दुलहं इच्छियमणिच्छियं चावि पत्थेदि॥929॥

दट्ठण परकलत्तं किंहिदा पत्थेइ णिग्घिणो जीवो ।
ण य तत्थ किं पि सुक्खं पावदि पावं च अज्जेदि॥930॥

आहट्टिदूण चिरमवि परस्स महिलं लभित्तु दुक्खेण ।
उप्पित्थमाविसत्थं अणिव्वुदं तारिसं चेव॥931॥

कहमवि तमंधयारे संपत्तो जत्थ तत्थ वा देसे ।
किं पावदि रइसुक्खं भीदा तुरिदो वि उल्लाखो॥932॥

परमहिलं सेवंतो वेरं वधबंधकलहधणासं ।
पावदि रायकुलादो तिस्से णीयल्लयादो वा॥933॥

जदि दा जणेइ मेहुणसेवा पावं सगम्मि दारम्मि ।
अदितिव्वं कह पावं ण होज्ज परदारसेविस्स॥934॥

मादा धूदा भज्जा भगिणीसु परेण विप्पयम्मि कदे ।
जह दुक्खमप्पणो होइ तहा अण्णस्स वि णरस्स॥935॥

एवं परजणदुक्खे णिरवेक्खो दुक्खबीयमज्जेदि ।
णीयं गोदं इच्छीणउं सवेदं च अदितिव्वं॥936॥

जमणिच्छंती महिलं अवसं परिभुंजदे जहिच्छाए ।
तह य किलिस्सइ जं सो तं परदारगमणफलं॥937॥

महिलावेसविलंबी जं णीचं कुणइ कम्मयं पुरिसो ।
तह वि ण पूरइ इच्छा तं से परदारगमणफलं॥938॥

भज्जा भगिणी मादा सुदा य बहुएसु भवसयसहरस्सेसु ।
अयसायासकरीओ होंति विसीला य णिच्चं से॥939॥

होइ सयं पि विसीलो पुरिसो अदिदुब्भगो परभवेसु ।
पावइ वधबंधादि कलहं णिच्चं अदोसो वि॥940॥

इहलोए वि महल्लं दोसं कामस्स वसगदो पत्तो ।
कालगदो वि य पच्छा कडारपिंगो गदो णिरयं॥941॥

एदे सव्वे दोसा ण होंति पुरिसस्स वंभचारिस्स ।
तव्विवरीया य गुणा हवंति बहुगा विरागिस्स॥942॥

कामगिणा धगधगंतेण य डज्झंतयं जगं सव्वं ।

पिच्छइ पिच्छयभूदो सीदीभूदो विगदरागो॥943॥

महिलाकुलसंवासं पदिं सुदं मादरं च पिदरं च ।

विसयंधा अगणंते दुक्खसमुद्धमि पाडेइ॥944॥

माणुण्णयस्स पुरिसद्दुमस्स णीचो वि आरुहदि सीसं ।

महिलाणिस्सेणीए णिस्सेणीएव्व दीहदुमं॥945॥

पव्वदमिता माणा पुंसाणं होति कुलबलधणेहिं ।

बलिएहिं वि अक्खोहा गिरीव लोगप्पयासा य॥946॥

ते तारिसया माणाओमत्थिज्जंति दुट्ठमहिलाहिं ।

जह अकंुसेण णिस्साइज्जइ हत्थी अदिबलो वि॥947॥

आसीय महाजुद्धाइं इत्थिहेदुं जणम्मि बहुगाणि ।

भयजणणाणि जणाणं भारहरामायणादीणि॥948॥

महिलासु णत्थि वीसंभणयपरिचयकदण्णदा णेहो ।

लहुमेव परगयमणाओ ताओ सकुलंपि य जहंति॥949॥

पुरिसस्स दु वीसंभं करेदि महिला बहुप्पयारेहिं ।

महिला वीसंभेदुं बहुप्पयारेहिं वि ण सक्का॥950॥

अदिलहुयगे वि दोसे कदम्मि सुकदस्सहस्समगणंती ।

पइ अप्पाणं च कुलं धणं च णासंति महिलाओ ॥951॥

आसीविसो व्व कुविदा ताओ दूरेण णिहदपावाओ ।

रुद्धो चंडो रायाव ताओ कुव्वंति कुलघादं॥952॥

अकदम्मि वि अवराधे ताओ वीसच्छमिच्छमाणीओ ।

कुव्वंति वहं पदिणो सुदस्स ससुरस्स पिदुणो वा॥953॥

सक्कारं उवकारं गुणं व सुहलालणं च णेहो वा ।

मधुरवयणं च महिला परगदहिदया ण चिंतेइ॥954॥

साकेदपुराधिवदी देवरदी रज्जसुक्खपभट्टो ।

पंगुलहेदंु छूढो णदीए रत्ताए देवीए॥955॥

ईसालुयाए गोववदीए गामकूडधूयिया सीसं ।

छिण्णं पहदो तथ भल्लएण पासम्मि सीहबलो॥956॥

वीरमदीए सूलगदचोरदट्ठोट्टिगाए वाणियओ ।

पहदो दत्तो य तहा छिण्णो ओट्ठोत्ति आलविदो॥957॥

वग्घविसचोरअग्गी जलमत्तगयकण्हसप्पसत्तुसु ।

सो वीसंभं गच्छदि वीसंभदि जो महिलियासु॥958॥

वग्घादीया एदे दोसा ण णरस्स तं करिज्जण्हू ।

जं कुणइ महादोसं दुट्ठा महिला मणुस्सस्स॥959॥

पाउसकालणदीवोव्व ताओ णिच्चंपि कलुसहिदयाओ ।

धणहरणकदमदीओ चोरोव्व सकज्जगुरुयाओ॥960॥

रोगो दारिद्रं वा जरा व ण उवेइ जाव पुरिसस्स ।
ताव पिओ होदि णरो कुलपुत्तीए वि महिलाए॥961॥

जुण्णो व दरिद्रो वा रोगी सो चेव होइ से वेसो ।
णिप्पीलिओव्व उच्छू मालाव मिलाप गदागंधा॥962॥

महिला पुरिसमवण्णाए चेव वंचेइ णियडिकवडेहिं ।
महिला पुण पुरिसकदं जाणइ कवडं अवण्णाए॥963॥

जह जह मण्णेइ णरो तह तह परिभवइ तं णरं महिला ।
जह जह कामेइ णरो तह तह पुरिसं विमाणेइ॥964॥

मत्तो गउव्व णिच्चं पि ताउ मदविंभलाओ महिलाओ ।
दासेव सगे पुरिसे किं पि य ण गणंति महिलाओ॥965॥

अणिहुदपरगदहिदया ताओ वग्घीव दुट्ठहिदयाओ ।
पुरिसस्स ताव सत्तूव सदा पावं विचिंतंति॥966॥

संझाव णरेसु सदा ताओ हुंति खणमेत्तरागाओ ।
वादोव महिलियाणं हिदयं अदिचंचलं णिच्चं ॥967॥

जावइयाइं तणाइं वीचीओ वालिगाव रोमाइं ।
लोए हवेज्ज तत्तो महिलाचिंताइं बुहगाइं॥968॥

आगास भूमि उदधी जल मेरू वाउणो वि परिमाणं ।
मादुं सक्का णा पुणो सक्का इत्थीण चित्ताइं॥969॥

चिट्ठंति जहा ण चिरं विज्जुज्जलबुव्वुदो व उक्का वा ।
तह ण चिरं महिलाए एक्के पुरिसे हवदि पीदी॥970॥

परमाणू वि कहंचिवि आगच्छेज्ज गहणं मणुस्सस्स ।
ण य सक्का घेतुं जे चित्तं महिलाए अदिसण्हं॥971॥

कुविदो व किण्हसप्पो दुट्ठो सीहो गओ मदगलो वा ।
सक्का हवेज्ज घेतुं ण य चित्तं दुट्ठमहिलाए॥972॥

सक्कं हविज्ज दट्ठं विज्जुज्जोएण रूवमच्छिम्मि ।
ण य महिलाए चित्तं सक्का अदिचंचलं णादुं॥973॥

अणुवत्तणाए गुणवयणेहि चित्तं हरंति पुरिसस्स ।
मादा व जाव ताओ रत्तं पुरिसं ण याणंति॥974॥

अलिएहिं हसियवयणेहिं अलियरुयणेहिं अलियसवहेहिं ।
पुरिसस्स चलं चित्तं हरंति कवडाओ महिलाओ॥975॥

महिला पुरिसं वयणेहिं हरदि पहणदि य पावहिदएण ।
वयणे अमयं चिट्ठदि हियए य विसं महिलियाए॥976॥

तो जाणिऊण रत्तं पुरिसं चम्मट्ठिमंसपरिसेसं ।
उद्दाहंति वधंति य बडिसामिसलग्गमच्छं व॥977॥

उदएपवेज्जहिसिलाअग्गीणाडहिज्जसीयलो होज्ज ।
ण य महिलाण कदाई उज्जुयभावो णरेसु हवे॥978॥

उज्जुयभावम्मि असत्तयम्मि किध होदि तासु वीसंभो ।
विस्संभम्मि असंते का होज्ज रदी महिलियासु॥979॥

गच्छिज्ज समुद्दस्य वि पारं पुरिसो तरित्तु ओघबलो ।
मायाजलमहिलोदधिपारं ण य सक्कदे गंतुं ॥980॥

रदणाउला सवग्धाव गुहा गाहाउला च रम्मणदी ।
मधुरा रमणिज्जावि य सढा य महिला सदोसा य॥981॥

वज्जदि णियडिमेव उद्देदि ।
गोधाणुलुक्कमिच्छी करेदि पुरिसस्स कुलजावि॥982॥

पुरिसं वधमुवणेदित्ति होदि बहुगा णिरुत्तिवादम्मि ।
दोसे संघादिदि य होदि य इत्थी मणुस्सस्स॥983॥

तारिसओ णत्थि अरी णरस्स अण्णोत्ति उच्चदे णारी ।
पुरिसं सदा पमत्तं कुणदित्ति य उच्चदे पमदा॥984॥

गलए लायदि पुरिसस्स अणत्थं जेण तेण विलया सा ।
जोजेदि णरं दुक्खेण तेण जुवदी य जोसा य॥985॥

अवलत्ति होदि जं से ण दंढ हिदयम्मि धिदिबलं अत्थि ।
कुम्मरणोपायं जं जणयदि तो उच्चदि हि कुमारी॥986॥

आलं जणदि पुरिसस्स महल्लं जेण तेण महिला सा ।
एयं महिलाणामाणि होंति असुभाणि सव्वाणि॥987॥

णिलओ कलीए अलियस्स आलओ अविणयस्स आवासो ।

आयसस्सावसधो महिला मूलं च कलहस्स॥988॥

सोगस्स सरी वेरस्स खणी णिवहो वि होइ कोहस्स ।

णिचओ णियडीणं आसवो य महिला अकित्तीए॥989॥

णासो अत्थस्स खओ देहस्स य दुग्गदीपमग्गो य ।

आवाहो य अणत्थस्स होइ पहुवो य दोसाणं॥990॥

महिला विग्घो धम्मस्स होदि परिहो य मोक्खमग्गस्स ।

दुक्खाण य उप्पत्ती महिला सुक्खाण य विवत्ती॥991॥

पासो व बंधिदुं जे छेतुं महिला असीव पुरिसस्स ।

सिल्लं व विंधिदुं जे पंकोव निमज्जिदुं महिला॥992॥

सूलो इव भित्तुं जे होइ पवोदुं तहा गिरिणदी वा ।

पुरिसस्स खुप्पदुं कद्दमोव मचुव्व मरिदंु जे॥993॥

अग्गीवि य डहिदुं जे मदोव पुरिसस्स मुज्झिदुं महिला ।

महिला णिकत्तिदुं करकचोव कंडूव पडलेदुं॥994॥

करि खवदारण फरसा जैसी मुद्गर वत् ताडिं नर कि ।

नर का चूर्ण बनानि हति है लुहार-घनवत् जानि॥995॥

चंदो हविज्ज उण्हो सीदो सूरु वि थडुमागासं ।

ण य होज्ज अदोसा भद्विया वि कुलबालिया महिला॥996॥

एए अण्णेय बहुदोसे महिलाकदे वि चिंतयदो ।
महिलाहितो विचित्तं उव्वियदि विसग्गिसरसीहिं॥997॥

वग्घादीणं दोसे णच्चा परिहरदि ते जहा पुरिसो ।
तह महिलाणं दोसे दद्धं महिलाओ परिहरइ॥998॥

महिलाणं जे दोसा ते पुरिसाणं पि हुंति णीचाणं ।
तत्तो अहियदरा वा तेसिं वलसत्तिजुत्ताणं॥999॥

जह सीलरक्खयाणं पुरिसाणं णिंदिदाओ महिलाओ ।
तह सीलरक्खयाणं महिलाणं णिंदिदा पुरिसा॥1000॥

किं पुण गुणसहिदाओ इच्छीओ अत्थि वित्थडजसाओ ।
णरलोगदेवदाओ देवेहिं वि वंदणिज्जाओ॥1001॥

तित्थयर चक्कधरवासुदेवबलदेवगणधरवराणं ।
जणणीओ महिलाओ सुरणरवरेहिं महिलाओ॥1002॥

एगपदिव्वइकण्णावयाणि धारिंति कित्ति महिलाओ ।
वेधव्वतिव्वदुक्खं आजीवं णिंति काओ वि॥1003॥

सीलवदीवो सुच्चंति महीयले पत्तपाडिहेराओ ।
सावाणुग्गहसमत्थाओ वि य काओ वि महिलाओ॥1004॥

ओग्घेण ण वूढाओ जलंतघोरग्गिणा ण दद्धाओ ।
सप्पेहिं सावदेहिं य परिहरिदा आवे काओ वि॥1005॥

सव्वगुणसमग्गाणं साहूणं पुरिसपवरसीहाणं ।
चरमाणं जणणित्तं पत्ताओ हवंति काओ वि॥1006॥

मोहोदयेण जीवो सव्वो दुस्सीलमइलिदो होदि ।
सो पुण सव्वो महिला पुरिसाणं होइ सामण्णो॥1007॥

तह्मा सा पल्लवणा पउरा महिलाण होदि अधिकिच्चा ।
सीलवदीओ भणिदे दोसे किहणाम पावंति॥1008॥

देहस्स बीयणिप्पत्तिखेत्त आहारजम्मवुट्ठीओ ।
अवयवणिग्गमअसुई पिच्छसु वाधी य अधुवत्तं॥1009॥

देहस्स सुक्कसोणिय असुई परिणामिकारणं जह्मा ।
देहो वि होइ असुई अमेज्झघदपूरओ व तदो॥1010॥

दट्ठं विहिंसणीयं अमेज्झमिव संकुदो पुणो होज्ज ।
ओज्जिग्घिदुमालद्धं परिभोत्तुं चावि तं बीयं॥1011॥

समिदकदो घदपुण्णो सुज्झदि सुद्धत्तणेण समिदस्स ।
असुचिम्मि तम्मि बीए कह देहो सो हवे सुद्धो॥1012॥

कललगदं दसरत्तं अच्छदि कलुसीकदं च दसरत्तं ।
थिरभूदं दसरत्तं अच्छदि गभम्मि तं बीयं॥1013॥

तत्तो मासं बुब्बुदभूदं अच्छदि पुणो वि घणभूदं ।
जायदि मासेण तदो मंसप्पेसी य मासेण॥1014॥

मासेण पंच पुलगा तत्तो हुंति हु पुणोवि मासेण ।
अंगाणि उवंगाणि णरस्स जायंति गभम्मि॥1015॥

मासम्मि सत्तमे तस्स होदि चम्मणहरोमणिप्पत्ति ।
फंदणमट्टममासे णवमे दसमे य णिग्गमणं॥1016॥

सव्वासु अवत्थासु वि कललादीयाणि ताणि सव्वाणि ।
असुईणि अमिज्झाणि य विहिंसणिज्जाणि णिच्चंपि॥1017॥

आमासयम्मि पक्कासयस्स उवरिं अमेज्झमज्झम्मि ।
वत्थिपडलपच्छण्णो अच्छइ गभे हु णवमासं॥1018॥

वमिदा अमेज्झमज्झे मासंपि समक्खमच्छिदो पुरिसो ।
होदि हु विहिंसणिज्जो जदि वि सय णीयल्लओ होज्ज॥1019॥

किह पुण णवदसमासे उसिदो वमिगा अमेज्झमज्झम्मि ।
होज्जणविहिंसणिज्जोजदि वि सय णीयल्लओ होज्ज॥1020॥

दंतेहिं चव्विदं वीलणं च सिंभेण मेलिदं संतं ।
मायाहारियमण्णं जुत्तं पित्तेण कडुएण॥1021॥

वमिगं अमेज्झसरिसं वादविओजिदरसं खलं गभे ।
आहारेदि समंता उवरिं थिप्पंतगं णिच्चं॥1022॥

तो सत्तमम्मि मासे उप्पलणालसरिसी हवइ णाही ।
तत्तो पभूदि पाए वमियं तं आहारेदि णाहीए॥1023॥

वमियं व अमेज्झं वा आहारिदवं स किं पि ससमक्खं ।
होदि हु विहिंसणिज्जो जदि वि य णियल्लओ होज्ज॥1024॥

किह पुण णवदसमासे आहारेदूण तं णरो वमियं ।
होज्ज ण विहिंसणिज्जो जदि वि य णीयल्लओ होज्ज॥1025॥

असुचिं अपेच्छणिज्जं दुग्गंधं मुत्तमोणियदुवारं ।
वोत्तुं वि लज्जणिज्जं पोट्टमहं जम्मभूमी से॥1026॥

जदि दाव विहिंसज्जइ वत्थीए मुहं परस्स आलेट्टुं ।
कह सो विहिंसणिज्जो ण होज्ज सल्लीढपोट्टमुहो॥1027॥

बालो विहिंसणिज्जाणि कुणदि तह चेव लज्जणिज्जाणि ।
मेज्झामेज्झं कज्जाकज्जं किंचिवि अयाणंतो॥1028॥

अण्णस्स अप्पणो वा सिंहाणयखेलमुत्तपुरिसाणि ।
चम्मट्टिवसापूयादीणि य तुंडे सगे छुभदि॥1029॥

जं किं चि खादि जं किं चि कुणदि जं किं जंपदि अलज्जो ।
जं किं चि जत्थ तत्थ वि वोसरदि अयाणगो वालो॥1030॥

बालत्तणे कदं सव्वमेव जदि णाम संभरिज्ज तदो ।
अप्याणम्मि वि गच्छे णिव्वेदं किं पुण परंभि॥1031॥

कुणिमकुडी कुडिमेहिं य भरिदा कुणिमं च सवदि सव्वत्तो ।
ताणं व अमेज्झमयं अमेज्झभरिदं सरीरमिणं॥1032॥

अट्टीणि हुंति तिण्णि हु सदाणि भरिदाणि कुणिममज्जाए ।

सव्वम्मि चेव देहे संधीणि हवंति तावदिया॥1033॥

ण्हारूण णवसदाइं सिरासदाणि य हवंति सत्तेव ।

देहम्मि मंसपेसीण हुंति पंचेव य सदाणि॥1034॥

चत्तारि सिराजालाणि हुंति सोलस य कंडराणि तहा ।

छच्चेव सिराकुच्चा देहे दो मंसरज्जू य॥1035॥

सत्त तयाओ कालेज्जयाणि सत्तेव होंति देहम्मि ।

देहम्मि रोमकोडीण होंति असीदि सदसहस्सा॥1036॥

पक्कामयासयत्था य अंतगुंजाओ सोलस हवंति ।

कुणिमस्स आसया सत्त हुंति देहे मणुस्सस्स॥1037॥

थूणाओ तिण्णि देहम्मि होंति सत्तुत्तरं च मम्मसदं ।

णव होंति वणमुहाइं णिच्चं कुणिमं सवंताइं॥1038॥

देहम्मि मच्छुलिंगं अंजलिमित्तं सयप्पमाणेण ।

अंजलिमित्तो मेदो उज्जोवि य तत्तिओ चेव॥1039॥

तिण्णि य वसंजलीओ छच्चेव य अंजलीओ पित्तस्स ।

सिंभो पित्तसमाणो लोहिदमद्धाढगं होदि॥1040॥

मुत्तं आढयमेत्तं उच्चारस्स य हवंति छप्पच्छा ।

वीसं णहाणि दंता बत्तीसं होंति पगदीए॥1041॥

किमिणो व वणो भरिदं सरीरं किमिकुलेहिं बहुगेहिं ।

सव्वं देहं अप्फंदिदूण वादा ठिदा पंच॥1042॥

एवं सव्वे देहम्मि अवयवा कुणिमपुगला चेव ।

एक्कं पि णत्थि अंगं पूयं सूचियं च जं होज्ज॥1043॥

जदि होज्ज मच्छियापत्तसरसियाए तयाए णो थगिदं ।

को णाम कुणिमभरियं सरीरमालद्धुमिच्छेज्ज॥1044॥

परिदट्ठसव्वचम्मं पंडुरगतं मुयंतवणरसियं ।

सुट्ठु वि दइदं महिलं दट्ठुपि णरो ण इच्छेज्ज॥1045॥

कण्णेषु कण्णगूधो जायदि अच्छीसु चिक्कणंसूणि ।

णासागूधो सिंधाणयं च णासापुडेसु तहा॥1046॥

खेलो पित्तो सिंभो वमिया जिभ्भामलो य दंतमलो ।

लाला जायदि तुंडम्मिणिच्चं मुत्तपुरिससुक्कमिदरत्थे॥1047॥

सेदो जादि सिलेसो व चिक्कणो सव्वरोमकूवेसु ।

जायंति जूवलिकखा छप्पदियासो य सेदेण॥1048॥

विट्ठापुण्णो भिण्णो व घडो कुणिमं समंतदो गलइ ।

पूदिंगालो किमिणोव वणो पूदिं च वादि सदा॥1049॥

इंगालो धोवंते ण सुज्झदि जहा मपयत्तेण ।

सव्वेहिं समुद्देहिम्मि सुज्झदि देहो ण धुव्वंतो॥1050॥

सिण्हाणुभंगुव्वट्टणेहिं मुहदंतअच्छिधुवणेहिं ।
णिच्चंपि धोवमाणो वादि सदा पूदियं देहो॥1051॥

पाहाणधादुअंजणपुढवितया छल्लिवल्लिमूलेहिं ।
मुहकेसवासतंबोल गंध मल्लेहिं धुवेहिं॥1052॥

अभिभूदुव्विगंधं परिभुज्जदि मोहिणहिं परदेहं ।
खज्जदि पूइयमं संजुत्तं जह कडुगभंडेण॥1053॥

अभंगदीहिं विणा सभावदो चेव जदि सरीरमिमं ।
सोभेज्ज मोरदेहुव्व होज्ज तो णाम से सोभा॥1054॥

जदि दा विहिंसदि णरो आलद्धं पडिदमप्पणो खेलं ।
कधदा णिपिवेज्ज बुधो महिलामुहजायकुणिमजलं॥1055॥

अंतो बहिं च मज्झे व कोइ सारो सरीरगे णत्थि ।
एरंडगो व देहो णिस्सारो सव्वहिं चेव॥1056॥

चमरीबालं खग्विसाणं गयदंतसप्पमणिगादी ।
दिट्ठो सारो ण य अत्थि कोइ सारो मणुयस्सदेहम्मि॥1057॥

छगलं मुत्तं दुद्धं गोणीए रोयणा य गोणस्स ।
सुचिया दिट्ठा ण य अत्थि किंचि सुचि मणुयदेहस्स॥1058॥

वाइयपित्तियसिंभियरोगा तण्हा छुहा समादी य ।
णिच्चं तवंति देहं अद्दहिदजलं व जह अग्गी॥1059॥

जदिदा रोगा एक्कम्मि चेव अच्छिम्मि होति छण्णउदी ।
सव्वम्मि दाइं देहे होदव्वं कदिहिं रोगेहिं॥1060॥

पंचेव य कोडीओ भवंति तह अट्ठसट्ठिलक्खाइं ।
णव णवदिं च सहस्सा पंचसया होति चुलसीदी॥1061॥

पीणत्थणिंदुवदणा जा पुव्वं णयणदइदिया आसे ।
सा चेव होदि संकुडिदंगी विरसा म परिजुण्णा॥1062॥

जा सव्वसुंदरंगी सविलासा पढमजोव्वणे कंता ।
सा चेव मदा संती होदि हु विरसा य बीभच्छा॥1063॥

मरदि सयं वा पुव्वं सा वा पुव्वं मदिज्ज से कंता ।
जीवंतस्स व सा जीवंती हरिज्ज बलिएहिं॥1064॥

सा वा हवे विरत्ता महिला अण्णेण सह पलाएज्ज ।
अपलायंति व तगी करिज्ज से देमणस्साणि॥1065॥

रूवाणि कट्ठकम्मादियाणि चिट्ठंति सारवेतस्स ।
धणिदं पि सारवेतस्स ठादि ण चिरं सरीरमिदं॥1066॥

मेघहिमफेणउक्कासंझाजल बुब्बुदो व मणुगाणं ।
इंदिय जोव्वणमदिरूवतेयबलवीरियमणिच्चं॥1067॥

साधुं पडिलाहेदुं गदस्स सुरयस्स अग्गमहिसीए ।
णट्ठं सदीए अंगं कोढेण जहा मुहुत्तेण॥1068॥

वज्झो य णिज्जमाणो जह पियइ सुरं व खादि तंबोलं ।
कालेण य णिज्जंता विसए सेवंति तह मूढा॥1069॥

वग्घपरद्धो लग्गो मूले य जहा ससप्पविलपडिदो ।
पडिदमधुबिंदुचक्खणरदिओ मूलम्मि छिज्जंते॥1070॥

तह चेव मच्चुवग्घपरद्धो बहुदुक्खसप्पबहुलम्मि ।
संसारबिले पडिदो आसामूलम्मि संलग्गो॥1071॥

बहुविग्घमूसएहिं आशामूलम्मि छिज्जंते ।
लेहदि विभयविलज्जो अप्पसुहं विसयमधुबिंदुं॥1072॥

बालो अमेज्झलित्तो अमेज्झमज्झम्मि चेव जह रमदि ।
तह रमदि णरो मूढो महिलामेज्झे सयममेज्झो॥1073॥

कुणिमरसकुणिमगंधं सेवित्ता महिलियाए कुणिमकुडी ।
जं होति सोचयत्ता एदं हासावहं तेसिं॥1074॥

एवं एदे अत्थे देहे चिंतंतयस्स पुरिसस्स ।
परदेह परिभोत्तुं इच्छा कह होज्ज संघिणस्स॥1075॥

एदे अत्थे सम्मं दोसं पिच्छंतओ णरो सधिणो ।
ससरीरे विरज्जइ किं पुण अण्णस्स देहम्मि॥1076॥

थेरा वा तरुणा का वुड्ढा सीलेहिं होति वुड्ढीहिं ।
थेरा वा तरुणा वा तरुणा सीलेहिं तरुणेहिं॥1077॥

जह जह वयपरिणामो तह तह णस्सदि णरस्स बलरूवं ।
मंदा य हवदि कामरदिदप्पकीडा य लोभे य॥1078॥

खोभेदि पत्थरो जह दहे पडंतो पसण्णमवि पंकं ।
खोभेइ तहा मोहं पसण्णमवि तरुणासंसग्गी॥1079॥

कुलुसीकदंपि उदगं अच्छं जह होइ कदयजोएण ।
कलुसो वि तहा मोहो उवसमदि हु वुड्ढसेवाए॥1080॥

लीणो वि मट्टियाए उदीरदि जलासयेण जह गंधो ।
लीणो उदीरदि णरे मोहो तरुणासयेण तहा॥1081॥

संतो वि मट्टियाए गंधो लीणो हवदि जलेण विणा ।
जह जह गुट्ठीए विणा णरस्स लीणो हवदि मोहो॥1082॥

तरुणो वि वुड्ढसीलो होदि णरो वुड्ढसंसिओ अचिरा ।
लज्जा संकामाणावमाण भयधम्म बुद्धीहिं॥1083॥

वुड्ढो वि तरुणसीलो होइ णारो तरसंसिओ अचिला ।
वीसंभणिव्विसंको समोहणिज्जो य पयडीए॥1084॥

सुंडयसंसग्गीए जह पादुं सुंडओऽभिलसदि सुरं ।
विसए तह पयडीए संमोहो तरुणगोट्ठीए॥1085॥

तरुणेहिं सह वसंतो चलिंदिओ चलमणो य वीसत्थो ।
अचिरेण सइरचारी पावदि महिलाकदं दोसं॥1086॥

पुरिसस्स अप्पसत्थो भावो तिहिं कारणेहिं संभवइ ।
वियरम्मि अंधयारे कुसीलसेवाए ससमक्खं॥1087॥

पासिय सुच्चा व सुरं पिज्जंतं सुंडओ भिलसदि जहा ।
विसए य तह समोहा पासिय सोच्चा व भिलसइ॥1088॥

जादो खु चारुदत्तो गोट्टीदोसेण तह विणीदो वि ।
गणियासत्तो मज्जासत्तो कुलदूसओ य तहा॥1089॥

तरुणस्स वि वेरग्गं पण्हाविज्जदि णरस्स बुद्धेहिं ।
पण्हाविज्जइ पाडच्छीवि हु वच्छस्स फरुसेण॥1090॥

परिहरइ तरुणगोट्टी विसं व वुद्धाउले य आयदणे ।
जो वसइ कुणइ गुरुणिद्देसं सो णिच्छरइ बंभं॥1091॥

आलोयणेण हियं पचलदि पुरिसस्स अप्पसारस्स ।
पेच्छंतयस्स बहुसो इत्थीथणजहणवदणाणि॥1092॥

लज्जं तदो विहिसं परिजयमथ णिव्विसंकिदं चेव ।
लज्जालुओ कमेणारुहंतओ होदि वीसत्थो॥1093॥

वीसत्थदाए पुरिसो बीसंभं महिलियासु उवयादि ।
वीसंभादो पणयो पणयादो रदि हवदि पच्छा॥1094॥

उल्लावसमुल्लावएहिं चा वि अल्लियणपेच्छणेहिं तहा ।
महिलासु सइरचारिस्स मणो अचिरेण खुभदि हु॥1095॥

ठिदिगदिविलासविभ्रमसहासचेट्टि दकडक्खदिट्ठीहिं ।

लीलाजुदिरदि सम्मेलणोवयारेहिं इत्थीणं॥1096॥

हासोवहासकीडारहस्स वीसत्थ जंपिएहिं तहा ।

लज्जामज्जादीणं मेरं पुरिसो अदिक्कमदि॥1097॥

ठाणगदिपेच्छिदुल्लावादी सव्वेसिमेव इत्थीणं ।

सविलासा चेव सदा पुरिसस्स मणोहरा हुंति॥1098॥

संसग्गीए पुरिसस्स अप्पसारस्स लद्धपसरस्स ।

अग्सिमीवे लक्खेव मणो लहुमेव हि विलाइ॥1099॥

संसग्गीसम्मूढो मेहुणसहिदो मणो हु दुम्मेरो ।

पुव्वावरमगणंतो लंघेज्ज सुसीलपायारं॥1100॥

इंदियकसायसण्णागारवगुरुया सभावदो सव्वे ।

संसग्गिलद्धपसरस्स ते उदीरंति अचिरेण॥1101॥

मादं सुदं च भगिणीमेगंते अल्लियंतगस्स मणो ।

खुभइ णारस्स सहसा किं पुण सेसासु महिलासु॥1102॥

जुण्णं पोच्चलमइलं रोगिय बीभस्सदंसणविवं ।

मेहुणपडिगं पच्छेदि मणो तिरियं च खु णरस्स॥1103॥

दिट्ठाणुभूदविसयाणं अभिलाससुमरणं सव्वं ।

एसा वि होइ महिलासंसग्गी इत्थिविरहम्मि॥1104॥

थेरो बहुस्सुदो दो पच्चई पमाणं गणी तवस्सिति ।
अचिरेण लभदि दोसं महिलावग्गम्मि वीसत्थो॥1105॥

किं पुण तरुणा अबहुस्सुदा य सदूरा बविगद वेसाय ।
महिला संसग्गीय णट्ठा अचिरेण हो हंति॥1106॥

सगडो हु जइणिगाए संसग्गीए दु चरणपभट्ठो ।
गणिया संसग्गीय य कूववारो तहा णट्ठो॥1107॥

रुद्धो परासरो सच्चईय रायरिसि देवपुत्तो य ।
महिलारूवालोई णट्ठा संसत्तदिट्ठीए॥1108॥

जो महिला संसग्गी विसवं दट्ठूण परिहरइ णिच्चं ।
णित्थरइ बंभचेरं जावज्जीवं अकंपा सो॥1109॥

सव्वम्मि इत्थिवग्गम्मि अप्पमत्तो सदा अबीभत्थो ।
बंभं निच्छरदि वदं चरित्तमूलं चरणसारं॥1110॥

किं मे जंपदि किं मे पस्सदि अण्णो कहं च वट्ठामि ।
इदि जो सदाणुपेक्खइ सो दढबंभव्वदी होदि॥1111॥

मज्झण्हतिक्खसूरं व इच्छिरूवं ण पासदि चिरं जो ।
खिप्पं पडिसंहरदि दिट्ठिं सो णिच्छरदि बंभं॥1112॥

एवं जो महिलाए सद्दे रूवे तहेव संफासे ।
ण चिरं सज्जदि दु मणं खु णिच्छरदि सो बंभं॥1113॥

इह परलोए जदि दे मेहुणविस्सुत्तिया हवे जण्हु ।

तो होहि तमुवउत्तो पंचविधे इत्थिवेरगगे॥1114॥

उदयम्मि जायवड्ढिय उदएण ण लिप्पदे जहा पउमं ।

तह विसएहिं ण लिप्पदि साहू विसएसु उसिओ वि॥1115॥

उग्गाहिंतस्सुदधिं अच्छेरमणोल्लणं जह जलेण ।

तह विसयजलमणोमच्छेरं विसयजलहिम्मि॥1116॥

मायागहणे बहुदोसमावए अलियदुमगणे भीमे ।

असुइतणिल्ले साहू ण विप्पणस्संति इत्थिवणे॥1117॥

सिंगारतरंगाए विलासवेगाए जोव्वणजलाए ।

विहसियफेणाए मुणी णारिणईए ण बुज्झंति॥1118॥

ते अदिसूरा जे ते विलाससलिलमदिचवलरदिवेगं ।

जोव्वणणईसु तिण्णा ण य गहिया इच्छिगाहेहिं॥1119॥

महिलावाहविमुक्का विलासपुंक्खा कडक्खदिट्ठिसरा ।

जण्ण वधंति सदा विसयवणचरं सो हवइ धण्णो॥1120॥

विव्वोगतिक्खदंतो विलासखंधो कडक्कदिट्ठिणहो ।

परिहरदि जोव्वणवणे जमित्थिवग्घो तगो धण्णो॥1121॥

तेल्लोक्काडविडहणो कामग्गी विसयरुक्खपज्जलिओ ।

जोव्वणतणिल्लचारी जं ण डहइ सो हवइ धण्णो॥1122॥

विसयसमुद्गं जोव्वणसलिलं हसियगइपेक्खिदुम्मीयं ।
धण्णा समुत्तरंति हु महिलामयरेहिं अच्छिक्का॥1123॥

अभंतरबाहिरए सव्वे गंथे तुमं विवज्जेहि ।
कदकारिदाणुमोदेहिं कायमणवयण जोगेहिं॥1124॥

मिच्छत्तवेदरागा तहेव हासादिया य छद्दोसा ।
चत्तारि तह कसाया चउदस अभंतरा गंथा॥1125॥

बाहिरसंगा खेत्तं वत्थुं धणधण्णकुप्पभंडाणि ।
दुपयचउप्पय जाणाणि चेव सयणासणे य तहा॥1126॥

जह कुण्डओ ण सक्को सोधेदुं तंदुलस्स सतुसस्स ।
तह जीवस्स ण सक्का मोहमलं संगसत्तस्स॥1127॥

रागो लोभो मोहो सण्णाओ गारवाणि य उदिण्णा ।
तो तइया घेत्तुं जे गंथे बुद्धि णरो कुणइ॥1128॥

चेलादिसव्वसंगच्चाओ पढमो हु होदि ठिदिकप्पो ।
इहपरलोइयदोसे सव्वे आवहदि संगो हु॥1129॥

देसामासियसुत्तं आचेलक्कंति तंखु ठिदिकप्पे ।
लुत्तोत्थ आदिसद्दो जह तालपलंबसुत्तम्मि॥1130॥

ण य होदि संजदो वत्थमित्तचागेण सेससंगेहिं ।
तह्मा आचेलक्कं चाओ सव्वेसि होइ संग्गाणं॥1131॥

संगणिमित्तं मारेइ अलियवयणं च भणइ तेणिकं ।
भजदि अपरिमिदमिच्छं सेवदि मेहुणमवि य जीवो॥1132॥

सण्णागारवपेसुण्णकलहफरुसाणि णिट्ठरविवादा ।
संगणिमित्तं ईसासूयासल्लाणि जायंति॥1133॥

कोधो माणो माया लोभो हास रइ अरदि भयसोगा ।
संगणिमित्तं जायइ दुगुंछ तह रादिभत्तं च॥1134॥

गंथो भयं णराणं सहोदरा एयरत्थजा जं ते ।
अण्णोण्णं मारेदुं अत्थणिमित्तं मदिमकासी॥1135॥

अत्थिणिमित्तमदिभयं जादं चोरणमेक्कमेक्केहिं ।
मज्जो मंसे य विसं संजोइय मारिया जं ते॥1136॥

संगो महाभयं जं विहेडिदो सावगेण संतेण ।
पुत्तेण चेव अत्थे हिदम्मि णिहिदेल्लए साहं॥1137॥

दूओ बंभण वग्घो लोओ हत्थी य तह य रीयसुयं ।
परियणरो वि य राया सुवण्णरयणस्स अक्खाणं॥1138॥

वण्णरणउलो विज्जो वसहो तावस तहेव चूदवणं ।
रक्खसिवण्णीडुंडुह मेदज्ज मुणिस्स अक्खाणं॥1139॥

सीदुण्हादववादं वरिसं तण्हा छुहासमं पंथं ।
दुस्सेज्जं दुज्झत्तं सहइ वहइ भारमवि गुरुयं॥1140॥

गावइ णच्चइ धावइ कसइ ववइ लवदि तह मलेइ णरो ।
तुण्णदि विणइ याचइ कुलम्मि जादो वि गंथत्थी॥1141॥

सेवइ णियादि रक्खइ गोमहिसिमजावियं हयं हत्थिं ।
ववहरदि कुणदि सिप्पं अहो य रत्ती य गयणिदो॥1142॥

आउधवासस्स उरं देइ रणमुहम्मि गंथलोभादो ।
मगरादिभीमसावदबहुलं अदिगच्छदि समुद्धं॥1143॥

जदि सो तत्थ मरिज्जो गंथो भोगा य कस्स ते होज्ज ।
महिलाविहिंसणिज्जो लूसिददेहो व सो होज्ज॥1144॥

गंथणिमित्तमदीदिय गुहाओ भीमाओ तह य अडवीओ ।
गंथणिमित्तं कम्मं कुणइ अकादव्वयंपि णरो॥1145॥

सूरो तिकखो मुखो वि होइ वसिओ जणस्स सघणस्स ।
माणी वि सहइ गंथणिमित्तं बहुयं पि अवमाणं॥1146॥

गंथणिमित्तं घोरं परितावं पाविदूण कंपिल्ले ।
लल्लक्कं संपत्तो णिरयं पिण्णागगंधो खु॥1147॥

एवं चेदुत्तस्स वि संसइदो चेव गंथलाहो दु ।
ण य संचीयदि गंथो सुइरेणवि मंदभागस्स॥1148॥

जदि वि कहंचि वि गंथा संचीएजण्ह तह वि से णत्थि ।
तित्ती गंथेहिं सदा लोभो लाभेण वड्ढदि खु॥1149॥

जध इंधणेहिं अग्गी लवणसमुद्धो णदीसहस्सेहिं ।
तह जीवस्स ण तित्ती अत्थि तिलोगे वि लद्धम्मि॥1150॥

पडहत्थस्स ण तित्ती आसी य महाधणस्स लुद्धस्स ।
संगेसु मुच्छिदमदी जादो सो दीहसंसारी॥1151॥

तित्तीए असंतीए हाहाभूदस्स घण्णचित्तस्स ।
किं तत्थ होज्ज सुक्खं सदा वि पंपाए गहिदस्स॥1152॥

हम्मदि मारिज्जदि वा बज्झदि रुंभदि य अणवराधे वि ।
आमिसहेदुं घण्णो खज्जदि पक्खीहिं जह पक्खी॥1153॥

मादुपिदुपुत्तदारेसु वि पुरिसो ण उवयाइ वीसंभं ।
गंथणिमित्तं जग्गइ रक्खंतो सव्वरत्तीए॥1154॥

सव्वं पि संकमाणो गामेणयरे घरे व रण्णे वा ।
आधारमग्गणपरो अणप्पवसिओ सदा होइ॥1155॥

गंथपडियाए लुद्धो धीराचरियं विचित्तमावसधं ।
णेच्छदि बहुजणमज्झे वसदि य सागारिगावसए॥1156॥

सोदूण किंचिसद्वं सग्गंथो होइ उट्ठिदो सहसा ।
सव्वत्तो पिच्छंतो परिमसदि पलादि मुज्झदि य॥1157॥

तेणभएणारोहइ तरुं गिरिं उप्पहेण व पलादि ।
पविसदि य दहं दुग्गं जीवाण वहं करेमाणो॥1158॥

तह वि य चोरा चारभडा वा गच्छं हरेज्ज अवसस्स ।
गेण्हज्ज दाइया वा रायाणो वा विलुं पिज्ज ॥ 1159 ॥

संगणिमित्तं कुद्धो कलहं रोलं करिज्ज वेरं वा ।
पहणेज्ज व मारेज्ज व मारिजेज्ज व तह य हम्मेज्ज ॥ 1160 ॥

अहवा होइ विणासो गंथस्स जलग्गिमूसयादीहिं ।
णट्ठे गंथे य पुणो तिव्वं पुरिसो लहदि दुक्खं ॥ 1161 ॥

सोयइ विलबइ कंदइ णट्ठे गंथम्मि होइ विसण्णो ।
पज्झादि णिवाइज्जइ वेवइ उक्कंठिओ होइ ॥ 1162 ॥

डज्झदि अंतो पुरिसो अप्पिए णट्ठे सगम्मि गंथम्मि ।
वायावि य अक्खिप्पइ बुद्धी विय होइ से मूढा ॥ 1163 ॥

उम्मत्तो होइ णरो णट्ठे गंथे गहोवसिट्ठो वा ।
घट्टदि मरुप्पवादादि एहिं बहुधा णरो मरिदं ॥ 1164 ॥

चेलादीया संग्गा संसज्जंति विविहेहिं जंतूहिं ।
आगंतुगा वि जंतू हवंति गंथेसु सण्णिहिदा ॥ 1165 ॥

आदाणे णिक्खेवे सरेमणे चावि तेसिं गंथाणं ।
उक्कस्सणे वेक्कसणे फालणपप्फोडणे चेव ॥ 1166 ॥

छेदणबंधणवेढण - आदावणधोव्वणादिकिरियासु ।
संघट्टणपरिदावणहणणादी होदि जीवाणं ॥ 1167 ॥

जदि वि विकिंचदि जंतू दोसा ते चेव हुंति से लगा ।
होदि य विकिंचणे वि हु तज्जोणिविओजणाणियं॥1168॥

सच्चित्ता पुण गंथा वधंति जीवे सयं च दुक्खंति ।
पावं च तण्णिमित्तं परिणिहंतस्स से होई॥1169॥

इंदियमयं सरीरं गंधं गेण्हदि य देहसुक्खत्थं ।
इंदियसुहाभिलासो गंधग्गहणेण तो सिद्धो॥1170॥

गंधस्स गहणरक्खणसारवणाणि णियदं करेमाणो ।
विक्खित्तमणो ज्ञाणं उवेदि कह मुक्कसज्झाओ॥1171॥

गंधेसु घडिदहिदओ होइ दरिदो भवेसु बहुगेसु ।
होदि कुणंतो णिच्चं कम्मं आहारहेदुम्मि॥1172॥

विविहाओ जायणाओ पावदि परभवगदो वि धणहेदुं ।
लुद्धो पंपागहिदो हाहाभूदो किलिस्सदि य॥1173॥

एदेसिं दोसाणं मुंचइ गंधजहणेण सव्वेसिं ।
तव्विवरीया य गुणा लभदि य गंधस्स जहणेण॥1174॥

गंधच्चाओ इंदियणिवारणे अंकुसो व हत्थिस्स ।
णयरस्स खाइया वि य इंदियगुत्तो असंगत्तं॥1175॥

सप्पबहुलम्मि रण्णे अमंतविज्जोसहो जहा पुरिसो ।
होइ दढमप्पमत्तो तह णिगंधो वि विसएसु॥1176॥

रागो हवे मणुण्णे विसए दोसो य होइ अमणुण्णे ।

गंथच्चाएण पुणो रागद्वोसा हवे चत्ता॥1177॥

सीदुण्हदंसमसयादियाण दिण्णो परीसहाण उरो ।

सीदादिणिवारणए गंथे णिययं जहंतेण॥1178॥

जम्हा णिगंथो सो वादादवसीददंसमसयाणं ।

सहदि य विविधा बाधा तेण सदेहे अणादरदा॥1179॥

संगपरिमग्गणादी णिस्संगे णत्थि सव्वविक्खेवा ।

ज्झाणज्झेणाणि तओ तस्स अविग्घेण वच्चंति॥1180॥

गंथच्चाएण पुणो भावविसुद्धी वि दीविदा होइ ।

ण हु संगघडिदबुद्धी संगे जहिदंु कुणदि बुद्धी॥1181॥

णिस्संगो चेव सदा कसायसल्लेहणं कुणदि भिक्खू ।

संगा हु उदीरंति कसाए अग्गीव कट्ठाणि॥1182॥

सव्वत्थ होइ लहुगो रूवं विस्सासियं हवदि तस्स ।

गुरुगो ही संगसत्तो संकिज्जइ चावि सव्वत्थ॥1183॥

सव्वत्थ अप्पवसिओ णिस्संगो णिब्भओ य सव्वत्थ ।

होदि य णिप्परियम्मो णिप्पडिकम्मो य सव्वत्थ॥1184॥

भारक्कंतो पुरिसो भारं ऊरुहिय णिव्वुदो होइ ।

जह तह पयहिय गंथे णिस्संगो णिव्वुदो होइ॥1185॥

तह्या सव्वे संगे अणागए वड्डमाणए तीदे ।
तं सव्वत्थ णिवारहि करणकारावणाणुमोदेहिं॥1186॥

जावंति केइ संग्गा विराधया तिविहकालसंभूदा ।
तेहिं तिविहेण विरदो विमुत्तसंगो जह सरीरं॥1187॥

एवं कदकरणिज्जो तिकालतिविहेण चेव सव्वत्थ ।
आसं तण्हं संगं छिंद ममत्तिं च मुच्छं च॥1188॥

सव्वग्गंथविमुक्को सीदीभूदो पसण्णचित्तो य ।
जं पावइ पीयिसुहं ण चक्कवट्ठी वि तं लहइ॥1189॥

रागविवागसतण्णादिगिद्धि अवतित्ति चक्कवट्ठिसुहं ।
णिस्संगणिव्वुइसुहस्स कहं अग्घइ अणंतभागं पि॥1190॥

सार्धेति जं महत्थं आयरिदाइं च जं महल्लेहिं ।
जं च महल्लाहं सयं महव्वदाहं हवे ताइं॥1191॥

तेसिं चेव वंदाणं रक्खट्ठं णदिभोयणणियत्ती ।
अठुप्पवयणमादाओ भावणाओ य सव्वाओ॥1192॥

तेसिं पंचण्हं पि य अहयाणमावज्जणं व संका वा ।
आदविवत्ती य हवे णदीभत्तप्पसंगम्मि॥1193॥

अण्हयदारीपरमणदरस्स गुत्तीओ होंति तिण्णेव ।
चेट्ठिदुकामस्स पुणो समिदीओ पंच दिट्ठाओ॥1194॥

जा रागादिणियत्ती मणस्स जाणाहि तं मणोगुत्तिं ।
अलियादिणियत्ती वा मोणं वा होइ वचिगुत्ती॥1195॥

कायकिरियाणियत्ती काउस्सगो सरीरगे गुत्ती ।
हिंसादिणियत्ती वा सरीरगुत्ती हवदि दिट्ठा॥1196॥

छेत्तस्स वदी णयरस्स खाइया अहव होइ पायारो ।
तह पावस्स णिरोहो ताओ गुत्तीओ साहुस्स॥1197॥

तह्मा तिविहेण तुमं मणवचिकायप्पओगजोगम्मि ।
होहि सुसमाहिदमदी णिरंतरं ज्झाणसज्झाए॥1198॥

मग्गुज्जोदुपओगालम्बणसुद्धीहिं इरियदो मुणिणो ।
सुत्ताणुवीचि भणिदा इरियासमिदी पवयणम्मि॥1199॥

सच्चं असच्चमोसं अलियादीदोसवज्जमणवज्जं ।
वदमाणस्सणुवीची भासासमिदी हवदि सुद्धा॥1200॥

जणावदसंमदिठवणा णामे रूवे पडुच्चववहारे ।
संभावणववहारे भावेणोपम्मसच्चेण॥1201॥

तव्विवरीदं मोसं तं उभयं जत्थ सच्चमोसं तं ।
तव्विवरीया भासा असच्चमोसा हवे दिट्ठा॥1202॥

आमंतणि आणवणी जायणि संपुच्छणी य पण्णवणी ।
पच्चक्खाणी भासा भासा इच्छाणुलोभा य॥1203॥

संसयवयणी य तहा असच्चमोसा य अठुमी भासा ।
णवमी अणक्खरगदा असच्चमोसा हवदि णेया॥1204॥

उग्गमउप्पायणएसणाहिं पिंडमुवधि सेज्जं च ।
सोधितस्स य मुणिणो विसुज्झए एसणासमिदी॥1205॥

सहसाणाभोगिददुप्पमज्जिय अपच्चवेसणा दोसो ।
परिहरमाणस्स हवे समिदी आदाणणिक्खेवो॥1206॥

एदेण चेव पदिठ्ठावणसमिदीवि वण्णियसा होदि ।
वोसरणिज्जं दव्वं थंडिल्ले वोसरितस्स॥1207॥

एदाहिं सदा जुत्तो समिदीहिं जगम्मि विहरमाणो हु ।
हिसादाहिं ण लिप्पइ जीवणिकायाउले साहू॥1208॥

पउमणिपत्तं व जहा उदयेण ण लिप्पदि सिणेहगुणजुत्तं ।
तह समिदीहिं ण लिप्पइ साधू काएसु इरियंतो॥1209॥

सरवासे वि पडंते जह दढकवचनो ण विज्झदि सरेहिं ।
तह समिदीहिं ण लिप्पइ साधू काएसु इरियंतो॥1210॥

जत्थेव चरइ बालो परिहारण्हू वि चरइ तत्थेव ।
बज्झदि पुण सो बालो परिहारण्हू वि मुच्चइ सो॥1211॥

तह्मा चेद्धिदुकामो जइया तइया भवाहिं तं समिदो ।
समिदो हु अण्णमण्णं णादियदि खवेदि पोराणं॥1212॥

एदाओ अठुपवयणमादाओ णाणदंसणचरित्तं ।
रक्खंति सदा मुणिणो मादा पुत्तं व पयदाओ॥1213॥

एसणणिक्खेवादाणिरियासमिदी तहा मणोगुत्ती ।
आलोयभोयणं वि य अहिंसाए भावणा होति॥1214॥

कोधभयलोभहस्सपदिण्णा अणुवीचिभासणं चेव ।
विदियस्स भावणाओ वदस्स पंचेव ता होति॥1215॥

अणणुण्णादग्गहणं असंगबुद्धी अणुण्णवित्ता वि ।
एदावंतियउग्गहजायण मध उग्गहाणुस्स॥1216॥

वज्जणमणणुणदगिहप्पवेसस्स गोयरादीसु ।
उग्गहजायणमणुवीचिए तहा भावणा तइए॥1217॥

महिलालोयणपुव्वरदिसरणं संसत्तवसहिविकहाहिं ।
पणिदरसेहिं य विरदी भावणा पंच बंभस्स॥1218॥

अपडिग्गहस्स मुणिणो सद्दफरिसरसयरूवगंधेसु ।
रागद्वोसादीणां परिहारो भावणा हुंति॥1219॥

ण करेदि भावणाभाविदो खु पीडं वदाण सव्वेसिं ।
साधु पासुत्तो समुद्धो व किमिदाणि वेदंतो॥1220॥

एदाहिं भावणाहिं हु तह्मा भावेहिं अप्पमतो तं ।
अच्छिद्वाणि अखंडाणि ते भविस्संति हु वदाणि॥1221॥

गिस्सल्लस्सेव पुणो महव्वदाइं हवंति सव्वाइं ।
वदमुवहम्मदि तीहिं दु णिदाणमिच्छत्तमायाहिं॥1222॥

तत्थं णिदणं तिविहं होइ पसत्थापसत्थ भोगकदं ।
तिविधंपि तं णिदाणं परिपंथो सिद्धिमग्गस्स॥1223॥

संजमहेदु पुरिसत्तसत्तबलविरियसंददणबुद्धी ।
साव अबंधुकुलादीणि णिदाणं होदि हु पसत्थं॥1224॥

उमाणेण जाइकुलरूवमादि आइरियगणधरजिणत्तं ।
सोभग्गाणादेयं पत्थंेतो अप्पसत्थं तु॥1225॥

कुद्धो वि अप्पसत्थं मरणे पच्छेइ परवधादीयं ।
जह उग्गसेणघादे कदं णिदाणं वसिठ्ठेण॥1226॥

देविगमाणुसभोगो णारिस्सरसिठ्ठिसत्थवाहत्तं ।
केसवचक्कधरत्तं पच्छंतो होदि भोगकदं॥1227॥

संजमहिरारूढो घोरतवपरक्कमो तिगुत्तोवि ।
पगरिज्ज जइ णिदाणं सोवि य वट्ठेइ दीहसंसारं॥1228॥

जो अप्पसुक्खहेदुं कुणइ णिदाणमविगणियपरमसुहं ।
सो कागणीए विक्केइ मणिं बहुकोडिसयमोल्लं॥1229॥

सो भिंदइ लोहत्थं णावं भिंदइ मणिं च सुत्तत्थं ।
छारकदे गोसीरं डहदि णिदाणं खु जो कुणदि॥1230॥

कोढी संतो लद्धूण डहइ उच्छुं रसायणं एसो ।

सो सामण्णं णासेइ भोगहेदुं णिदाणेण॥1231॥

पुरिसत्तादिणिदाणं पि मोक्खकामा मुणी ण इच्छंति ।

जं पुरिसत्ताइमओ भावो भवमओ य संसारो॥1232॥

दुक्खक्खयकम्मक्खयसमाधिमरणं च बोधिलाभो य ।

एयं पत्थेयव्वं ण पच्छणीयं तओ अण्णं॥1233॥

पुरिसत्तादीणि पुणो संजमलाभो य होइ परलोए ।

आराधयस्स णियमा तदत्थमकदे णिदाणे वि॥1234॥

माणस्स भंजणात्थं चिंतेदव्वो सरीरणिव्वेदो ।

दोसा माणस्स तहा तहेव संसारणिव्वेदो॥1235॥

कालमणंतं णीचागोदो होदूण लहइ सगिमुच्चं ।

जोणीमिदरसलागं ताओ वि गदा अणंताओ॥1236॥

उच्चासु व णीचासु व जोणीसु ण तस्स अत्थि जीवस्स ।

वट्ठी वा हाणी वा सव्वत्थ वि तित्तिओ चेव॥1237॥

णीचो वि होइ उच्चो उच्चो णीचतणं पुण उवेइ ।

जीवाणं खु कुलाइं पधियस्स व विस्समंताणं॥1238॥

बहुसो वि लद्धविजडे को उच्चतम्मि विभओ णाम ।

बहुसो वि लद्धविजडे णीचत्ते चावि किं दुक्खं॥1239॥

उच्चत्तणम्मि पीदी संकप्पवसेण होइ जीवस्स ।
णीचत्तणे ण दुक्खं तह होइ कसायबहुलस्स॥1240॥

उच्चत्तणं व जो णीचत्तं पिच्छेज्ज भावदो तस्स ।
उच्चत्तणे य णीचत्तणे वि पीदी ण किं होज्ज॥1241॥

णीच्चत्तणं व जो उच्चत्तं पेच्छेज्ज भावदो तस्स ।
णीचत्तणेव उच्चत्तणे वि दुक्खं ण किं होज्ज॥1242॥

तह्मा ण उच्चणीचत्तणाइं पीदिं करेति दुक्खं वा ।
संकप्पो से पीदीं करेदि दुक्खं च जीवस्स॥1243॥

कुणदि य माणो णीचागोदं पुरिसं भवेसु बहुएसु ।
पत्ता हु णीचजोणी बहुसो माणेण लच्छिमदी॥1244॥

पूयावमाणरूवविरूवं सुभगत्तदुभगत्तं च ।
आणाणाणा य तहा विधिणा तेणे व पडिसेज्ज॥1245॥

इच्चेवमादि अविचिंतयदो माणो हवेज्ज पुरिसस्स ।
एदे सम्मं अत्थे पसदो णो होइ माणो हु॥1246॥

जइदा उच्चत्तादिणिदाणं संसारवड्ढणं होदि ।
कह दीहं ण करिस्सदि संसारं परवधणिदाणं॥1247॥

आयरियत्तादिणिदाणं वि कदे णत्थि तस्स तम्मि भवे ।
धणिदं पि संजमंतस्स झिज्झणं माणदोसेण॥1248॥

भोगा चिंतेदव्वा किंपाकफलोवमा कडुविवागा ।
महुरा व भुंजमाणा मज्झे बहुदुक्खभयपउरा॥1249॥

भोगणिदाणेण य सामण्णं भोगत्थमेव होइ कदं ।
साहोलंवो जह अत्थिदो वि णेको वि भोगत्थं॥1250॥

आवडणत्थं जह ओसरणं मेसस्स होइ मे सादो ।
सणिदाणबंभचेरं अब्बंभत्थं तहा होइ॥1251॥

जह वाणिया य पणियं लाभत्थं विक्किणंति लोभेण ।
भोगाण पणिद भूदो सणिदाणो होइ तह धम्मो॥1252॥

सपरिग्गहस्स अब्बंचरिणो अविरदस्स से मणसा ।
काएण सीलवहणं होदि हु णडसमणरूवं व॥1253॥

रोगं कंखेज्ज जहा पडियार सुहस्स कारणे कोई ।
तह अण्णेसदि दुक्खं सणिदाणो भोगतण्हाए॥1254॥

खंदेणए आसणत्थं वहेज्ज गरुगं सिलं जहा कोई ।
तह भोगत्थं होदि दु संजमवहणं णिदाणेण॥1255॥

भोगोव भोगसोक्खं जं जं दुक्खं च भोगणासम्मि ।
एदेसु भोगणासे जातं दुक्खं पडिविसिट्ठं॥1256॥

देहे छुहादिमहिदे चले य सत्तस्स होज्ज कह सोक्खं ।
दुक्खस्स य पडियारो रहस्सणं चेव सोक्खंखु॥1257॥

जह कोडिल्ल अग्गिं तप्पंतो णेव उवसम लभदि ।

तह भोगे भुंजंतो खणं वि णो उवसमं लभदि॥1258॥

सोक्खं अणपेक्खित्ता बाधादि दुक्खमणुगंपि जह पुरिसं ।

तह अणपेक्खिय दुक्खं णत्थि सुहं णाम लोगम्मि॥1259॥

कच्छुं कंडुयमाणो सुहाभिमाणं करेदि जह दुक्खे ।

दुक्खे सुहाभिमाणं मेहुण आदीहिं कुणदि तहा॥1260॥

घोसादकीं य जह किमि खंतो मधुरित्ति मण्णदि वराओ ।

तह दुक्खं वेदंतो मण्णइ सुक्खं जणो कामी॥1261॥

सुठ्ठु वि मग्गिज्जंतो कत्थ वि कयलीए णत्थि जह सारो ।

तह णत्थि सुहं मग्गिज्जंतो भोगेसु अप्पं पि॥1262॥

ण लहदि जह लेहंतो सुक्खल्लय मट्ठियं रसं सुणहो ।

से सगतालुगरुहिरं लेहंतो मण्णए सुक्खं॥1263॥

महिलादि भोगसेवी ण लहदि किंचिवि सुहं तथा पुरिसो ।

सो मण्णदे वराओ सगकाय परिस्समं सुक्खं॥1264॥

तह अप्पं भोगसुहं जह धावंतस्स अहिदवेगस्स ।

गिम्हे दण्हातत्तस्स होज्ज छायासुहं अप्पं॥1265॥

अहवा अप्पं आसाससुहं सरिदाए दप्पियंतस्स ।

भूमिच्छिक्कंगुट्ठस्स उभमाणस्स होदि सोत्तेण॥1266॥

दीसइ जलं व मयतण्हिया हु जह वणमयस्स तिसिदस्स ।

भोगा सुहं व दीसंति तह य रागेण तिसियस्स॥1267॥

वग्घो सुखेज्ज मदयं अवगासेऊण जह मसाणम्मि ।

तह कुणिमदेहसंपंसणेण अबुहा सुखायंति॥1268॥

जावंति केइ भोगा पत्त सव्वे अणंतखुत्ता ते ।

को णाम तत्थ भोगेसु विंभओ लद्धविजडेसु॥1269॥

जह जह भुंजइ भोगे तह तह भोगेसु वड्ढे तण्हा ।

अग्गीव इंधणाइं तण्हं दीविंति से भोगा॥1270॥

जीवस्स णत्थि तित्ती चिरंपि भोगहिं भुज्जमाणेहिं ।

तित्तीए विणा चित्तं उव्वूरं उव्वुदं होइ॥1271॥

जह इंधणोहिं अग्गी जह व समुद्धो णदीसहस्सेहिं ।

तह जीवा ण हु सक्का तिप्पेदुं कामभोगेहिं॥1272॥

देविंदचक्कवट्टी य वासुदेवा य भोगभूमीया ।

भोगेहिं ण तिप्पंति हु तिप्पदि भोगेसु किह अण्णी॥1273॥

संपत्तिविवत्तीसु य अज्जणरक्खणपरिग्गहादीसु ।

भोगत्थं होदि णरो उद्धयचित्तो य घण्णो य॥1274॥

उद्धयमणस्स ण सुहं सुहेण य विणा कुदो हवदि पीदो ।

पीदीए विणा ण रदी उद्धयचित्तस्स घण्णस्स॥1275॥

जो पुण इच्छदि रमिदुं अज्झप्पसुहम्मि णिवुदिकरम्मि ।
कुणदि रदिं उवसंतो अज्झप्पसमा हु णत्थि रदी॥1276॥

अप्पायत्ता अज्झपरदी भोगरमणं परायत्तं ।
भोगरदीए चइदो होदि ण अज्झप्परमणेण॥1277॥

भोगरदीए णासो णियदो विग्घा य होति अदिवहुगा ।
अज्झप्परदीए सुभाविदाए णासो ण विग्घो वा॥1278॥

दुक्खं उप्पादिंता पुरिसा पुरिसस्स होदि जदि सत्तू ।
अदिदुक्खं कदमाणा भोगा सत्तू किह ण हुंती॥1279॥

इधरं परलोगे वा सत्तू मित्तत्तणं पुणमुवेति ।
इधरं परलोगे वा सदाइ दुखावहा भोगा॥1280॥

एगम्मि चेव देहे करेज्ज दुक्खं ण वा करेज्ज अरी ।
भोगासे पुण दुक्खं करिंत भवकोडिकोडीसु॥1281॥

मधुमेव पिच्छदि जहा तडिओलंबो ण पिच्छदि पपादं ।
तह सणिदाणो भोगे पिच्छदि ण हु दीहसंसारं॥1282॥

जालस्स जहा अंते रमंति मच्छा भयं अयाणंता ।
तह संगादिसु जीवा रमंति संसारमगणंता॥1283॥

दुक्खेण देवमाणुसभोगे लद्धूण चावि परिडिदो ।
णियदिमदीदि कुजोणीं जीवो सघरं पउत्थो वा॥1284॥

जीवस्स कुजोणिगदस्स तस्स दुक्खाणि वेदयंतस्स ।

किं ते करंति भोगा मदोव वेज्जो मरंतस्स॥1285॥

जह सुत्तवद्धसउणो दूरंपि गदो पुणो व एदि तहिं ।

तह संसारमदीदि हु दूरंपि गदो णिदाणगदो॥1286॥

दाऊण जहा अत्थं रोधणमुक्को सुहं घरे वसइ ।

पत्ते समये य पुणो रुम्भइ तह चेव धारणियो॥1287॥

तह सासणं किच्चा किलेसमुक्कं सुहं वसइ सग्गे ।

संसारमेव गच्छइ तत्तो य चुदो णिदाण कदो॥1288॥

संभूदो वि णिदाणेण देवसुक्खं च चक्कहरसुक्खं ।

पत्तो तत्तो य चुदो उववण्णो णिरयवासम्मि॥1289॥

णच्चा दुरंतमद्धु यमत्ताणमतिप्पयं अविस्सायं ।

भोगसुहं तो तम्हा विरदो मोक्खे मदिं कुज्जा॥1290॥

अणिदाणेय मुणिवरो दंसणणणाणचरणं विसोधेदि ।

तो सुद्धणाण चरणो तवसा कम्मक्खयं कुणइ॥1291॥

इच्चेव मेद मविचिंतयदो होज्ज हु णिदाणकरणमदी ।

इच्चेवं पस्संतो ण हु होदि णिदाणकरणमदी॥1292॥

मायासल्लस्सालोयणाधियारम्मि वण्णिदा दोसा ।

मिच्छत्तसल्लदोसा सय पुव्वमुववणिणया सव्वे॥1293॥

पञ्चदशविलाभा मायासल्लेण असि पूदिमुही ।
दासी सागरदत्तस्स पुप्फदंता हु विरदा वि॥1294॥

मिच्छत्तसल्लदोसा पियधम्मो साधुवच्छलो संतो ।
बहुदुक्खे संसारे सुचिरं पडिहिंदिओ मरिची॥1295॥

इय पव्वज्जामंडि समिदि बइल्लं तिगुलिदिढचक्कं ।
रादिय भोयण उद्धं सम्मत्तक्खं सणाणधुरं॥1296॥

वदभंडभरिदमारुहिद साधुसत्थेण पत्थिदो समयं ।
णिव्वाणभंडहेदु सिद्धपुरी साधुवाणियओ॥1297॥

आयरियसत्थवाहेण णिज्जउत्तेण सारविज्जंतो ।
सो साहुवग्गसत्थो संसारमहाडविं तरइ॥1298॥

तो भावणादियंतं रक्खदि तं साधुसत्थमाउत्तं ।
इंदिय चोरेहिंतो कसाय बहुसावदेहिंतो॥1299॥

विसयाडवीए मज्झे ओहीणो जो पमाद दोसेण ।
इंदियचोरा तो से चरित्तभंडं विलुंपंति॥1300॥

अहवा तल्लिच्छाइं कूराइं कसायसावदाइं तं ।
खज्जंति असंजमदाढाइं किले सादि दंसेहिं॥1301॥

ओसण्णसेवणाओ पडिसेवंतो असंजदो होइ ।
सिद्धिपहपच्छिदाओ ओहीणो साधुसत्थादो॥1302॥

इंदियकसायगुरुगत्तणेण सुहसील भाविदो समणो ।
करणालसो भवित्ता सेवदि ओसण्णसेवाओ॥1303॥

केई गहिदा इंदियचोरेहिं कसायसावदेहिं वा ।
पंथं छंडिय णिज्जंति साधुसत्थस्स पासम्मि॥1304॥

तो साधुसत्थपंथं छंडिय पासम्मि णिज्जमाणा ते ।
गारवगहणकुडिल्ले पडिदा पावेति दुक्खाणि॥1305॥

सल्लविसकंटसहिं विद्धा पडिदा पडंति दुक्खेसु ।
विवसकंटयविद्धा वा पडिदा अडवीए एगागी॥1306॥

पंथं छंडिय सो जादि साधुसत्थस्स चेव पासाओ ।
जो पडिसेवदि पासत्थसेवणाओ हु णिद्धम्मो॥1307॥

इंदियकसायगुरुयत्तणेण चरणं तणं व पस्संतो ।
णिद्धम्मो हुसवित्ता सेवदि पासत्थसेवाओ॥1308॥

इंदिचोरपरद्धा कसाय साबदभएण वा कई ।
उम्मगेण पलायंति साधुसत्थस्स दूरेण॥1309॥

तो ते कुसीलपडिसेवणावणे उप्पधेण धावंता ।
सण्णाणदीसु पडिदा किलेससुत्तेण वुट्ठंति॥1310॥

सण्णाणदीसु ऊढा वुट्ठा थाहं कहंपि अलहंता ।
तो ते संसाररोदधिमदंति बहुदुक्खभीसम्मि॥1311॥

आसागिरिदुग्गाणि य अगिम्म तिदंडकक्खडसिलासु ।

ऊलोडिदपभट्टा खुप्पंति अणंतियं कालं॥1312॥

बहुपावकम्मकरणाडवीसु महादीसु विप्पणट्टा वा ।

अद्धिट्ठणिव्वुदिपधा भमंति सुचिरं पि तत्थेव॥1313॥

देरेण साधुसत्थं छंडिय सो उप्पथेण खु पलादि ।

सेवदि कुसीलपडिसेवणाओ जो सुत्तदिट्ठाओ॥1314॥

इंदियकसायगुरुगत्तणेण चरणं तणं व पस्संतो ।

णिद्वंधसो भवित्ता सेवदि हु कुसील सेवाओ॥1315॥

सिद्धिपुरमुवल्लीणा वि केइ इंदियकसाय चोरेहिं ।

पविलुत्तचरणभंडा उवहदमाणाट्ट णिवदंति॥1316॥

तो ते सीलदरिद्धा दुक्खमणंतं सदा वि पावंति ।

बहुपरियणो दरिद्धो पावदि तिव्वं जधा दुक्खं॥1317॥

सो होदि साधुसत्थादु णिग्गदो जो भवे जधाछंदो ।

उस्सुत्तमणुवदिट्ठं च जधिच्छाए विकप्पंतो॥1318॥

जो होदि जधाछंदो हु तस्स धणिदं पि संजमिंतस्स ।

णत्थि दु चरणं खु होदि सम्मत्तसहचारी॥1319॥

इंदियकसायगुरुगत्तणेण सुत्तं पमाणमकरंतो ।

परिमाणेदि जिणुत्ते अत्थे सच्छंददो चेव॥1320॥

इंदियकसायदोसेहिं अधवा सहमण्णजोगपरितंतो ।
जो उव्वायदि सो होदि णियत्तो साधुसत्थादो॥1321॥

इंदियकसायवसिया केई ठाणाणि ताणि सव्वाणि ।
पाविज्जंतो दोसेहिं तेहिं सव्वेहिं संसत्ता॥1322॥

इय एदे पंचविधा जिणेहिं सवणा दुगुंछिदा सुत्ते ।
इंदियकसायगुरुयत्तणेण णिच्चं पि पडिकुद्धा॥1323॥

दुठ्ठा चवला अदिदुज्जया य णिच्चं पि समणुबद्धा य ।
दुक्खावहा य भीमा जीवाणं इंदियकसाया॥1324॥

तरुतेल्लंपि पियंतो वत्थो जह वादि पूदियं गंधं ।
तथ दिक्खिदो वि इंदियकसाय गंधं वहदि कोई॥1325॥

भुंजंतो वि सुमोयणमिच्छदि जध सूयरो समलमेव ।
तथ दिक्खिदो वि इंदियकसायमलिणो हवदि कोइ॥1326॥

वाह भएण पलादो जूहं दट्ठण वागुरापडिदं ।
सयमेव मआ वागुरमदीदि जह जूहतण्हाए॥1327॥

पंजरमुक्को सउणो सुइरं आरामए सुविहरंतो ।
सयमेव पुणो पंजरमदीदि जध णीडतण्हाए॥1328॥

कलभो गएण पंकादुद्धरिदो दुत्तरादु बलिएण ।
सयमेव पुणो पंकं जलतण्हाए जह अदीदि॥1329॥

अग्निपरिक्खित्तादो सउणो रुक्खादु उप्पडित्ताणं ।
सयमेव तं दुमं सो णीडणिमित्तं जध अदीदि॥1330॥

लंघिज्जंतो अहिणा पासुत्तो कोइ जग्गमाणेण ।
उठ्ठविदो तं घेतुं इच्छदि जध कोदुगहलेण॥1331॥

सयमेव वंतमसणं णिल्लज्जो णिग्घिणो सयं चेव ।
लोलो किविणो भंुजदि सुहणो जध असणतण्हाए॥1332॥

एवं केई गिहवासदोसमुक्का वि दिक्खिदा संता ।
इंदियकसायदोसे हि पुणो ते चेव गिण्हंति॥1333॥

बंधणमुक्को पुनरेव बंधणं सो अचेयणोदीदि ।
इंदियकसायबंधणमुवेदि जो दिक्खिदो संतो॥1334॥

मुक्को वि णरो कलिणा पुणो वि तं चेव मग्गदि कलिं सो ।
जो दिक्खिदो वि इंदिय कसायमइयं कलिमुवेदि॥1335॥

सो णिच्छदि मोत्तु जे हत्थगयं उम्मुयं सपज्जलियं ।
सो अक्कमदि कण्हसप्पं छांद वग्घं च परिमसदि॥1336॥

सो कंठल्लगिदसिलो दहमत्थाहं अदीदि अण्णाणी ।
जो दिक्खिदो वि इंदिय कसायवसिगो हवे साधु॥1337॥

इंदियगहोबनिठ्ठो उवसिठ्ठो ण दु गहेण उवसिठ्ठो ।
कुणदि गहो एयभवे दोसं इदरो भवसदेसु॥1338॥

होदि कसाउम्मत्तो उम्मत्तो तथ ण पित्तउम्मत्तो ।
ण कुणदि पित्तुम्मत्तो पावं इदरो जधुम्मत्तो॥1339॥

इंदियकसायमइओ णरं पिसायं करंति हु पिसाया ।
पावकरणवेलंबं पेच्छणयकरं सुयणमज्झे॥1340॥

कुलजस्स जस्स मिच्छत्तगस्स णिधणं वरं खु परिसस्स ।
ण य दिक्खिदेण इंदियकसायवसिएणा जेदुं जे॥1341॥

जध सण्णाद्धो पग्गहिदचावकंडो रधी पलायंतो ।
णिंदिज्जदि तथ इंदियकसावसिगो वि पव्वज्जिदो॥1342॥

जध मिक्खं हिडंतो मउडादि अलंकिदो गहिदसत्थो ।
णिंदिज्जइ तथ इंदियकसायवसिगो वि पव्वज्जिदो॥1343॥

इंदियकसायवसिगो मुंडो णग्गो य जो मलिणगत्तो ।
सो चित्तकम्मसमणोव्व समणरूवो असमणो हु॥1344॥

णाणं दोसे णासिदि णारस्स इंदियकसायविजयेण ।
आउहरणंप हरणं जह णासेदि अरिं ससत्तस्स॥1345॥

णाणंपि कुणदि दोसे णरस्स इंदियकसायदोसेण ।
आहारो वि हु पाणो णरस्स विससंजुदो हरदि॥1346॥

णाणं करेदि पुरिसस्स गुणे इंदियकसायविजयेण ।
बलरूववण्णमाऊ करेहि जुत्तो जधाहारो॥1347॥

णाणं पि गुणो णासेदि णरस्स इंदियकसायदोसेण ।
अप्पबधाए सत्थं होदि हु का पुरिसहत्थगयं॥1348॥

सबहुस्सुदो वि अवमाणिज्जदि इंदियकसायदोसेण ।
णरमाउधहत्थंपि हु मदयं गिद्धा परिभवन्ति॥1349॥

इंदियकसायवसिगो बहुस्सुदो वि चरणे ण उज्जमदि ।
पक्खीव छिण्णपक्खो ण उप्पडदि इच्छमाणो वि॥1350॥

णस्सदि सगंपि बहुगं पि णाणमिंदियकसाय सम्मिस्सं ।
विससम्मिसिद दुट्ठं णस्सदि जध सक्कराकढिदं॥1351॥

इंदिय कसायदोसमलिणं णाणं ण बट्टदि हिदे से ।
वट्टदि अण्णस्स हिदे खरेण जह चंदणं ऊढं॥1352॥

इंदियकसायणिग्गहणिमीलिदस्स हु पयासदि ण णाणं ।
रत्तिं चक्खुणिमीलस्स जधा दीवो सुपज्जलिदो॥1353॥

इंदियकसायमइलो वाहिरकरणणिहुदेण वेसेण ।
आवहदि को वि विसए सउणो वींदसगेणोव॥1354॥

घोडगलिंडसमाणस्स तस्स अभंतरम्मि कुधिदस्स ।
बाहिरकरणं किं से काहिदि बगणिहुदकरणस्स॥1355॥

बाहिरकरणविसुद्धी अभंतर करणसोधणत्थाए ।
ण हु कुंडयस्स सोधी सक्का सतुसस्स कादुं जे॥1356॥

अभंतरसोधीए सुद्धं णियमेण बाहिरं करणं ।
अभंतरदोसेण हु कुणदि णरो बाहिरं दोसं॥1357॥

लिंगं च होदि अभंतरस्स सोधीए बाहिरा सोधी ।
भिउडीकरणं लिंगं जह अंतो जाद कोधस्स॥1358॥

ते चेव इंदियाणं दोसा सव्वे हवन्ति णादव्वा ।
कामस्स य भोगाण य जे दोसा पुव्वणिद्धिट्ठा॥1359॥

महुलित्तं असिधारं तिक्खं लेहिज्ज जध णरो कोई ।
तध विसयसुहं सेवदि दुहावहं इहहि परलोगे॥1360॥

सद्देण मओ रूवेण पदंगो वणगओ वि फरिसेण ।
मच्छो रसेण भमरो गंधेण य पाविदो दोसं॥1361॥

इदि पंचहि पंच हदा सद्दरसफरिसगंधरूवेहिं ।
इक्को कहं ण हम्मदि जो सेवदि पंच पंचेहिं॥1362॥

सरजुए गंधमित्तो घाणिंदियवसपदो विणीदाए ।
विसपुप्फगंधमग्घाय मदो णिरयं च संपत्तो॥1363॥

पाडलिपुत्ते पंचालगीद सद्देण मुच्छिदा संती ।
पासादादो पडिदा णट्ठा गंधव्वदत्ता वि॥1364॥

माणुसमंसपसत्तो कंपिल्लवदी तथेव भीमो वि ।
रज्जभट्ठो णट्ठो मदो य पच्छा गदो णिरयं॥1365॥

चोरो वि तह सुवेगो सहिलारूवम्मि रत्तदिठ्ठीओ ।
विद्धो सरेण अच्छीसु मदो णिरंय च संपत्तो॥1366॥

फासिंदिएण गोवे सत्ता गहवदिपिया वि णासक्के ।
मारेदूण सपुत्तं धूयाए मारिदा पच्छा॥1367॥

रोसाइट्ठो णीलो हदप्पभो अरदिअग्संसत्तो ।
सीदे वि णिवाइज्जदि वेवदि य गहोवसिट्ठो वा॥1368॥

भिउडीतिवलियवयणो उग्गदणिच्चलसुत्तलुक्खक्खो ।
कोवेण रक्खसो वा णरण भीमो णरो भवदि॥1369॥

जइ कोइ तत्तलोहं गहाय रुट्ठो परं हणामित्ति ।
पुव्वदरं सो डज्झिदि डहिज्जव ण वा परो पुरिसो॥1370॥

तथ रोसेण सयं पुव्वमेव डज्झदि हु कलकले णेव ।
अण्णस्स पुणो दुक्खं करिज्ज रुट्ठो ण य करिज्जा॥1371॥

णासेदूण कसायं अग्गी णासदि सयं जथा पच्छा ।
णासेदूण तथ णरं णिरासवो णस्सदे कोधो॥1372॥

कोधो सत्तुगुणकरो णीयाणं अप्पणो य मण्णुकरो ।
परिभव करो सबासे रोसे णासेदि णरमवसं॥1373॥

ण गुणे पेच्छदि अववददि गुणे जंपदि अजंपिदव्वं च ।
रोसेण रुद्धिदओ णारगसीलो णरो होदि ॥1374॥

जध करिसयस्स धण्णं वरिसेण समज्जिदं खलं पत्तं ।
डहदि फुलिंगों दित्तो तध कोहग्गी समणसारं॥1375॥

जध उग्गविसो उरगो दभतणंकुरहदो पकुप्पंतो ।
अचिरेण होदि अविसो तप होदि जदी वि णिस्सारो॥1376॥

पुरिसो मक्कडसरिसो होदि सरूवो वि रोसहदरूवो ।
होदि य रोसणिमित्तं जम्मसहस्सेसु य दुरूवो॥1377॥

सुठ्ठु वि पिओ मुहुत्तेण होदि वेसो जणस्स कोधेण ।
पधिदो वि जसो णस्सदि कुद्धस्स अकज्जकरणेण॥1378॥

णीयल्लगो वि कुद्धो कुणदि अणीयल्ल एव सत्तू वा ।
मारेदि तेहिं मारिज्जदि वा मारेदि अप्पाणं॥1379॥

पुज्जो वि णरो अवमाणिज्जदि कोवेण तक्खणे चेव ।
जगविस्सुदं वि णस्सदि माहप्पं कोहवसियस्स॥1380॥

हिंसं अलियं चोज्जं आचरदि जणस्स रोसदोसेण ।
तो ते सव्वे हिंसालियचोज्जसमुब्भवा दोसा॥1381॥

वारवदीय असेसा दट्ठा दीवायणेण रोसेण ।
वद्धं च तेण पावं दुग्गदिभयबंधणं घोरं॥1382॥

कुलरूवाणाबलसुदला - भिस्सरयत्थमदितवादीहिं ।
अप्पाणमुण्णमेतो नीचागोदं कुणदि कम्मं॥1383॥

ददूण अप्पणादो हीणो मुक्खाउ विंति माणकलिं ।
ददूण अप्पणादो अधिए माणं ण यंति बुधा॥1384॥

माणी विस्सो सव्वस्स होदि कलह भयवेर दुक्खणि ।
पावदि माणी णियदं इहपरलोए य अवमाणं॥1385॥

सव्वे वि कोहदोसा माणकसायस्स होदि णादव्वा ।
माणेण चेव मेथुणहिंसालिय चोज्जमाचरदिं॥1386॥

समणस्स जणस्स पिओ णरो अमाणी सदा हवदि लोए ।
णाणं जसं च अत्थं लभदि सकज्जं च साहेदि॥1387॥

ण य परिहायदि कोई अत्थे मउगत्तणे पउत्तम्मि ।
इह य परत्त य लभदि विणएण हु सव्वकल्याणं॥1388॥

सद्धिं साहस्सीओ पुत्त सगरस्स रायसीहस्स ।
अदिबलवेगा संता णट्ठा माणस्स दोसेण॥1389॥

जध कोडिसमिद्धो वि ससल्लो ण लभदि सरीरणिव्वाणं ।
मायासल्लेण तहा ण णिव्वुदिं तव समिद्धो वि॥1390॥

होदि य वेस्सो अप्पच्चइदो तध अवमदो य सुजणस्स ।
होदि अचिरेण सत्तू णीयाणदि णिपडिदोसेण॥1391॥

पावइ दोसं मायाए महल्लं लहु सगावराधेवि ।
सच्चारण सहस्साण वि माया एक्का वि णासेदि॥1392॥

मायाए मित्तभेदे कदम्मि इधलोगिगच्छपरिहाणी ।
णासदि मायादोसा विसजुददुद्धं व सामण्णं ॥ 1393 ॥

माया करेदि णीचागोदं इच्छी णवुंसयं तिरियं ।
मायादोसेण य भवसएसु डंभिज्जदे बहुसो ॥ 1394 ॥

कोहो माणो लोहो य जत्थ मायावि तत्थ सण्णिहिदा ।
कोहमद लोह दोसा सव्वे मायाए ते होंति ॥ 1395 ॥

सस्सो य भरधगामस्स सत्तसंवस्सराणि णिस्सेसो ।
दड्ढो डंभणदोसेण कुम्भकारेण रुठ्ठेण ॥ 1396 ॥

लोभेणासाधत्तो पावइ दोसे बहुं कुणदि पावं ।
णीए अप्पणं वा लोभेण णरो ण विग्गणेदि ॥ 1397 ॥

लोभो तणेवि जादो जणेदि पावमिदरत्थ किं वच्चं ।
लगिदमउडादिसंगस्स वि हु ण पावं अलोहस्स ॥ 1398 ॥

साकेदपुरे सीमंधरस्स पुत्तो मिगद्धवो णाम ।
भद्दयमहिसणिमित्तं जुवराजो केवली जादो ॥ 1399 ॥

तेलोककेण वि चितस्स णिव्वुदी णत्थि लोभघत्थस्स ।
संतुट्ठो हु अलोभो लभदि दरिद्धो वि णिव्वाणं ॥ 1400 ॥

सव्वे वि गंधदोसा लोभकसायस्स हुंति णादव्वा ।
लोभेण चेव मेहुणहिंसालियचोज्जमाचरदि ॥ 1401 ॥

रामस्स जामदग्गिस्स वजं धित्तूण कत्तविरिओ वि ।
णिधणं पत्तो सकुलो ससाहणो लोभदोसेण॥1402॥

ण हि ते कुणिज्ज सत्तू अग्गी बग्घी व किण्हसप्पो वा ।
जं कुणइ महादोसं णिव्वुदिविग्घं कसायरिवू॥1403॥

इंदियकसायदुद्धंतस्सा पाडेंति दोसविसमेसु ।
दुखावहेसु पुरिसे पसढिलणिव्वदेखलिया हु॥1404॥

इंदियकसाय दुद्धंतस्सा णिव्वेदखलिणिदा संता ।
ज्झणकसाए भीदा ण दोसविसमेसु पाडेंति॥1405॥

इंदियकसाय पण्णगदट्ठा बहुवेदणुद्धिदा पुरिसा ।
पभाट्टझाणसुक्खा संजमजीवं पविजहंति॥1406॥

ज्झाणागदेहिं इंदियकसाय भुजगा विरागभंतेहिं ।
णियमिज्जंता संजमजीवं साहुस्स ण हरंति॥1407॥

तिंेविंध

पुरिसमयं॥1408॥

धिदिखेडएहिं इंदियकंडे ज्झाणवरसत्ति संजुत्ता ।
फेडंति समणजोहा सुणाणदिट्ठीहिं दट्ठूण॥1409॥

गंथाडवीचरंतं कसायविसकंटया पमायमुहा ।
विद्धंति विसयतिक्खा अधिदिदढोवाणहं पुरिसं॥1410॥

आवद्धधिदिदढोवाणहस्स उवओगदिट्ठिजुत्तस्स ।
ण करिंति किंचि दुक्खं कसाय विसकंटया मुणिणो॥1411॥

उड्डहणा अदिचवला अणिग्गहिदकसायमक्कडा पावा ।
गंथफल लोलहिदया णासंति हु संजमारामं॥1412॥

णिच्चं पि अमज्झत्थे तिकालदोसाणुसरणपरिहत्थे ।
संजमरज्जूहिं जदी बंधंति कसायमक्कडए॥1413॥

धिदिवम्मिण्हिं उवसमसरेहिं साधूहिं णाणसत्थेहिं ।
इंदियकसायसत्तू सक्का जुत्तेहिं जेदुं जे॥1414॥

इंदियकसायचोरा सुभावणासंकलाहिं वज्झंति ।
ता ते ण विकुव्वंति चोरा जह संकलाबद्धा॥1415॥

इंदियकसाय बग्घा संजमणरघादणे अदिपसत्ता ।
वेरग्गलोहदढपंजरेहिं सक्का हु णियमेदुं॥1416॥

इंदियकसायहत्थी वयवारिमदीणिदा उवायेण ।
विणयवरत्ताबद्धा सक्का अवसा वसे कादंु॥1417॥

इंदियकसायहत्थी वोलेदुं सीलफलियमिच्छंता ।
धीरेहिं रुंभिदव्वा धिदिजमलारुप्पहारेहिं॥1418॥

इंदियकसायहत्थी दुस्सीलवणं जदा अहिलसेज्ज ।
णाणंकुसेण तइया सक्का अवसा वसं कादुं॥1419॥

जदि विसयगंधहत्थी अदिणिज्जदि रागदोसमयमत्ता ।
चिट्ठिदुणज्झाणजोहस्स वसे णाणंकुसेण विणा॥1420॥

विसयवणरमणलोला बाला इंदियकसायहत्थी ते ।
पसमे रमेदव्वा तो ते दोसं ण काहिति॥1421॥

सद्धे रूवे गंधे रसे य फासे सुभेय असुभे य ।
तम्हा रागदोसं परिहर तं इंदियजएण॥1422॥

जह णीरसं पि कडुयं ओसहं जीविदत्थिओ पिबदि ।
कडुयं पि इंदियजयं णिव्वुइहेदुं तह भजेज्ज॥1423॥

जे आसि सुभा एणिंह असुभा ते चेव पुग्गला जादा ।
जे आसि तदा असुभा ते चेव सुभा इमा इणिह॥1424॥

सव्वे वि य ते भुत्ता चत्ता वि य तह आणंतखुत्तो मे ।
सव्वेसु एत्थ को मज्झ विंभओ भुत्तविजडेसु॥1425॥

रूवं शुभं च असुभं किंचि वि दुक्खं सुहं च ण य कुणदि ।
संकप्पविसेसेण हु सुहं च दुक्खं च होइ जए॥1426॥

इह य परत्त य लोए दोसे बहुगे य आवहइ चक्खू ।
इदि अप्पणो गणित्ता णिज्जेदव्वो हवदि चक्खू॥1427॥

एवं सम्मं सद्दरसगंधफासे विचारयित्ताणं ।
सेसाणि इंदियाणि वि णिज्जेदव्वाणि बुद्धिमदा॥1428॥

जदिदा सवति असंतेण परो तं णत्थि मेत्ति खमिदव्वं ।
अणुकम्पा वा कु ज्जा पावइ पावं वरावेत्ति॥1429॥

जदि वा सवेज्ज संतेण परो तह वि पुरिसेण खमिदव्वं ।
सो अत्थि मज्झ दोसो ण अलीयं तेण भणिदत्ति॥1430॥

सत्तो वि ण चेव हदो हदो वि ण य मारिदोत्ति य खमेज्ज ।
मारिज्जंतो विसहेज्ज चेव धम्मो ण णट्ठोत्ति॥1431॥

रोसेण महाधम्मो णसिज्ज तणं च अग्गिणा सव्वो ।
पावं च करिज्ज माहं बहुगंपि णरेण खमिदव्वं॥1432॥

पुव्वकदमज्झपावं पत्तं परदुखकरणजादं मे ।
रिणमोक्खो मे जादो मे अज्जत्ति य होदि खमिदव्वं॥1433॥

पुव्वं सयमुवभुत्तं काले णाएण तेत्तियं दव्वं ।
को धारणीओ धणियस्स दिंतओ दूक्खिओ होज्ज॥1434॥

इह य परत्त य लोए दोसे बहुए य आवहदि कोधो ।
इदि अप्पणो गणित्ता परिहरिदव्वो हवइ कोधो॥1435॥

को एत्थ मज्झ माणो बहुसो णीचत्तणं पि पत्तस्स ।
उच्चते य अणिच्चे उवट्ठिदे चावि णीचत्ते॥1436॥

अधिगेसु बहुसु संतेसु ममादो एत्थ को महं माणो ।
को विभओ वि बहुसो पत्ते पुव्वम्मि उच्चत्ते॥1437॥

जो अवमाणणकरणं दोसं परिहरइ णिच्चभाउत्तो ।
सो णाम होदि माणी ण दु गुणचत्तेण माणेण॥1438॥

इह य परत्तय लोए दोसे बहुगे य आवहदि माणो ।
इदि अप्पणो गणित्ता माणस्स विणिग्गहं कुज्जा॥1439॥

अदिगूहिदा वि दोसा जणेण कालंतरेण णज्जंति ।
मायाए पउत्ताए को इत्थ गुणो हवदि लद्धो॥1440॥

पडिभोगम्मि असन्ते णियडिसहस्सेहिं गूहमाणस्स ।
चंदगहोव्व दोसो खणेण सो पायडो होइ॥1441॥

जणपायडो वि दोसो दोसोत्ति ण घेप्पए सभागस्स ।
जह समलत्ति ण घिप्पदि समलं वि जए तलायजलं॥1442॥

डंभसएहिं बहुगेहिं सुपउत्तेहिं अपडिभोगस्स ।
हत्थं ण एदि अत्थो अण्णादो सपडिभोगादो॥1443॥

इह य परत्तय लोए दोसे बहुए य आवहइ माया ।
इदि अप्पणो गणित्ता परिहरिदव्वा हवइ माया॥1444॥

लोभे कए वि अत्थो ण होइ पुरिसस्स अपडिभोगस्स ।
अकएवि हवदि लोभे अत्थो पिडभोगवंतस्स॥1445॥

सव्वे वि जए अत्था पिरगहिदा ते अणंतखुत्तो मे ।
अत्थेसु इत्थ को मज्झ विंभओ गहिदविजडेसु॥1446॥

इह य परत्तय लोए दोसे बहुए य आवहइ लोभो ।
इदि अप्पणो गणित्ता णिज्जेदव्वो हवदि लोभो॥1447॥

णिदं जिणहि णिच्चं णिद्वा हु णरं अचेयणं कुणइ ।
वट्टिज्ज हु पासुत्तो खवओ सव्वेसु दोसेसु॥1448॥

जदि अधिवाधिज्ज तुमं णिद्वा तो तं करेहि सज्झायं ।
सुहुमत्थे वा चिंतेहि सुणव संवेगणिव्वेगं॥1449॥

पीदी भए य सोगे य तहा णिद्वा ण होइ मणुयाणं ।
एदाण तुमं तिण्णिवि जागरणत्थं णिसेवेहिं॥1450॥

भयमागच्छसु संसारादो पीदिं च उत्तमठ्ठम्मि ।
सोगं च पुरादुच्चरिदादो णिद्वाविजय हेदुं॥1451॥

जागरणत्थं इच्चेवमादिकं कुण कमं सदा उत्तो ।
झाणेण विणा बज्झो कालो हु तुमे ण कायव्वो॥1452॥

संसारादविणित्थरणमिच्छदो अणपणीय दोसाहिं ।
सोदुं ण खमो अहिमणपणीय सोदुं व सघरम्मि॥1453॥

को णाम णिरुव्वेगो लोगे मरणादि अग्गिपज्जलिदे ।
पज्जलिदम्मि व णाणी धरम्मि सोदुं अभिलसिज्ज॥1454॥

को णाम णिरुव्वेगो सुविज्ज दोसे सु अणुवसंतेषु ।
गहिदाउहाण बहुयाण मज्झयारेव सत्तूणं॥1455॥

णिद्वा तमस्स सरिसी अण्णो णत्थि हु तमो मणुस्साणं ।
इति णच्चा जिणसु तुमं णिद्वा ज्झाणस्स विग्घयरी॥1456॥

कुण वा णिद्वा मोक्खं णिद्वा मोक्खस्स भणिदवेलाए ।
जह वा होइ समाही खवणकिलिंतस्स तह कुणह॥1457॥

एस उवावो कम्मसवदार णिरोहणो हवे सव्वो ।
पोराणयस्स कम्मस्स पुणो तवसा खओ होइ॥1458॥

अभंतर बाहिरगे तवम्मि सत्तिं सगं अगूहंतो ।
उज्जमसु सुहे देहे अप्पडिबद्धो अणलसो तं॥1459॥

सुहसीलदाए अलसत्तणेण देहपडिबद्धदाए य ।
जो सत्तीए संत्तीए ण करिज्ज तवं स सत्तिसयं॥1460॥

तस्स ण भावो सुद्धो तेण पउत्ता तदो हवदि माया ।
ण य होइ धम्मसङ्गा तिच्चा सुहदेहपिक्खाए॥1461॥

अप्पा य वंचिओ तेण होइ विरियं च गूहियं भवदि ।
सुहसीलदाए जीवो बंधदि हु असादवेदणियं॥1462॥

विरियंतरायमलसत्तणेण बंधदि चरित्तमोहं च ।
देहपडिबद्धदाए साधू सपरिग्गहो होइ॥1463॥

मायादोसा मायाए हंति सव्वे वि पुव्वणिद्धिद्वा ।
धम्मम्मि णिप्पिवासस्स होइ सो दुल्लहो धम्मो॥1464॥

पुव्वुत्ततवगुणाणं चुक्को जं तेण बंचिओ होइ ।
विरियणिगूही बंधदि मायं विरियंतरायं च॥1465॥

तवमकरिंतस्सेदे दोसा अण्णे य होंति संतस्स ।
होंति य गुणा अणेया सत्तीए तवं करेंतस्स॥1466॥

इह य परत्त य लोए अदिसय पूयाओ लहइ सुतवेण ।
आवज्जिज्जंति तहा देवा वि संइंदिया तवसा॥1467॥

अप्पो वि तवो बहुगं कल्लाणं फलइ सुप्पओगकदो ।
जह अप्पं वडबीअं फलइ वडमणेयपारोहं॥1468॥

सुठ्ठु कदाण वि सस्सादीणं विग्घा हवंति अदिबहुगा ।
सुठ्ठु कदस्स तवस्स पुण णत्थि कोइ वि जए विग्घो॥1469॥

जणणमरणादिरोगादुरस्स सुतवो वरोसधं होदि ।
रोगादुरस्स अदिविरियमोसधं सुप्पउत्तं वा॥1470॥

संसार महाडाहेण डज्झमाणस्स होइ सीयघरं ।
सुतवोदाहेण जहा सीयघरं डज्झमाणस्स॥1471॥

णीयल्लओ व सुतवेण होइ लोगस्स सुप्पिओ पुरिसो ।
माया व होइ विस्ससणिज्जो सुतवेण लोगस्स॥1472॥

कल्लाणिट्ठिसुहाइं जावदियाइं हवे सुरणरणं ।
जं परमणिव्वुदिसुहं व ताणि सुतवेण लभंति॥1473॥

कामदुहा वरधेणू णरस्स चिंतामणिव्व होइ तओ ।
तिलओव्व णरस्स तओ माणस्स विहूसणं सुतओ॥1474॥

होइ सुतवो य दीओ अण्णाणतमंधयारचारिस्स ।
सव्वावत्थासु तओ वट्ठदि य पिदा व पुरिसस्स॥1475॥

विसयमहापंकाउलगड्डुहाए संकमो तवो होइ ।
होइ य णावा तरिदुं तवो कसायातिचवलणादिं॥1476॥

फलिहो व दुग्गदीणं अणेयदुक्खावहाण होइ तवो ।
आमिसतण्हाछेदणसमत्थ मुदकं व होइ तवो॥1477॥

मणदेहदुक्खवित्तासिदाण सरणं गदी य होइ तवो ।
होइ य तवो सुत्तिथं सव्वासुहदोसमल हरणं॥1478॥

संसारविसमदुग्गे तवो पणट्ठस्स देसओ होदि ।
होइ तवो पच्छयणं भवकंतारम्मि दिग्घम्मि॥1479॥

रक्खा भएसु सुतवो अब्भुदयाणं च आगरो सुतवो ।
णिस्सेणी होइ तवो अक्खयसोक्खस्स मोक्खस्स॥1480॥

तं णत्थिं जं ण लभइ तवसा सम्मं कएण पुरिसस्स ।
अग्गीव तणं जलिओ कम्मतणं डहदि य तवग्गी॥1481॥

सम्मं कदस्स अपरिस्सवस्स ण फलं तवस्स वण्णेदु ।
कोई अत्थि समत्थो जस्स वि जिभासयसहस्सं॥1482॥

एवं णादूण तवं महागुणां संजमम्मि ठिच्चाणं ।
तवसा भावेदव्वा अप्पा णिच्चं पि जुत्तेण॥1483॥

जह गहिदवेयणो वि य अदयाकज्जे णिउज्जदे भिच्चो ।
तह चेव दमेयव्वो देहो मुणिणा तवगुणेसु॥1484॥

इच्चेव समणधम्मो कहिदो मे दसविहो सगुणदोसे ।
एत्थ तुममप्पमत्तो होहि समण्णागदसदीओ॥1485॥

तो खवगवयणकमलं गणिरविणो तेहिं वयणरस्सीहिं ।
चित्तप्पसायविमलं पफुल्लिदं पीदिमयरंदं॥1486॥

वयणकमलेहिं गणिअभिमुहेहिं सावत्थिदत्थिपत्तेहिं ।
सोभदि सभा सूरुदयम्मि फुल्लं व णलिणिवणं॥1487॥

मणिउवएसामयपाणएण पल्हादिदम्मि चित्तम्मि ।
जाओ य णिव्वुदो सो पादूणय पाणयं तिसिओ॥1488॥

तो सो खवओ तं अणुसट्ठिं सोऊण जाद संवेगो ।
उट्ठित्ता आयरियं वंदइ विणएण पणदंगो॥1489॥

भंते सम्मं णाणं सिरसा य पडिच्छिदं मए एदं ।
जं जह उत्तं तं तह काहेत्ति य सो तदो भणइ॥1490॥

अप्पा णिच्छरदि जहा परमा तुट्ठी य हवदि जह तुज्झ ।
जह तुज्झ य संघस्स य सफलो हु परिस्समो होइ॥1491॥

जह अप्पणो गणस्य य संघस्स य विस्सुदा हवदिकित्ती ।

संघस्स पसायेण य तहं आराहइस्सामि॥1492॥

धीरपुरिसेहिं जं आयरियं जं च ण तरंति कापुरिसा ।

मणसा वि विचिंतेदु तमहं आराहणं काहं॥1493॥

एवं तुज्झं उबएसमिदमासादइत्तु को णाम ।

बीहेज्ज छुहादीणं मरणस्स वि कायरो वि णरो॥1494॥

किं जंपिएण बहुणा देवा वि सइंदिया महं विग्घं ।

तुमं पादोवग्गहगुणेण कादुं ण तरिहंति॥1495॥

किं पुण छुहा व तण्हा परिस्समो वादियादि रोगो व ।

काहिंतिज्झाणविग्घं इंदियविसया कसाया वा॥1496॥

ठाणा चलेज्ज मेरु भूमी ओमच्छिया भविस्सिहिदि ।

ण य हं गच्छामि विगदिं तुज्झं पायप्पसाएण॥1497॥

एवं खवओ संथारगओ खवइ विरियं अगूहंतो ।

देदि गणी वि सदा से तह अणुसठ्ठिं अपरिदंतो॥1498॥

सारणा

अकडुगमतित्तयमणं विलंब अकसायमलवणं मधुरं ।

अविरस मदुव्विगंधं अच्छमणुण्हं अणदिसादं॥1499॥

पाणगमसिंभलं परिपूयं खीणस्स तस्स दायव्वं ।

जह वा पच्छं खवयस्स तस्स तह होइ दादव्वं॥1500॥

संथारत्थो खवओ जइया खीणो हवेज्ज तो तइया ।
वोसरिदव्वो पुव्वविधिणेव सोपाणगाहारो॥1501॥

एवं संथार गदस्स तस्स कम्मोदएण खवयस्स ।
अंगे कच्छइ उट्ठिज्ज वेयणा ज्जाणविधग्घयरी॥1502॥

बहुगुणसहस्सभरिया जदि णावा जम्मसायरे भीमे ।
भिज्जदि हु रयणभरिया णावा व समुद्धमज्झमि॥1503॥

गुणभरिदं जदि णावैं दट्ठूण भवोदधिम्मि भिज्जंतं ।
कुणमाणो हु उवेक्खं को अण्णो हुज्ज णिद्धम्मो॥1504॥

वेज्जावच्चस्स गुणा जे पुव्वं विच्छरेण अक्खादा ।
तेसिं फिडिओ सो होइ जो उवेक्खेज्ज तं खवयं॥1505॥

तो तस्स तिगिंछा जाणएण खवयस्स सव्वसत्तीए ।
विज्जादेसेण वसे पडिकम्मं होइ कायव्वं॥1506॥

णाऊण विकारं वेदणाए तिस्से करेज्ज पडियारं ।
फासुगददव्वेहिं करेज्ज वायकफपित्तपडिघादं॥1507॥

बच्छीहिं अवद्दवणतावणेहिं आलेवसीद किरियाहिं ।
अभंगणपरिमद्दण आदीहिं तिगिंछद खवयं॥1508॥

एवं पि कीरमाणो परियम्मे वेदणा उवसमो सो ।
खवयस्स पावकम्मोदएण तिव्वेण हु ण होज्ज॥1509॥

अहवा तण्हादिपरीसहेहिं खवओ होज्ज अभिभूदो ।
उवसगेहिं खवओ अचदेणो हविज्ज अभिभूदो॥1510॥

तो वेदणावसट्ठो वाउलिदो वा परीसहादीहिं ।
खवओ अणप्पवसिओ सो विप्पलवेज्ज जं किं पि॥1511॥

उभासेज्ज व गुणसेढी दो उदरणबुद्धिओं खवओ ।
छट्ठं दोच्चं पढमं वसिया कुंटिलिदपदमिछंतो॥1512॥

तह मुज्झंतो खवगो सारेदव्वो य तो तवो गणिणा ।
जह सो विसुद्धलेस्सो पच्चागदवेदणो होज्ज॥1513॥

कोसि तुमं किं णामो कत्थ वससि को व संपही कालो ।
किं कुणसि तुमं कह वा अत्थसि किं णामगो वाहं॥1514॥

एवं आउच्छित्ता परिकखहेदं गुणी तयं खवयं ।
सारड वच्छलयाए तस्स य कवयं करिस्संति॥1515॥

जो पुण एवं ण करिज्ज सारणं तस्सं वियलचक्खुस्स ।
सो तेण होइ णिद्धंधसेण खवओ परिचत्तो॥1516॥

एवं सारिज्जंतो कोईर् कम्मवसमेण लभदि सदिं ।
तह य ण लब्धिज्ज सदिं कोई कम्मे उदिण्णम्मि॥1517॥

कवच

सदिमलभंतस्स वि का दव्वं पडिकम्ममठ्ठियं गणिणा ।
उवदेसो वि सया से अणुलोमो होदि कायव्वो॥1518॥

चेयंतोऽपि य कम्मोदयेण कोई परीसहपरद्धो ।
उभ्भासेज्ज वउक्कावेज्ज व भिंदेज्ज व पदिण्णं॥1519॥

ण हु सो कडुवं फरुसं व भाणिदव्वो ण खीसिदव्वो य ।
ण य वित्तासेदव्वो ण य वट्ठदि हीलणं कादंु॥1520॥

फरुसवयणादिगेहिं दु माणी विप्फुरिसिदो तगो संतो ।
उद्धाणमवक्कमणं कुज्जा असमाधिकरणं च॥1521॥

तस्स पदिण्णामेरं भित्तुं इच्छंतयस्स णिज्जवओ ।
सव्वादरेण कवयं परीसहणिवारणं कुज्जा॥1522॥

णिद्धं मधुरं पल्हादणिज्ज हियंगमं अतुरिदं वा ।
तो सीहावेदव्वो सो खवओ पण्णवंतेण॥1523॥

रोगादंके सुविहिद विउलं वा वेदण धिदिवलेण ।
तमदीणमसंमूढो जिण पच्चूहे चरित्तस्स॥1524॥

सव्वे उवसग्गे परिसहे य तिविहेण णिज्जिणहितुमं ।
णिज्जिणिय सम्ममेदे होहिसु आराहओ मरणं॥1525॥

संभर सुविहिय जं ते मज्झमि चदुव्विहस्स संघस्स ।
वूढा महापदिण्णा अहयं आराहइस्सामि॥1526॥

को णाम भडो कुल जो माणी थोलाइदूण जणमज्झे ।
जुज्झे पलाइ आवडिदमेत्तओ चेव अरिभीदो॥1527॥

थोलाइदूण पुव्वं माणी संतो परीसहादीहिं ।

आवडिदमित्तओ चेव को विसण्णो हवे साहू॥1528॥

आवडिया पडिकूला पुरओ चेवक्कमंति रणभूमिं ।

अवि य मरिज्ज रणो ते ण य पसरमरीण वट्ठंति॥1529॥

तह आवडिदप्पडिकूलदाए साहू विमाणिणो सूरा ।

अइतिव्वेय णाओ सहंति ण य विगडिभुवयांति॥1530॥

थोलाइयस्स कुलजस्स मणिणो रणमुहे वरं मरणं ।

ण य लज्जणयं काउं जावज्जजीवं सुजणमज्झं॥1531॥

समणस्स माणिणो संजदस्स णिहणगमणं पि होइ वरं ।

ण य लज्जणय कादुं कायर दादीणकिविणत्तं॥1532॥

एयचस्स अप्पणो को जीविदहेदुं करिज्ज जपणयं ।

पुत्तपउत्तादीणं रण पलादो सजणलंछं॥1533॥

तह अप्पणो कुलस्स य संघस्स य मा हु जीवदत्थं तं ।

कुणसु जणे जंपणयं किविणं कुव्वं सगणलंछं॥1534॥

गाढप्पहारसंताविदा वि सूरा रणे अरिसमक्खं ।

ण मुहं भंजंति सयं मरंति भिउडीए सह चेव॥1535॥

सुट्ठु वि आवइपत्ता ण कायरत्तं करिंति सप्पुरिसा ।

कत्तो पुण दीणत्तं किविणत्तं वा वि काहिति॥1536॥

कोई अग्निमदिगदा समंतओ अग्निणा वि डज्झंता ।
जलमज्झगदा व णरा अत्थांति अचेदणा चेव॥1537॥

तत्थ वि साहुक्कारं सगअगुलिचालणेण कुव्वंति ।
केई करंति धीरा उक्किट्ठिं अग्निमज्झम्मि॥1538॥

जदिदा तह अण्णाणी संसार पवट्ठणाय लेस्साए ।
तिव्वाए वेदणाए सुहसाउलया करंति धिदिं॥1539॥

किं पुण जदिणा संसार सव्वदुक्खक्खयं करंतेण ।
बहुतिव्वदुक्खरस जाणएण ण धिदी हवदि कुज्जा॥1540॥

असिवे दुभिक्षे वा कंतारे वा भए व आगाढे ।
रोगेहिं व अभिभूदा कुलजा माणं ण विजहंति॥1541॥

ण पियंति सुरं ण य खंति गोमयं ण य पलंडुमादीयं ।
ण य कुव्वंति विकम्मं तहेव अण्णंपि लज्जणयं॥1542॥

किं पुण कुलगण संघ जस माणिणो लोयपूजिदा साधू ।
माणं पि जहिय काहंति विकम्मं सुजणलज्जणयं॥1543॥

जो गच्छिज्ज विसादं महल्लमप्पं व आवदिं पत्तो ।
तं पुरिसकादरं विंति धीरपुरिसा हु संढुत्ति॥1544॥

मेरुव्व णिप्पकंपा अक्खोभा सागरुव्व गंभीरा ।
धिदिवंतो सप्पुरिसा हुंति महल्लावाईए वि॥1545॥

केई विमुत्तसंगा आदारोविदभरा अपडिकम्मा ।
गिरि पभारमभिगदा बहुसावदसंकडं भीमं॥1546॥

धिदिधणियबद्धकच्छा अणुत्तर विहारिणो सुदसहाया ।
साहिंति उत्तमट्ठं सावददाढंतर गदे वि॥1547॥

भल्लक्किए तिरत्तं खज्जंतो घोर वेदणट्ठोऽवि ।
आराधणं पवण्णोज्झणेणावंति सुकुमालो॥1548॥

मोग्गिलगिरिम्मि य सुकोशलो वि सिद्धत्थदइय भयवंतो ।
वघीण वि खज्जंतो पडिवण्णो उत्तमं अट्ठं॥1549॥

भूमीए समं कीलाकोट्टिददेहो वि अल्लचम्मं व ।
भयवं पि गयकुमारो पडिवण्णो उत्तमं अट्ठं॥1550॥

कच्छुजरखाससोसो भत्तेच्छदुच्छिकुच्छिदुक्खाणि ।
अधियासयाणि सम्मं सणक्कुमारेण वाससंद॥1551॥

णाबाए णिव्वुडाए गंगामज्झे अमुज्झमाणमदी ।
आराधणं पवण्णो कालगओ एणियापुत्तो॥1552॥

ओमोदरिए घोराए भद्दबाहू असंकिलिठ्ठमदी ।
घोराए तिगिंच्छाए पडिवण्णो उत्तमं ठाणं॥1553॥

कोसंबीललियघडा वूढा णइपूरएण जलमज्झे ।
आराधणं पवण्णा पावोवगदा अमूढमदी॥1554॥

चंपाए मासखमाणं करित्तु गंगातडम्मि तण्हाए ।
घोराए धम्मघोसो पडिवण्णो उत्तमं ठाणे॥1555॥

सीदेण पुव्ववइरियदेवेण विकुव्विएण घोरेण ।
संतत्तो सिरिदत्तो पडिवण्णो उत्तमं अट्ठं॥1556॥

उण्हं वादं उण्हं सिलादलं आदवं च अदिउण्हं ।
सहिदूण उसहसेणो पडिवण्णो उत्तमं अट्ठं॥1557॥

रोहेडयम्मि सत्तीए हओ कोंचेण अग्गिदइदो वि ।
तं वेयणमधियासिय पडिवण्णो उत्तमं अट्ठं॥1558॥

काइंदि अभयघोसो वि चंडवेगेण छिण्णसव्वंगो ।
तं वेयणमधियासिय पडिवण्णो उत्तमं अट्ठं॥1559॥

दंसेहिं य मसएहिं य खज्जंतो वेदणं परं घोरं ।
विज्जुच्चरोऽधियासिय पडिवण्णो उत्तम अट्ठं॥1560॥

हत्थिणपुर गुरुदत्तो सम्मलिथाली व दोणिमंतम्मि ।
डज्झंतो अधियासिय पडिवण्णो उत्तमं अट्ठं॥1561॥

गाढप्पहारविद्धो पूरंगलियाहिं चालणीव कदो ।
तथ वि य चिलादपुत्तो पडिवण्णो उत्तमं अट्ठं॥1562॥

दंडो जउणवंकेण तिक्खकेडेहिं पूरिदंगो वि ।
तं वेयणमधियासिय पडिवण्णो उत्तमं अट्ठं॥1563॥

अभिणंदणादिया पंचसया णयरम्मि कुंभकार कडे ।

आराधणं पवण्णा पीलिज्जंता वि यंतेण॥1564॥

गोठ्ठे पाओवगदो सुबंधुणा गोच्चरे पलिवदम्मि ।

डज्झंतो चाणक्को पडिवण्णो उत्तमं अट्ठं॥1565॥

वसदीए पलिविदाए रिट्ठामच्चेण उसहसेणो वि ।

आराधणं पवण्णो सह परिसाए कुणालम्मि॥1566॥

जदिदा एवं एदे अणगारा तिव्वेदणट्ठा वि ।

एयागी पडियम्मा पडिवण्णा उत्तमं अट्ठं॥1567॥

किं पुण अणयार सहायगेण कीरंतयम्मि पडिकम्मे ।

संघे ओलग्गंते आराधेदुं ण सकेज्ज॥1568॥

जिणवयण ममिदभूदं महरुं कण्णाहुदिं सुणंतेण ।

सक्का हु संघमज्जे साहेदुं उत्तमं अट्ठं॥1569॥

णिरयतिरिक्खगदीसु य माणुसदेवत्तणे य संतेण ।

जं पत्तं इह दुक्ख तं अणुचिंतेहि तच्चित्तो॥1570॥

णिरएसु वेदणाओ अणोवमाओ असादबहुलाओ ।

कायणिमितिं पत्तो अणंतखुत्तो बहुविधावो॥1571॥

जदि कोइ मेरुमत्तं लोहुण्डं पक्खविज्ज णिरयम्मि ।

उण्हे भूमिमपत्तो णिमिसेण विलेज्ज सो तत्थ॥1572॥

तह चेव य तद् हो पज्जलिदो सीयणिरयपक्खित्तो ।
सीदे भूमिमपत्तो णिमिसेण सडिज्ज लोहुण्डं॥1573॥

होदि य णरये तिच्चा सभावदो चेव वेदणा देहे ।
चुण्णी कदस्स वा मुच्छिदस्स खारेण सित्तस्स॥1574॥

णिरयकडयम्मि पत्तो जं दुक्खं लोहकंटएहिं तुमं ।
णेरइएहिं य तत्तो पडिओ जं पाविओ दुक्खं॥1575॥

जं कुडसामलीए दुक्खं पत्तोसि जं च सलम्मि ।
असिपत्तवणम्मि य जं जं च कयं णिद्धकंकेहिं॥1576॥

सामसवलेहिं दोसं वइतरणीए य पाविओ जं सि ।
पत्तो कयंवालुयमइगम्ममसायमदितिव्वं॥1577॥

जं णीलमंडवे तत्तलोहपडिमाउले तुमे पत्तं ।
जं पाइओसि खारं कडुयं तत्तं कलयलं च॥1578॥

जं खाविओसि अवसो लोहंगारे य पज्जलंते तं ।
कंडुसु जं सि रद्धो जं सि कवल्लीए तलिओ सि॥1579॥

कुट्टाकुट्टिं चुण्णाचुण्णिं मुग्गरमुसुण्ढित्थेहिं ।
जं वि सखंडो खंडिं कओ तुमं जणसमूहेण॥1580॥

जं आवट्टदो उप्पाडिदाणि अच्छीणि णिरयवासम्मि ।
अवयस्स उक्खया जं सतूलमूलायते जिआ॥1581॥

कुम्भीपाएसु तुमं उक्कढिओ जं चिरं पि वं सोल्लं ।
जं सुट्ठिउव्व णिरयम्मि पउलिदो पावकम्मेहिं॥1582॥

जं भज्जिदोसि भज्जिदंगपि व जं गलिओसि रसयं व ।
जं कप्पिओसि वल्लूरयं व चुण्णं व चुण्णकदो॥1583॥

चक्केहिं करकचेहिं य जं सि णिकत्तो विकत्तिओ जं च ।
परसूहि फाडिओ ताडिओ य जं तं मुसंडीहिं॥1584॥

पासेहिं जं च गाढं बद्धो भिण्णो य जं सि दुघणेहिं ।
जं खारकद्दमे खुप्पिओ सि ओमच्छिओ अवसो॥1585॥

जं छोडिओ सि जं मोडिओसि जं फाडिओसि मलिदोस ।
जं लोडिदोसि सिंघाडएसु तिक्खेसु वेएण॥1586॥

विच्छिण्णगो वंगो खारं सिच्चित्तु वीजिदो जं सि ।
सत्तीहिं विमुक्कीहिं य अदयाए खुंचिओ जं सि॥1587॥

पगलंतरुधिरधारो पलंबचम्मो पभिन्नपोट्टसिरो ।
पउलिदद्दिदओ जं फुडिदत्थो पडिचूरियंगो य॥1588॥

जं चडयंडतकरचरणंगो पत्तो सि वेदणं तिव्वं ।
णिरए अणंतखुत्तो तं अणुचिंतेहिं णिस्सेसं॥1589॥

तिरियगदिं अणुपत्तो भीममहावेदणउलमपारं ।
जन्मणमरणरहट्टं अणंतखुत्तो परिगदो जं॥1590॥

ताडणतासणबंधणवाहणलंछणविहेडणं दमणं ।
कण्णच्छेदणणासावेहणणिल्लंछणं चेव॥1591॥

छेदणभेदणडहणं णिपीलणं गालणं छुहातण्हा ।
भक्खणमद्दणमलणं मिक्कत्तणं सीदउण्हं च॥1592॥

जं अत्ताणो णिप्पडियम्मो बहुवेदणुद्दिओ पडिओ ।
बहुएहिं भदो दिवसेहिं चडप्पडंतो अणाहो तं॥1593॥

ेवेवध प्रकार रागि अरु नाना बाधायें त्तर्यक् गेत्त में ।
सदा रहि भय सभी आरि सि दि-ताइन सब कष्ट सहि॥1594॥

सुविहिय अदीदकाले अणंतकायं तुमे अदिग्देण ।
जम्मणमरणमणंतं अणंतखुत्ता समणभूदं॥1595॥

इच्चवमादिदुक्खं अणंतखुत्ते तिरिक्खजोणीए ।
जं पत्तोसि अदीदे काले चित्तेहि तं सव्वं॥1596॥

देवत्त माणुसत्तो जं ते जाएण सकयकम्मवसा ।
दुक्खाणि किलेसा वि य अणंतखुत्तो समणभूदं॥1597॥

पियविप्पओगदुक्खं अप्पियसंवासजाददुक्खं च ।
जं वेमणस्सदुखं जं दुक्खंपच्छिदालाभे॥1598॥

परभिच्चदाए जंतेअसभवयणोहिं कडुगफरुसेहिं ।
णिभत्थणावमाणणतज्जण दुक्खाइं पत्ताइं॥1599॥

दीणत्तरो सचिंतासोगामरिसिग्गिपउलिदमणो जं ।

पत्तो घोरं दुक्खं माणुसजोणीए संतेण॥1600॥

दंडणमुंडणताडणधरिसणपरिमोस संकिलेसा ।

धणहरणदारधरिसणघरदाह जलादिधणनासं॥1601॥

दंडकसालट्टिसदणि डंगुराकंटमद्दणं घोरं ।

कुम्भीपाको मच्छयपलीवणं भत्तवुच्छेदो॥1602॥

दमणं च हत्थिपादस्स णिगलअंदूरवरत्तरज्जूहिं ।

वंधणमाकोडणयं ओलंवणणिहणणं चेव॥1603॥

कण्णोठ्ठसीसणासाछेदणदंताण भंजणं चेव ।

उप्पाडणं च अच्छीण तहा जिभायणीहरणं॥1604॥

अग्गिविसत्तुसप्पादिवालसत्थाभिघाद घादेहिं ।

सीदुण्हरोगदंसमसएहिं तण्णाछुहादीहिं॥1605॥

जं दुक्खं संपत्तो अणंतखुत्तो मणे सरीरे य ।

माणुसभवे वि तं सव्वमेव चिंतैहि तं धीर॥1606॥

सरीरादो दुक्खाद होइ देवेसु माणसं तिव्वं ।

दुक्खं दुस्सहमवसस्स परेण अभिजुज्जमाणस्स॥1607॥

देवो माणी संतो पासिय देवे महट्ठिए अण्णे ।

जं दुक्खं सम्पत्तो घोरं भग्णेण माणेण॥1608॥

दिव्वे भोगे अच्छरसाओ अवसस्स सग्गवासं च ।
पजहंतगस्स जं ते दुक्खं जादं चयणकाले॥1609॥

जं गभवासकुणिमं कुणिमाहारं छुहादिदुक्खं च ।
चित्तंतगस्स यं सुचि सुहिदयस्स दुक्खं चयणकाले॥1610॥

एवं एदं सव्वं दुक्खं चदुगदिगदं च जं पत्तो ।
तत्तो अणंत भागो होज्ज ण वा दुक्खभिमगं ते॥1611॥

संखेज्जमसंखेज्जं कालं ताइं अविस्समन्तेण ।
दुक्खाइं सोढाइं किं पुण अदिअप्पकालमिमं॥1612॥

जदि तारिसाओ तुह्मे सोढाओ वेदणाओ अवसेण ।
धम्मोत्ति इमा सवसेण कहं सोढुंण तीरेज्ज॥1613॥

तण्हा अणंत खुत्तो संसारे तारिसी तुमं आसी ।
जं पसमेदुं सव्वोदधीणमुदगं ण तीरेज्ज॥1614॥

आसी अणंतखुत्तो संसारे ते छुधावि तारिसिया ।
जं पसमेदंु सव्वो पुग्गलकाओ ण तीरेज्ज॥1615॥

जदि तारिसया तण्हा छुधा य अवसेण ते तदा सोढा ।
धम्मोत्ति इमा सवसेण ण कथं सोढुं ण तीरेज्ज॥1616॥

सुइपाणएण अणुसट्ठिभोयणेण य सदोवगहिण ।
ज्झणोसहेण तिच्चा वि वेदणा तीरदे सहिदुं॥1617॥

भीदो व अभीदो वा णिप्पडियम्मो व सपडियम्मो वा ।
मुच्चइ ण वेदणाए जीवो कम्मे उदिण्णम्मि॥ 1618॥

पुरिसस्स पावकम्मोदएण ण करंति वेदणोवसमं ।
सुद्धु पउत्ताणि वि ओसधाणि अदिवीरियाणी वि॥ 1619॥

रायादिकुडुंबीणं अदयाए असंजमं करंताणं ।
धण्णंतरी वि कादुं ण समत्थो वेदणोवसमं॥ 1620॥

किं पुण जीवणिकायं दयंतया जादणेण लद्धहिं ।
फासुगदव्वेहिं करंति साहुणो वेदणोवसमं॥ 1621॥

मोक्खाभिलासिणो संजदस्स णिधणगमणं पि होदि वरं ।
ण य वेदणाणिमित्तं अप्पासुगसेवणं कादंु॥ 1622॥

णिधणगमो एयभवे णासो ण पुणो पुरिल्लजम्मेसु ।
णाणं असंजमो पुण कुणइ भवसएसु बहुगेसु॥ 1623॥

ण करंति णिव्वुइं इच्छया वि देवा सइंदिया सव्वे ।
पुरिसस्स पावकम्मे अणुक्कमगे उदिण्णम्मि॥ 1624॥

किह पुण अण्णो काहिदि उदिण्णकम्मस्स णिव्वुदिं पुरिसो ।
हत्थीहिं अतीरं तं भंतुं भंजिहिदि किह ससओ॥ 1625॥

ते अप्पणो वि देवा कम्मोदयपच्चयं मरणदुक्खं ।
वारेदुं ण समत्था धणिदं पि विकुव्वमाणा वि॥ 1626॥

उज्झंति जत्थ हत्थी महाबलपरक्कमा महाकाया ।

सुत्ते तम्मि वहंते ससया ऊढेल्लया चेव॥1627॥

किह पुण अण्णो मुच्चहिदि सगेण उदयागदेण कम्मेण ।

तेलोक्केण वि कम्मं अवारणिज्जं खु समुवेदं॥1628॥

कह ठाइ सुक्कपत्तं वाएण पडंतयम्मि मेरुम्मि ।

देवे वि य विहडयदो कम्मस्स तुमम्मि का सण्णा॥1629॥

कम्माइं बलियाइं बलिओ कम्मादु णत्थि कोई जगे ।

सव्ववलाइं कम्मं मलेवि हत्थीव णलिणिवणं॥1630॥

इच्चेवं कम्मदओ अवारणिज्जोत्ति सुठ्ठु णाऊण ।

मा दुक्खायसु मणसा कम्मम्मि सगे उदिण्णम्मि॥1631॥

पडिकुविदे वि सण्णे रडिदे दुक्खादिदे कि लिठ्ठे वा ।

ण य वेदणोवसामदि णेव विसेसो हवदि तिस्से॥1632॥

अण्णो वि को वि ण गुणोत्थ संकिलेसेण होइ खवयस्स ।

अट्टं सुसंकिलेसो ज्झाणं तिरियाउगणिमित्तं॥1633॥

हदमागासं मुट्ठीहिं होइ तह कंडिया तुसा होंति ।

सिगदाओ पीलिदाओ घुसिलिदमुदयं च होइ जहा॥1634॥

पुव्वं सयमुवभुत्तं कालं णाएण तेत्तियं दव्वं ।

को धारणीओ धणिदस्स देंतओ दुक्खिओ होज्ज॥1635॥

तह चेव सयं पुव्वं कदस्स कमस्स पाककलम्मि ।
णायागयम्मि को णाम दुक्खिओ होज्ज जाणंता॥1636॥

इय पुव्वकदं इण मज्ज महं कम्माणुगत्ति णाऊण ।
रिणमुक्खणं च दुक्खं पेच्छसु मा दुक्खिओ होज्ज॥1637॥

पुव्वकदमज्झ कम्मं फलिदं दोसेण इत्थ अण्णस्स ।
इदि अप्पणो पओगं णच्चा मा दुक्खिदो होज्ज॥1638॥

जदिदा अभूदपुव्वं अण्णेसिं दुक्खमप्पणो चेव ।
जादं हविज्ज तो णाम होज्ज दुक्खाइदं जुत्तं॥1639॥

सव्वेसिं सामण्णं अवस्सदायव्वयं करं काले ।
णाएण य को दाऊण णरो दुक्खादि बिलवदि वा॥1640॥

सव्वेसिं सामण्णं करभूदमवस्सभाविकम्मफलं ।
इण मज्ज मेत्ति णच्चा लभसु सदिं तं धिदिं कुणसु॥1641॥

अरहंतसिद्धकेवलि अधित्ता सव्वसंघसक्खिस्स ।
पच्चक्खाणस्स कदस्स भंजणादो वरं मरणं॥1642॥

आसादिदा तओ होंति तेण ते अप्पमाणकरणेण ।
राया विव सक्खिकदो विसंवदंतेण कज्जम्मि॥1643॥

जइ दे कदा पमाणं अरहंतादी हवेज्ज खवएण ।
तस्सक्खिदं कयं सो पच्चक्खाणं ण भंजिज्ज॥1644॥

सक्खिकदरायहीलणमावहइ णरस्स जह महादोसं ।
तह जिणवरादिआसादणा वि दोसं महं कुणदि॥1645॥

तित्थयर पवयण सुदे आइरिए गणहरे महट्ठीए ।
एदे आसादंतो पावइ पारंचियं ठाणं॥1646॥

सक्खीकयरायासादणे हु दोसं करे हु एयभवे ।
भवकोडीसु य दोसं जिणादि आसादणं कुणइ॥1647॥

मोक्खभिलासिणो संजदस्स णिधणगमणं पि होइ वरं ।
पच्चक्खाणं भंजंतस्स ण वरमरहदादिसक्खिकदा॥1648॥

णिधणगमणमेयभवे णासो ण पुणो पुरिल्लजम्मेसु ।
णासं वयभंगो पुण कुणइ भवसएसु वहुएसु॥1649॥

ण तहा दोसं पावइ पच्चक्खाणमकरित्तु कालगदो ।
जह भंजणा हु पावदि पच्चक्खाणं महादोसं॥1650॥

आहारत्थं हिंसइ भणइ असच्चं करेइ तेणक्कं ।
रूसइ लुब्भइ मायां करेइ परिणिहदि य संगे॥1651॥

होइ णरो णिल्लज्जो पयहइ तवणाणदंसण चरित्तं ।
आमिसकलिणा ठइओ छायां मइलेइ य कुलस्स॥1652॥

णासदि बुद्धी जिभावसस्स मंदा वि होदि तिक्खा वि ।
जोणिगसिलेसलगो व होइ पुरिसो अणप्पवसो॥1653॥

धीरत्तणमाहप्पं कदण्णदं विणयधम्मसभावो ।
पयहइ कुणइ अणत्थं गललग्गो मच्छओ चेव॥1654॥

आहारत्थं पुरिसो माणी कुलजादि पहिदकित्ती वि ।
भुंजंति अभोज्जाए कुणइ कम्मं अकिच्चं खु॥1655॥

आहारत्थं मज्जारिसुंसुमारी अही मणुस्सी वि ।
दुब्बिक्खादिसु खायंति पुत्तभंडाणि दइयाणि॥1656॥

इहपरलोइयदुक्खाणि आवहंते णरस्स जे दोसा ।
ते दोसे कुणइ णरो सव्वे आहारगिद्धीए॥1657॥

अवधिट्ठाणं णिरयं मच्छा आहार हेदु गच्छंति ।
तत्थेवाहारभिलासेण गदो सालिसिच्छो वि॥1658॥

चक्कधरो वि सुभूमो फलरसगिद्धीए बंचिओ संतो ।
णट्ठो समुद्धमज्झे सपरिजणो तो गओ णिरयं॥1659॥

आहारत्थं काऊण पावककम्माणि तं परिगओ सि ।
संसारमणादीयं दुक्खसहस्साणि पावंतो॥1660॥

पुणरवि तहेव तं संसार किं भमिदुमिच्छसि अणंतं ।
जं णाम ण वोच्छिज्जइ अज्जवि आहार सण्णा ते॥1661॥

जीवस्स णत्थि तिती चिरं पि भुंजंतयस्स आहारं ।
तितीए विणा चित्तं उव्वूरं उद्धुदं होय॥1662॥

जह इंधणेहिं अग्गी जह य समुद्धो णदीसहस्सेहिं ।
आहारेण ण सक्को तह तिप्पेदुं इमो जीवो॥1663॥

देविंदचक्कवट्टी य वासुदेवा य भोगभूमा य ।
आहारेण ण तित्ता तिप्पदि कह भोयणे अण्णो॥1664॥

उद्धदमणस्स ण रदी विणा रदीए कुदो हवदि पीदी ।
पीदीए विणा ण सुहं उद्धदचितस्स घण्णस्स॥1665॥

सव्वाहार विधाणेहिं तुमे ते सव्वपुग्गला बहुसो ।
आहारिदा अदीदे काले तित्तिं च सि ण पत्तो॥1666॥

किं पुण कंठप्पाणो आहारेदूण अज्जमाहारं ।
लभिहिसि तित्तिं पाऊणुदधिं हिमलेहणेणेव॥1667॥

को एत्थ विंभओ दे बहुसो आहारभुत्तपुव्वम्मि ।
जुं जेज्ज हुं अभिलासो अभुत्त पुव्वम्मि आहारे॥1668॥

आवादमेत्तसोक्खो आहारे ण हु सुखं बहुं अत्थि ।
दुख चेवत्थ बहुं आहट्टंतस्स गिंद्दीए॥1669॥

जिभामूलं बोलेदि वेगदो वरहओव्व आहारो ।
तत्थेव रसं जाणइ ण य परदो ण वि य से पुरदो॥1670॥

अच्छिणिमिसेणमेत्तो आहारसुहस्स सो हवइ कालो ।
गिंद्दीए गिलइ वेगं गिंद्दीए विणा ण होइ सुखं॥1671॥

दुखं गिद्धीघत्थस्साहट्टन्तस्स होइ बहुगं च ।
चिरमाहट्टियदुणायचेडस्स व अण्णगिद्धीए ॥ 1672 ॥

को णाम अप्पसुखस्स कारणं बहुसुखस्स चुक्केज्ज ।
चुक्कइ हु संकिलिसेण मुणी सग्गपवग्गाणं ॥ 1673 ॥

महुलित्तं असिधारं लेहइ भुंजइ य सो सविसमण्णं ।
जो मरणदेसयाले पच्छेज्ज अकप्पियाहारं ॥ 1674 ॥

असिधारं व विसं वा दोसं पुरिसस्स कुणइ एयभवे ।
कुणइ दु मुणिणो दोसं अकप्पसेवा भवसएसु ॥ 1675 ॥

जावंति किंचि दुखं सारीरं माणसं च ।
पत्तो अणंतखुत्तं कायस्स ममत्तिदोसेण ॥ 1676 ॥

एण्हं पि जदि ममत्तिं कुणसि सरीरे तहेव ताणि तुमं ।
दुक्खाणि संसरंतो पाविहसि अणंतयं कालं ॥ 1677 ॥

णत्थि भयं मरणसमं जम्मणसमयं ण विज्जदे दुःखं ।
जम्मणमरणादकं छिण्णममत्तिं सरीरादो ॥ 1678 ॥

अण्णं इमं सरीरं अण्णो जीवोत्ति णिच्छिदमदीओ ।
दुक्खभयकिलेसयरीं मा हु ममत्तिं कुण सरीरे ॥ 1679 ॥

सव्वं अधियासंतो उवसग्गविधिं परीसहविधिं च ।
णिस्संगदाए सल्लिह असंकिलेसेण तं मोहं ॥ 1680 ॥

ण वि कारणं तणादीसंधारो ण वि य संघसमवाओ ।
साधुस्स संकिलेसो तस्स य मरणावसाणम्मि॥1681॥

जह वाणियगा सागर जलम्मि णावाहिं रयणपुण्णाहिं ।
पत्तणमासण्णा वि हु पमादमूढा विवज्जति॥1682॥

सल्लेहणा विसुद्धा केई तह चेव विविहसंगेहि ।
संधारे विहरंता वि संकिलिठ्ठा विवज्जंति॥1683॥

सल्लेहणापरिस्सममिमं कयं दुक्करं च सामण्णं ।
मा अप्पसोक्खहेउं तिलोगसारं वि णासेइ॥1684॥

धीरपुरिसपण्णत्तं सप्पुरिसणिसेवियं उवणमिक्का ।
धण्णा णिरावयक्खा संधारगया णिसज्जंति॥1685॥

तम्हा कलेवरकुडी पव्वोढव्वत्ति णिम्ममो दुक्खं ।
कम्मफल मुवेक्खंतो विसहसु णिव्वेदणो चेव॥1686॥

इय पण्णविज्जमाणो सो पुव्वं जायसंकिलेसादो ।
विणियत्तंतो दुक्खं पस्सइ परदेहदुक्खं वा॥1687॥

रायादिमहद्धिययागमणपओगेण चा वि माणिस्स ।
माणज्जणेण कवयं कायव्वं तस्स खवयस्स॥1688॥

इच्चेवमाइकवचं भणिदं उस्सीगयं जिणमदम्मि ।
अववादियं च कवयं आगाढे होइ कादव्वं॥1689॥

जह कवचेण अभिञ्जेण कवचिओ रणमुहम्मि सत्तूणं ।
जायइ अलंघणिज्जो कम्मसमत्थो य जिणदि य ते॥1690॥

एवं खवओ कवचेण कवचिओ तह परीसहरिऊणं ।
जायइ अलंघणिज्जो ज्झाणसमत्थो य जिणदि य ते॥1691॥

समता

एवं अधियासंतो सम्मं खवओ परीसहे एदे ।
सव्वत्थ अपडिवद्धो उवेदि सव्वत्थ सम्भावं॥1692॥

सव्वेसु दव्वपज्जयविधीसु णिच्चं ममत्तिदो विजडो ।
णिप्पणयदोसमोहो उवेदि सव्वत्थ समभावं॥1693॥

संजोगविप्पओगेसु जहदि इठ्ठेसु वा अणिठ्ठेसु ।
रदि अरदि उस्सुगतं हरिसं दीणत्तणं च तहा॥1694॥

मित्तेसुयणादीसु य सिस्से साधम्मिए कुले चावि ।
रागं वा दोसं वा पुव्वं जायंपि सो जहइ॥1695॥

भोगेसु देवमाणुस्सगेसु ण करेइ पच्छणं खवओ ।
मग्गो विराधणाए भणिओ विसयाभिलासोत्ति॥1696॥

इठ्ठेसु अणिठ्ठेसु य सद्दफरिसरसरूवगंधेसु ।
इह परलोए जीविदमरणे माणावमाणे च॥1697॥

सव्वत्थ णिव्विसेसो होदि तदो रागदोसरहिदप्पा ।
खवयस्स रागदोसा हु उत्तमठ्ठं विर धेंति॥1698॥

जदि वि य से चरिमंते तसमुदीरदि मारणंतियमसायं ।
सो तह वि असंमूढो उवेदि सव्वत्थ समभावं॥1699॥

एवं सुभाविदप्पा विहरइ सो जाववीरियं काये ।
उठ्ठाणे सयणे वा णिसोयणे वा अपरिदंतो॥1700॥

जाहे सरीरचेट्ठा विगदत्थामस्स से यदणुभूदा ।
देहादि वि ओसगं सव्वत्तो कुणइ णिखेक्खो॥1701॥

सेज्जा संथारं पाणयं चउधिं तहा सरीरं च ।
विज्जावच्चकरा वि य वोसरइ समत्तमरूढो॥1702॥

अवहट्ट कायजोगे व विप्पओगे य तत्थ सो सव्वे ।
सुद्धे मणप्पओगे होद णिरुद्धज्झवसियप्पा॥1703॥

एवं सव्वत्थेसु वि समभावं उवगओ विसुद्धप्पा ।
मिती करुणं मुदिदमुवेक्खं खवओ पुण उवेदि॥1704॥

जीवेसु मित्तचिंता मेत्ती करुणा य होइ अणुकंपा ।
मुदिदा जदिगुणचिंता सुहदुक्खधियासणमुवेक्खा॥1705॥

ध्यान

दंसणणाणचरित्तं तवं च विरियं समाधिजोगं च ।
तिविहेणुवसंपज्जिय सव्वुवरिल्लं कमं कुणइ॥1706॥

जिदरागो जिददोसो जिदिंदिओ जिदभओ जिदकसाओ ।
अरदिरदिमोहणो ज्झाणोवगओ सदा होहि॥1707॥

धम्मं चदुप्पयारं सुक्कं च चदुव्विधं किलेसहरं ।
संसार दुक्खभीरो दुण्णि वि ज्झाणाणि सो ज्झदि॥1708॥

ण परीसहेहिं संताविउं वि सो झाइ अट्टरुद्दाणि ।
सुट्ठुवहाणे सुद्धं पि अट्टरुद्दा वि णासंति॥1709॥

अट्टे चउप्पयारे रुद्धे य चउव्विधे य जे भेदा ।
ते सव्वे परिजाणदि संथारगओ तओ खवओ॥1710॥

अमणुणसंपओगे इठ्ठुविओए परिस्सहणिदाणे ।
अठ्ठं कसायसहियं झाणं भणियं समासेण॥1711॥

तेणिक्क मोससारक्खणेसु तह चेव छव्विहारम्भे ।
रुद्धं कसायसहियं झाणं भणियं समासेण॥1712॥

अवहट्ट अट्टरुद्ध महाभये सुग्गदीए पच्चूहे ।
धम्मे सुक्के य सदा होदि समण्णागदमदीओ॥1713॥

इंदियकसायजोगणिरोधं इच्छं च णिज्जरं विउलं ।
चित्तस्स य वसियत्तं मग्गादु अविप्पणासं च॥1714॥

किंचिवि दिट्ठिमुपावत्तइत्तु झाणे णिरुद्धदिट्ठीओ ।
अप्पाणम्मि सदिं संधित्ता संसारमोक्खट्ठं॥1715॥

पच्चाहरित्तु विसयेहिं इंदियेहिं मणं च तेहितो ।
अप्पाणम्मि मणं तं जोगं पणिधाय धारेदि॥1716॥

एयग्गेण मणं रुंभिऊण धम्मं चउव्विहं झादि ।
आणापायविवागं विचयं संठाणविचयं च॥1717॥

धम्मस्स लक्खणं से अज्जवलहुगत्तमद्दवोवसमा ।
उवदेसणा य सुत्ते णिसग्गजाओ रुचीओ दे॥1718॥

आलंवणं च वायण पुच्छण परिवट्टणाणुपेहाओ ।
धम्मस्स तेण अविसुद्धाओ सव्वाणुपेहाओ॥1719॥

पंचेव अत्थिकाया छज्जीवणिकाए दव्वमण्णं य ।
आणगम्भे भावे आणाविचएण विचिणादि॥1720॥

कल्लापावगाणउपाये विचिणादि जिणमदहमुवेच्च ।
विचिणादि वा अवाए जीवाण सुभे य असुभे य॥1721॥

एयाणेयभवगदं जीवाण पुण्णपावकम्मफलं ।
उदओदीरणसंकमबंधे मोक्खं च विचिणादि॥1722॥

अहतिरियउट्ठलोए विचिणादि सपज्जए ससंठाणे ।
एत्थे व अणुगदाओ अणुपेहाओ वि विचिणादि॥1723॥

अद्धवमसरणमेगत्तमण्ण संसारलोयमसुइत्तं ।
आसवसंवरणिज्जर धम्मं बोधिं च चिंतिज्ज॥1724॥

लोगो विलीयदि इमो फेणोव्व सदेवमाणुसतिरिक्खो ।
रिद्धीओ सव्वाओ सिविणयसंदंसणसमाओ॥1725॥

विज्जूव चंचलाइं दिट्ठपणट्ठाईं सव्वसोक्खाइं ।
जलबुब्बुदोव्व अधुवाणि हुंति सव्वाणि ठाणाणि॥1726॥

णावागदाव बहुगइपधाविदा हुंति सव्वसंबंधी ।
सव्वेसिमासया वि अणिच्चा जह अभसंधाया॥1727॥

संवाओ वि अणिच्चो पहियाणं पिण्डणं व छाहीए ।
पीदी वि अच्छिरागोव्व अणिच्चा सव्वजीवाणं॥1728॥

रत्तिं एगम्मि दुमे सउणाणं पिण्डणं व संजोगो ।
परिवेसोव अणिच्चो इस्सरियाणाधाणारोगं॥1729॥

इंदियसामग्गी वि अणिच्चा संझाव होइ जीवाणं ।
मज्झण्हं व णराणं जोव्वणमणवट्ठिदं लोए॥1730॥

चंदो हीणो व पुणो विट्ठदि एदि य उदू अदीदो वि ।
णदु जोव्वणं णियत्तइ णदीजलमदछिदं चेव॥1731॥

धावदि गिदिणदिसोदंव आउगं सव्वजीवलोगम्मि ।
सुकुमालदा वि हीयदि लोगे पुव्वणहछाही व॥1732॥

अवरणहरुक्खछाही व अट्ठिदं वट्ठदे जरा लोगे ।
रूवं पि णासइ लहुं जलेव लिहिदेल्लयं रूवं॥1733॥

तेओ वि इंदधणुतेजसण्णिहो होइ सव्वजीवाणं ।
दिट्ठपणट्ठा बुद्धी वि होइ मुक्काव जीवाणं॥1734॥

अदिवडइ बलं खिप्पं रूवं धुलीकदंबरं छाए ।

वीचीव अद्धवं वीरियंपि लोगम्मि जीवाणं॥1735॥

हिमणिचओ वि व गिहसयणासणभंडाणि होति अधुवाणि ।

जसकित्ती वि अणिच्चा लोए संज्झभरागोव्व॥1736॥

किह दा सत्ता कम्मवसत्ता सारदियमेहसरिसमिणं ।

ण मुणंति जगमणिच्चं मरणभयसमुत्थिया संता॥1737॥

णासदि मदो उदिण्णे कम्मेण य तस्स दीसदि उवाओ ।

अमदंपि विसं सच्छं तणं पि णीयं विहंति अरी॥1738॥

मुखस्स वि होदि मदी कम्मोवसमे य दीसदि उवाओ ।

णीया अरी वि सच्छं वि तणं अमयं च होदि विसं॥1739॥

पाओदएण अत्थो हत्थं पत्तो वि णस्सदि णरस्स ।

दूरादो वि सपुणस्स एदि अत्थो अयत्तेण॥1740॥

पाओदएण सुट्ठु वि चेट्ठंतो को वि पाउणदि दोसं ।

पुण्णोदएव दुट्ठु वि चेट्ठंतो को वि लहदि गुणं॥1741॥

पुण्णोदएण करसइ गुणे असंते वि होइ जसकित्ती ।

पाओदएण कस्सइ सुगुणस्स वि होइ जसधाओ॥1742॥

णिरुवक्कमस्स कम्मस्स फले समुवट्ठिदम्मि दुक्खम्मि ।

जादिजरामरणरुजाचिंता भयवेदणादीए॥1743॥

जीवाण णत्थि कोई ताणं सरणं च जो हवेज्ज इधं ।
पायालमदिगदो वि य ण मुच्चदि सकम्मउदयम्मि॥1744॥

गिरिकंदरं च अडवि सेलं भूमिं च उदधि लोगंतं ।
अदिगंतूणं वि जीवो ण मुच्चदि उदिण्णकम्मेण॥1745॥

दुगचदुअणेयपाया परिसप्पादी य जंति भूमीओ ।
मच्छा जलम्मि पक्खी णभम्मि कम्मं तु सव्वथ॥1746॥

रविचंदवादवेउव्वियाणमगमा वि अत्थि हु पदेसा ।
ण पुणो अत्थि परसो अगमो कम्मस्स होइ इधं॥1747॥

विज्जोसहमंतबलं बलवीरिय णीयायहत्थिरहजोहा ।
सामादिउवाया वा ण होति कम्मोदए सरणं॥1748॥

जह आइच्चमुदेतं कोई वारंतउ जगे णत्थि ।
तह कम्ममुदीरंतं कोई वारंतउ जगे णत्थि॥1749॥

रोगाणं पडिगारो दिट्ठा कम्मस्स णित्थ पडिगारो ।
कम्मं मलेदि हु जगं हत्थीव णिरंकुसो मत्तो॥1750॥

रोगाणं पडिगारो णत्थि य कम्मे णरस्स समुदिण्णे ।
रोगाणं पडिगारो होदि हु कम्मे उवसमंते॥1751॥

विज्जाहरा य वलदेववासुदेवा य चक्कवट्ठी वा ।
देविंदा व ण सरणं कस्सइ कम्मोदए होति॥1752॥

वोल्लेज्ज चंकमंतो भूमिं उदधिं तरिज्ज पवमाणो ।
ण पुणो तीरदि कम्मस्स फलमुदिण्णस्स बोलेदुं॥1753॥

सीहतिमिंगिलगहिदस्स णत्थि मच्छो मगो व जध सरणं ।
कम्मोदयम्मि जीवस्स णत्थि सरणं तहा कोई॥1754॥

दंसणणाणचरित्तं तवो य ताणं च होइ सरणं च ।
जीवस्स कम्मणासणहेदुं कम्मे उदिण्णम्मि॥1755॥

पावं करेदि जीवो बंधवहेदुं सरीरहेदुं च ।
णिरयादिसु तस्स फलं एक्को सो चेव वेदेदि॥1756॥

रोगादिवेदणाओ वेदयमाणस्स णिययकम्मफलं ।
पेच्छंता वि समक्खं किंचिवि ण करंति से णियया॥1757॥

तह मरइ एक्कओ चेव तस्स ण विदिज्जगो हवइ कोई ।
भोगे भोत्तुं णियया विदिज्जया ण पुण कम्मफलं॥1758॥

णीया अत्था देहादिया य संग्गा ण कस्स इह होति ।
परलोगं अण्णेत्ता जदि वि दइज्जंति ते सुट्ठु॥1759॥

इहलोगबंधवा ते णियया ण परम्मि होति लोगम्मि ।
तह चेव धणं देहो संग्गा सयणासणादीयं॥1760॥

जो पुण धम्मो जीवेण कदो सम्मत्तचरणसुदमइओ ।
सो परलोए जीवस्स होइ गुणकारकसहाओ॥1761॥

बद्धस्स बंधणे व ण रागो देहम्मि होइ णाणिस्स ।
विससरिसेसु ण रागो अत्थेसु महब्भयेसु तहा॥1762॥

किहदा जीवो अण्णो अण्णं सोयदि हु दुक्खियं णीयं ।
ण य बहुदुक्खपुरक्कडमप्पाणं सोयदि अबुद्धी॥1763॥

संसारम्मि अणंते सगेण कम्मेण हीरमाणाणं ।
को कस्स होइ सयणो सज्जइ मोहा जणम्मि जणो॥1764॥

सव्वो वि जणो सयणो सव्वस्स वि आसि तीदकालम्मि ।
पंते य तहाकाले होहिदि सजणो जणस्स जणो॥1765॥

रत्तिं रत्तिं रुक्खे रुक्खे जह सउणयाण संगमणं ।
जादीए जादीए जणस्स तह संगमो होई॥1766॥

पहिया उवासये जह तहिं तहिं अल्लियंति ते य पुणो ।
छंडित्ता जंति णरा तह णीयसमागमा सव्वे॥1767॥

भिण्णपयडिम्मि लोए को कस्स सभावदो पिओ होज्ज ।
कज्जं पडि संबंधं वालुयमुठ्ठीव जगमिणमो॥1768॥

माया पोसेइ सुयं आधारो मे भविस्सदि इमोत्ति ।
पोसेदि सुदो मादं गब्भे धरिओ इमाएत्ति॥1769॥

होऊण अरी वि पुणो मित्तं उवकारकारणा होइ ।
पुत्तो वि खणेण अरी जायदि अवकारकरणेण॥1770॥

तह्या ण कोइ कस्सइ सयणो व जणो व अत्थि संसारे ।
कज्जं पडि हुंति जगे णीया व अरी व जीवाणं॥1771॥

जो जस्स वट्टदि हिदे पुरिसो सो तस्स बंधवो होदि ।
जो जस्स कुणदि अहिदं सो तस्स रिवृत्ति णायव्वो॥1772॥

णीया करंति विग्घं मोक्खभुदयावहस्स धम्मस्स ।
कारिंति य अइबहुगं असंजमं तिव्वदुक्खकरं॥1773॥

णीया सत्तू पुरिसस्स हुंति जदिधम्मविग्घकरणेण ।
कारिंति य अतिबहुगं असंजमं तिव्वदुःखयरं॥1774॥

पुरिसस्स पुणो साधु उज्जोगं संजणंति जदिधम्मे ।
तथ तिव्वदुक्खकरणं असंजमं परिहरावेंति॥1775॥

तह्या णीया पुरिसस्स होति साहू अणेयसुहहेदु ।
संसारमदीणंता णीया य णरस्स होति अरी॥1776॥

मिच्छत्तमोहिदमदी संसार महाडवी तदोदीदि ।
जिणवयणविप्पणट्ठो महाडवीविप्पणट्ठो वा॥1777॥

बहुतिव्वदुक्खसलिलं अणंतकायप्पवेसपादालं ।
चदुपरिवट्टावत्तं चदुगतिबहुपट्टणमणंतं॥1778॥

हिंसादिदोसमगरादिसावदं दुविहजीवबहुमच्छं ।
जाइजरामरणोदयमणेय जादीसुदुम्मीयं॥1779॥

दुविहपरिणामवादं संसारमहोदधिं परमभीमं ।
अदिगम्म जीवपोदो भमइ चिरं कम्मभण्डभरो॥1780॥

एगविगतिगचउपंचिंदियाण जाओ हवंति जोणीओ ।
सव्वाउ ताउ पत्तो अणंतखुत्तो इमो जीवो॥1781॥

अण्णं गिण्हदि देहं तं पुण मुत्तूण गिण्हदे अण्णंश ।
घडिजंतं व य जीवो भमदि इमो दव्वसंसारे॥1782॥

दं
जीवो संसारमावण्णो॥1783॥

जत्थ ण जादो ण मदो हवेज्ज जीवो अणंतसा चेव ।
काले तीदम्मि इमो ण सो पदेसो जए अत्थि॥1784॥

तक्कालतदाकालसमएसु जीवो अणंतसो चेव ।
जादो मदो य सव्वेसु इमो तीदम्मि कालम्मि॥1785॥

अट्ठपदेसे मुत्तूण इमो सेसेसु सगपदेसेसु ।
तत्तंपि व अद्धहणं उव्वत्तणपरत्तणं कुणदि॥1786॥

लोगागासपएसा असंखगुणिदा हवंति जावदिया ।
तावदियाणि हु अज्झवसाणाणि इमस्स जोवस्स॥1787॥

अज्झवसाणठाणंतराणि जीवो विव्वइ इमो हु ।
णिच्चं पि जहा सरडो गिण्हदि णाणाविहे वण्णे॥1788॥

आगसम्मि वि पक्खी जले वि मच्छा थले वि थलचारी ।
हिंसंति एक्कमेवकं सव्वत्थ भयं खु संसारे ॥ 1789 ॥

ससउ वाहपरद्धो बिलित्ति णाऊण अजगरस्स मुहं ।
सरणत्ति मण्णमाणो मच्चुस्स मुहं जह अदीदि ॥ 1790 ॥

तह अण्णाणी जीवा परिद्धमाणच्छुहादिबाहेहिं ।
अदिगच्छंति महादुहहेदुं संसारसप्पमुहं ॥ 1791 ॥

जावदियाइं दुखाइं हवंति लोगम्मि सव्वजीवेसु ।
ताइंपि बहुविधाइं अणंतखुत्तो इमो पत्तो ॥ 1792 ॥

दुक्खं अणंतखुत्तो पावेत्तु सुहंपि पावदि कहिं वि ।
तह वि य अणंत खुत्तो सव्वाणि सुहाणि पत्ताणि ॥ 1793 ॥

करणेहिं होदि विगलो बहुसो वचिचित्तसोदणित्तेहिं ।
घाणेण य जिब्भाए चिट्ठाबलविरियजोगेहिं ॥ 1794 ॥

जच्चंधबहिरमूओ छादो तिसिओ वणे व एयाई ।
भमइ सुचिरंपि जीवो जम्मवणे णट्ठसिद्धिपहो ॥ 1795 ॥

एइंदियेसु पंचविधेसु वि उत्थाणवीरियविहूणो ।
भमदि अणंतं कालं दुक्खसहस्साणि पावेतो ॥ 1796 ॥

बहुदुक्खावत्ताए संसारणदीए पावकलुसाए ।
भमइ वरागो जीवो अण्णाणणिमीलिदो सुचिरं ॥ 1797 ॥

विसयामिसारगाढं कुजोणिणेमि सुहदुक्खदढखीलं ।

अण्णाणंतुबधरिदं कसायदढपट्टयाबंधं॥1798॥

बहुजम्मसहस्सविसालवत्तणिं मोहवेगमदिचवलं ।

संसारचक्कमारुहिय भमदि जीवो अणप्पवसो॥1799॥

भारं णरो वहंतो कहंचि विस्समदि ओरुहिय भारं ।

देहभरवाहिणो पुण ण लहंति खणं पि विस्समिदुं॥1800॥

कम्माणुभावदुहिदो एवं मोहंधयारगहणम्मि ।

अंधोव दुग्गमगे भमदि हु संसारकंतारे॥1801॥

दुक्खस्स पडिगरेंतो सुहमिच्छंतो य तह इमो जीवो ।

पाणवधादीदोसे करेइ मोहेण संछण्णो॥1802॥

दोसेहिं तेहिं बहुगं कम्मं बंधदि तदो णवं जीवो ।

अध तेण पच्चइ पुणो पविसित्तु व अग्गिमग्गीदो॥1803॥

बंधंतो मुच्चंतो एवं कम्मं पुणो पुणो जीवो ।

सुहकामो बहुदुक्खं संसारमणादियं भमइ॥1804॥

आहिंडयपुरिसस्स व इमस्स णीया तहिं तहिं होति ।

सव्वे वि इमो पत्ते संबंधे सव्वजीवेहिं॥1805॥

माया वि होइ भज्जा भज्जा मायत्तणं पुणमुवेदि ।

इय संसारे सव्वे पयिहट्टंते हु संबंधी॥1806॥

जणणी वसंततिलया भगिणी कमला य आसि भज्जाओ ।
धणदेवस्स य एक्कम्मि भवे संसारवासम्मि॥1807॥

राया वि होइ दासो दासो रायत्तणं पुणमुवेदि ।
इय संसारे परिवट्ठंते ठाणाणि सव्वाणि॥1808॥

कुलरूवतेयभोगाधिगो वि राया विदेहदेसवदी ।
वच्चघरम्मि सुभोगो जाओ कीडो सकम्मेहिं॥1809॥

होऊण महट्ठीउ देवो सुभवण्णगंधरूवधरो ।
कुणिमम्मि वसदि गम्भे धिगत्थु संसारवासस्स॥1810॥

इधइं परलोगे वा सत्तू पुरिसस्स हुंति णीया वि ।
इहइं परत्त वा खाइ पुत्तमंसाणि सयमादा॥1811॥

होऊण रिऊ बहुदुक्खकारओ बंधवो पुणो होदि ।
इय परिवट्ठइ णीयत्तणं च सत्तुत्तणं च जये॥1812॥

बिमलाहेदुं वंकेण मारिओ णिययभारियागम्भे ।
जाओ जाओ जादिंभरो सुदिट्ठी सकम्मेहिं॥1813॥

होऊण बंभणो सोत्तिओ खु पावं करित्तु माणेण ।
सुणको व सूगरो वा पाणो वा होइ परलोए॥1814॥

दारिदं अट्ठित्तं णिंदं च थुदिं च वसणमभुदयं ।
पावदि बहुसो जीवो पुरिसित्थिणवुं सयत्तं च॥1815॥

कारी होइ अकारी अप्पडिभोगो जणो हु लोगम्मि ।
कारी वि जणसमक्खं होइ अकारी सपडिभोगो॥1816॥

सरिसीए चंदिगाये कालो वेस्सो पिओ जहा जोण्हो ।
सरिसे वि तहाचारे कोई वेस्सो पिओ कोई॥1817॥

इय एस लोगधम्मो चिंतिज्जंतो करेइ णिव्वेदं ।
धण्णा ते भयवंता हे मुक्का लोगधम्मादो॥1818॥

बिज्जू व चंचलं फेणुदुब्बलं वाधिमहियमच्चुहदं ।
णाणी किह पेच्छंतो रमेज्ज दुक्खद्धु दंु लोगं॥1819॥

असुहा अत्था कामा य हुंति देहो य सव्वमणुयाणं ।
एओ चेव सुभो णवरि सव्वसोक्खायरो धम्मो॥1820॥

इहलोगियपर लोगियदोसे पुरिसस्स आवहइ णिच्चं ।
अत्थो अणत्थमूलं महाभयं मुत्तिपडिपंथो॥1821॥

कुणिमकुडिभवा लहुगत्तकारयाअप्पकालिया कामा ।
उवधो लोए दुक्खावहा य ण य हुंति ते सुलहा॥1822॥

अठ्ठिदलिया छिरावक्कवद्धिया मंसमट्टियालित्ता ।
बहुकुणिमभण्डभरिदा विहिंसणिज्जा खु कुणिमकुडी॥1823॥

इंगालो धोव्वंतो ण सुद्धिमुवयादि जह जलादीहिं ।
तह देहो धोव्वंतो ण जाइ सुद्धिं जलादीहिं॥1824॥

सलिलादीणि अमेज्झं कुणइ अमेज्झाणि ण दु जलादीणि ।
मेज्झममेज्झं कुव्वंति सयमवि मेज्झाणि संताणि॥1825॥

तारिसयममेज्झमयं सरीरयं किह जलादिजोगेण ।
मेज्झं हवेज्ज मेज्झं ण हु होदि अमेज्झमयघडओ॥1826॥

णवरि हु धम्मो मेज्झोधम्मत्थस्स वि णमंति देवा वि ।
धम्मेण चेव जादि खु साहू जल्लोसधादीया॥1827॥

जम्मसमुद्दे बहुदोसवीचिए दुक्खजलयराइण्णे ।
जीवस्स परिभमणम्मि करणं आसवो होदि॥1828॥

संसारसागरे से कम्मजलमसंवुडस्स आसवदि ।
आसवणीणावाए जह सलिलं उदधिमज्झम्मि ॥1829॥

धूली णेहुत्तुप्पिदगत्ते लगा मलो जधा होदि ।
मिच्छत्तादिसिणेहोल्लिदस्स कम्मं तथा होदि॥1830॥

ओगाढगाढणिचिदो पुग्लदव्वेहिं सवब्बो लोगो ।
सुहमेहिं बादरेहिं य दिस्सादिस्सेहिं य तहेव॥1831॥

मिच्छत्तं अविरमणं कसाय जोगा य आसवा होंति ।
अरहंतवुत्तअत्थेसु विमोहो होइ मिच्छत्तं॥1832॥

अविरमणं हिंसादी पंच वि दोसा हवन्ति णायव्वा ।
कोधादीया चत्तारि कसाया रागदोसमया॥1833॥

किहदा राओ रंजेदि णरं कुणिमे वि जाणुगं देहे ।
किहदा दोसो वेसं खणेण णीयंपि कुणइ णरं॥1834॥

सम्मादिट्ठी वि णरो जेसिं दोसेण कुणइ पावाणि ।
धित्तेसि गारविंदियसण्णामयरागदोसाणं॥1835॥

जो अभिलासो विसएसु तेण ण य पावए सुहं पुरिसो ।
पावदि य कम्मबंधं पुरिसो विसयाभिलासेण॥1836॥

कोई डहिज्ज जह चंदणं णरो दारुगं च बहुमोल्लं ।
णासेइ मणुस्सभवं पुरिसो तह विसयलोहेण॥1837॥

धुट्टिय रयणाणि जहा रयणद्दीवा हरेज्ज कट्ठाणि ।
माणुसभवे वि धुट्टिय धम्मं भोगे भिलसदि तहा॥1838॥

गंतूण णंदणवणं अमयं छंडिय विसं जहा पियइ ।
माणुशसभवे वि छड्डिय धम्मं भोगे भिलसदि तहा ॥1839॥

पावपओगा मणवचिकाया कम्मासवं पकुव्वंति ।
भुज्जंतो दुभत्तं वणम्मि जह आसवं कुणइ॥1840॥

अणुकंपासुद्धवओगो वि य पुण्णस्स आसवदुवारं ।
तं विवरीदं आसवदारं पावस्स कम्मस्स॥1841॥

मिच्छत्तासवदारं रुंभइ सम्मत्तदिढकवाडेण ।
हिंसादिदुवाराणिवि दढवदफलहेहिं रुंभंति॥1842॥

उवसमदयादमाउहकमरेण रक्खा कसायचोरेहिं ।
सक्का काउं आउहकरेण रक्खाव चोराणं॥1843॥

इंदियदुद्धन्तस्सा णिग्घिप्पंति दमणाणखलिणेहिं ।
उप्पहगामी णिग्घिप्पंति हु खलिणेहिं जह तुरया॥1844॥

अणिहुदमणसा इंदियसप्पाणि णिगेण्हिदुं ण तीरंति ।
विज्जामंतोसहधीणेणव आसीविसा सप्पा॥1845॥

पावपयोगासवदारणिरोधो अप्पमादफलिगेण ।
कीरइ फलिगेण जहा णावाए जलासवणिरोधो॥1846॥

गुत्तिपरिखाइगुत्तं संजमणयरं ण कम्मरिउसेणा ।
बंधेइ सत्तुसेणा पुरं व परिखादिहिं सुगुत्तं॥1847॥

समिदिदिढणावमारुहिय अप्पमत्तो भवोदधिं तरदि ।
छज्जीवणिकायवधादिपावमगरेहिं अच्छित्तो॥1848॥

दारेव दारवालो हिदये सुप्पणिहिदा सदी जस्स ।
दोसा धंसंति ण तं पुरं सुगुत्तं जहा सत्तु॥1849॥

जो खु सदिविप्पहूणो सो दोसरिऊण गेज्झओ होइ ।
अंधलगोव वरंतो अरीणमविदिज्जओ चेव॥1850॥

अमुयंतो सम्मत्तं परीसहसमोगरे उदीरंतो ।
णेव सदी मोत्तव्वा एत्व दु आराधणा भणिया॥1851॥

इय सव्वासवसंवरसंवुडकम्मासवो भवित्तु मुणी ।

कुव्वंति तवं विविहं सुत्तुत्तं णिज्जराहेदुं॥1852॥

तवसा विणा ण मोक्खो संवरमित्तेण होइ कम्मस्स ।

उवभोगादीहिं विणा धणं ण हु खीयदि सुगुत्तं॥1853॥

पुव्वकदकम्मसडणं तु णिज्जरा सा पुणो हवे दुविहा ।

पढमा विवागजादा विदिया अविवागजाया य॥1854॥

कालेण उवायेण य पच्चंति जहा वणप्फदिफलाइं ।

तह कालेण तवेण य पच्चंति कदाणि कम्माणि॥1855॥

सव्वेसिं उदयसमागदस्स कम्मस्स णिज्जरा होइ ।

कम्मस्स तवेण पुणो सव्वस्स वि णिज्जरा होइ॥1856॥

ण हु कम्मस्स अवेदिदफलस्स कस्सइ हवेज्ज परिमोक्खो ।

होज्ज व तस्स विणासो तवग्गिणा डज्झमाणस्स॥1857॥

इहिऊण जहा अग्गी विद्धं सदि सुबहुगंपि तणरासी ।

विद्धं सेदि तवग्गी तह कम्मतणं सुबहुगंपि॥1858॥

कम्मं विपरिणमिज्जइ सिणेहपरिसोसएण सुतवेण ।

तो तं सिणेहमुक्कं कम्मं परिसडदि धुलिव्व॥1859॥

धादुगदं जह कणयं सुज्झइ धम्मंतमग्गिणा महदा ।

सुज्झइ तवग्गिधंतो तह जीवो कम्मधादुगदो॥1860॥

तवसा चेव ण मोक्खो संवरहीणस्स होइ जिणवयणे ।
ण हु सोत्ते पविसंते कि सिणं परिसुस्सदि तलायं॥1861॥

एवं पिणद्धसंवरवम्मो सम्मत्तवाहणारूढो ।
सुदणाणमहाधणुग्गो झाणादितवोमयसरेहिं॥1862॥

संजमरणभूमीए कम्मारिचं पराजिणिय सव्वं ।
पावदि संजमजोहो अणोवमं मोक्खरज्जसिरिं॥1863॥

जीवो मोक्खपुरक्कडकल्लाणपरंपरस्स जो भागी ।
भावेणुववज्जदि सो धम्मं तं तारिसमुदारं॥1864॥

धम्मेण होदि वुज्जो विस्ससणिज्जा पिओ जसंसी य ।
सुहसज्झो य णराणं धम्मो मणणिव्वुदिकरो य॥1865॥

जावदियाइं कल्लाणाइं सग्गे य मणुअलोगे य ।
आवहदि ताणि सव्वाणि मोक्खं सोक्खं च वरधम्मो॥1866॥

ते धण्णा जिणधम्मं जिणदिट्ठं सव्वदुक्खणासयरं ।
पडिवण्णा दिढधिदिया विसुद्धमणसा णिरावेक्खा॥1867॥

वीए उम्मग्गविहरिदा सुचिरमिंदियस्सेहिं ।
जिणदिट्ठणिव्वुदिपहं धण्णा ओदरियं गच्छंति॥1868॥

रागेण य दोसेण य जगे रमतम्मि वीदरागम्मि ।
धम्मम्मि णिरासादम्मि रदी अदिदुल्लहा होइ॥1869॥

सफलं माणुसजम्मं तस्स हवदि जस्स चरणमणवज्जं ।

संसार दुक्खकारणकम्मागमदारसंरोधं॥1870॥

जह जह णिव्वेदुवसम वेरग्गदयादमा पवढ्ढंति ।

तह तह अभ्भासयरं णिव्वाणं होइ पुरिसस्स॥1871॥

सम्मदंसणतुम्बं दुवालसंगारयं जिणिंदाणं ।

वयणेमियं जगे जयइ धम्मचक्कं तवोधारं॥1872॥

दंसणसुदतवचरणमइयम्मि धम्मम्मि दुल्लहा बोही ।

जीवस्स कम्मसत्तस्स संसरंतस्स संसारे॥1873॥

संसारम्मि अणंते जीवाणं दुल्लहं मणुस्सत्तं ।

जुगसमिलासं जोगो जह लवणजले समुद्धिम्म॥1874॥

असुहपरिणामबहुलत्तणं च लोगस्स अदिमहल्लत्तं ।

जोणिबहुत्तं च कुणदि सुदुल्लहं माणुसं जोणी॥1875॥

देसकुलरूवमारोग्गमाउगं बुद्धिसवणगहणाणि ।

लद्धे वि माणुसत्ते ण हुंति सुलभाणि जीवस्स॥1876॥

लद्धेसु वि तेसु पुणे बोधी जिणसासणम्मि ण हु सुलहा ।

कुपधाकुलो य लोगो जं वलिया रागदोसा य॥1877॥

इय दुल्लहाय वोहीए जो पमाइज्ज कइ वि लद्धाए ।

सो उल्लट्टइ दुक्खेण रदणगिरिसिहरमारुहिय॥1878॥

फिडिदा संती बोधी ण य सुलहा होइ संसरंतस्स ।

पडिदं समुद्धमज्झे रदणं व तमंधयारम्मि॥ 1879॥

ते धणा जे जिणवर दिट्ठे धम्मम्मि होति संबुद्धा ।

जे य पवण्णा धम्मं भावेण उवट्ठिदमदीया॥ 1880॥

इय आलंबणमणुपेहाओ धम्मस्स होति ज्ञाणस्स ।

ज्ञायंतो ण वि णस्सदि ज्ञाणे आलंबणेहिं मुणी॥ 1881॥

आलंबणं च वायण पुच्छणपरिवट्टणाणुपेहाओ ।

धम्मस्स तेण अविरुद्धाओ सव्वाणुपेहाओ॥ 1882॥

आलंबणेहिं भरिदो लोगो झाइदुमणस्स खवयस्स ।

जं जं मणसा पेच्छदि तं तं आलम्बणं हवइ॥ 1883॥

इच्चेवमदिककंतो धम्मज्ञाणं जदा हवइ खवओ ।

सुक्कज्ञाणं ज्ञायदि तत्तो सुविसुद्धलेस्साओ॥ 1884॥

ज्ञाणं पुधत्तसवितक्कसवीचारं हवे पढमसुक्कं ।

सवितक्केक्कत्तावीचारं ज्ञाणं विदियसुक्कं॥ 1885॥

सुहुमकिरियं खु तदियं सुक्कज्ञाणं जिणहिं पण्णत्तं ।

वेति चउत्थं सुक्कं जिणा समुच्छिण्णकिरियं तु॥ 1886॥

दव्वाइं अणेयाइं तीहिं वि जोगेहिं जेण ज्ञायंति ।

उवसंतमोहणिज्जा तेण पुधत्तंति तं भणिया॥ 1887॥

जम्हा सुदं वितक्कं जम्हा पुव्वगदअत्थकुसलो य ।
ज्झायदि ज्झाणं एदं सवितक्कं तेण तं झाणं॥1888॥

अत्थाण वंजणाण य जोगाण य संकमो हु वीचारो ।
तस्स य भावेण तयं सुत्ते उत्तं सवीचारं॥1889॥

जेणेगमेव दव्वं जोगेणेगेण अण्णदरगेण ।
खीण कसाओ ज्झायदि तेणेगत्तं तयं भणियं॥1890॥

जम्हा सुदं वितक्कं जम्हा पुव्वगदअत्थकुसलो य ।
ज्झायदि ज्झाणं एवं सवितक्कं तेण तं ज्झाणं॥1891॥

अत्थाण वंजणाण य जोगाणं संकमो हु वीचारो ।
तस्स अभावेण तयं झाणं अविचार मिति वुत्तं॥1892॥

अवितक्कमवीचारं सुहुमकिरियबंधणं तदियसुक्कं ।
सुहुमम्मि कायजोगे भणिदं ते सव्वभावगदं॥1893॥

सुहुमम्मि कायजोगे वट्टंतो केवली तदियसुक्कम् ।
झायदि णिरुंभिदुंजे सुहुमत्तणकायजोगं पि॥1894॥

अवियक्कमवीचारं आणियट्टिमकिरियमं च सीलेसिं ।
ज्झाणं णिरुद्धयोगं अपच्छिमं उत्तमं सुक्कं॥1895॥

तं पुण णिरुद्धजोगो सरीरतियणासणं करेमाणो ।
सवण्हु अपडिवादी ज्झायदि ज्झाणं चरिमसुक्कं॥1896॥

इय सो खवओ ज्ञाणं एयग्गमणो समस्सिदो सम्मं ।
विवुलाए णिज्जराए वट्टदि गुणसेढिमारूढो॥1897॥

सुचिरमवि संकिलिट्ठं विहरंतं ज्ञाणसंवर विहूणं ।
ज्ञाणेण संवुडप्पा जिणदि अहोरेत्त मेत्तेण॥1898॥

एवं कसाय जुद्धंमि हवदि खवयस्स आउधं ज्ञाणं ।
ज्ञाणविहूणो खवओ जुद्धेव णिरावुधो होदि॥1899॥

युद्ध भूम में कवच समान कषायों सि रक्षा करता ।
ध्यान कवच त्यों करि क्षकि की, ध्यान खबना रण में याद्धि॥1900॥

ज्ञाणं करेइ खवयस्सो वट्ठं विहीण चेट्ठस्स ।
थेरस्स जहा जंतस्स कुणदि जट्ठी उवट्ठं॥1901॥

मल्लस्स णेहपाणं व कुणइं खवयस्स दढबलं ज्ञाणं ।
ज्ञाणविहीणो खवओ रंगे व अपोसिवो मल्लो॥1902॥

वइरं रदणेसु जहा गोसीरं चंदणं व गन्धेसु ।
वेरुलियं व मणीणं तह ज्ञाणं होइ खवयस्स॥1903॥

ज्ञाणं किलेससावदरक्खा रख्खाव सावदभयम्मि ।
ज्ञाणं किलेसवसणे मित्तं मित्तं व वसणम्मि॥1904॥

ज्ञाणं कसायवादे गम्भधरं मारुदेव गम्भधरं ।
ज्ञाणं कसायउण्हेह छाही छाहीव उण्हम्मि॥1905॥

झाणं कसाय डाहे, होदि वरदहो दहोव डाहम्मि ।

झाणं कसायसीदे अग्गी अग्गीब सीदम्मि॥1906॥

झाणं कसायपरचक्कभए बल वाहणद्धओ राया ।

परचक्कभए बल वाहणद्धओ होइ जह राया॥1907॥

झाणं कसायरोगेसु होदि वेज्जो तिगिंछिदे कुसलो ।

रोगेसु जहा वेज्जो पुरिसस्स तिगिंछिदे कुसलो॥1908॥

झाणं विसयछुहाए य होइ अण्णं जहा छुहाए वा ।

झाणं विसयतिसाए उदयं उदयं व तण्हाए ॥1909॥

इय झायंतो खवओ जइया परिहीणवायिओ होइ ।

आराधणाए तइया इमाणि लिंगणि दंसेई॥1910॥

हुं कारंजलिभमुहंगुलीहिं अच्छहिं वीरमुट्ठीहिं ।

सिरचालणेण य तहा सण्णं दावेदि सो खवओ॥1911॥

तो पडिचरया खवयस्स दिंति आराधणाए उवओगं ।

जाणंति सुदरहस्सा कदसण्णा कायखवएण॥1912॥

लेश्या

इय समभावमुवगदो तह ज्झायंतो पसत्तझाणं च ।

लेस्साहिं विसुज्झंतो गुणसेढिं सो समारुहदि॥1913॥

जह बाहिर लेस्साओ किण्हादीओ हवंति पुरिसस्स ।

अभंतर लेस्साओ तह किण्हादी य पुरिसस्स॥1914॥

किण्हा णीला काओ लेस्साओ तिण्णि अप्पसत्थाओ ।

पइसइ विरायकरणो संवेगमणुत्तरं पत्तो॥1915॥

तेओ पम्मा सुक्का लेस्साओ तिण्णि विदुपसत्थाओ ।

पडिवज्जेइय कमसो संवेगमणुत्तरं पत्तो॥1916॥

एदेसिं लेस्साणं विसोधणं पडि उवक्कमो इणमो ।

सव्वेसिं संगणं विवज्जणं सव्वहा होई॥1917॥

लेस्सासोधी अज्झवसाणविसोधीए होइ जीवस्स ।

अज्झवसाणविसोधी मंदकसायस्स णादव्वा॥1918॥

मंदा हुंति कसाया बाहिरसंगविजडस्स सव्वस्स ।

गिण्हइ कसाय बहुलो चेव हु सव्वंपि गंथकलिं॥1919॥

जह इंधणेहिं अग्गी वट्ठइ विज्झाइ इंधणेहिं विणा ।

गंथेहिं तह कसाओ वट्ठइ विज्झाइं तेहिं विणा॥1920॥

जह पत्थरो पडंतो खोभेइ दहे पसण्णमवि पंकं ।

खोभेइ पसंतंपि कसायं जीवस्स तह गंथो॥1921॥

अभंतरसोधीए गंथे णियमेण बाहिरे चयदि ।

अभंतरमइलो चेव बाहिरे गेण्हदि हु गंथे॥1922॥

अभंतर सोधीए बाहिरसोधी वि होदि णियमेण ।

अभंतरदोसेण हु कुणदि णरो बाहिरे दोसे॥1923॥

जह तण्डुलस्स कोण्डयसोधी सतुसस्स तीरदि ण कादुं ।
तह जीवस्स ण सक्का लिस्सासोधी ससंगस्स ॥ 1924 ॥

सुक्काए लेस्साए उक्कस्सं अंसयं परिणमिता ।
जो मरदि सो हु णियमा उक्कस्साराधओ होइ ॥ 1925 ॥

खाइयदंसणचरणं खओवसमियं च णाणमिदि मग्गो ।
तं होइ खीणमोहो आराहिता य जो हु अरहंतो ॥ 1926 ॥

जे सेसा सुक्काए दु अंसया जे य पम्मलेस्साए ।
तल्लेस्सापरिणामो दुमज्झमाराधणा मरणे ॥ 1927 ॥

तेजाए लेस्साए ये अंसा तेसु जो परिणमिता ।
कालं करेइ तस्स हु जहणियाराधण भणिदा ॥ 1928 ॥

जो जाए परिणिमिता लेस्साए संजुदो कुणइ कालं ।
तल्लेसो उववज्जइ तल्लेस्से चेव सो सग्गे ॥ 1929 ॥

अध तेउपउमसुक्कं अदिच्छिदो णाणदंसणसमग्गो ।
आउक्खया दु सुद्धो गच्छदि सुद्धिं चुयकि लेसो ॥ 1930 ॥

आराधना के फल

एवं सुभाविदप्पा ज्झाणोवगओ पसत्थलेस्साओ ।
आराधणापडायं हरइ अविग्घेण सो खवओ ॥ 1931 ॥

तेलोककसव्वसारं चउगइसंसार दुक्खणासयरं ।
आराहणं पवण्णो सो भयवं मुखपडिमुल्लं ॥ 1932 ॥

एवं जधक्खादविधिं संपत्ता सुद्धदंसणचरित्ता ।

केई खवंति खवया मोहावरणतरायाणि॥1933॥

केवलकप्पं लोगं संपुण्णं दव्वपज्जयविधिहिं ।

ज्झायंता एयमणा जहंति आराहया देहं॥1934॥

सव्वुक्कस्सं जोगं जुंजंता दंसणो चरित्ते य ।

कम्मरयविप्पमुक्का हवंति आराधया सिद्धा॥1935॥

इयमुक्कस्सियमाराधणमणुपालेत्तु केवली भविया ।

लोगगसिहरवासी हवंति सिद्धा धुयकिलेसा॥1936॥

अह सावसेसकम्मा मलियकसाया पणट्टमिच्छत्ता ।

हासरइ जरइभयसोगदुगुंछावेयणिम्महणा॥1937॥

पंचसमिदा तिगुत्ता सुसंवुडा सव्वसंगउम्मुक्का ।

धीरा अदीणमणसा समसुहदुक्खा असंमूढा॥1938॥

सव्वसमाधाणेण य चरित्तजोगे अधिट्ठिदा सम्मं ।

धम्मे वा उवजुत्ता ज्झाणे तह पढमसुक्के वा॥1939॥

तिहु

अणुत्तरवासी देवा सुविसुद्धलेस्सा य॥1940॥

दंसणणाणचरित्ते उक्किट्ठा उत्तमोपधाणा य ।

इरियावहपडिवण्णा हवंति लवसत्तमा देवा॥1941॥

कप्पोवगा सुराजं अच्छरसहिया सुहं अणुहवन्ति ।
ततो अणंतगुणिदं सुहं दु लवसत्तमसुराणं॥1942॥

णाणम्मि दंसणम्मि य आउत्ता संजमे जहक्खादे ।
वट्ठिटलवोवधाणा अवहियलेस्सा सददमेव॥1943॥

पजहिय सम्मं देहं सददं सव्वगुणावट्ठिदगुणट्ठा ।
देविंदचरमठाणं लहन्ति आराधया खवया॥1944॥

सुयभत्तीए विसुद्धा उग्गतवोणियमजोगसंसुद्धा ।
लोगंतिया सुस्वरा हवन्ति आराधया धीरा॥1945॥

जावदिया रिद्धीओ हवन्ति इंदियगदाणि य सुहाणि ।
ताइं लहन्ति ते आगमेसि भद्दा सया खवया॥1946॥

जे वि हु जहण्णियं तेउलेस्समराहणं उवणमन्ति ।
ते वि हु सोधम्माइसु हवन्ति देवा ण हेट्ठिल्ला॥1947॥

किं जंपिएण बहुणा जो सारो केवलस्स लोगस्स ।
तं अचिरेण लहन्ते फासित्तराहणं णिखिलं॥1948॥

भोगे अणुत्तरे भुंजिऊण ततो चुदा सुमाणुस्से ।
इट्ठिमतुलं चइत्ता चरन्ति जिणदेसिय धम्मं॥1949॥

सदिमंतो धिदिमंतो सट्ठासंवेगवीरियोवगया ।
जेदा परीसहाणं ऊवसग्गाणं च अभिभविय॥1950॥

इय चरणमधक्खादं पडिवण्णा सुद्धदंसमुवेदा ।
सोधंति ज्झाणजुत्ता लेस्साओ संकिलिठ्ठाओ॥1951॥

सुक्कं लेस्समुवगदा सुक्कज्झाणेण खविदसंसार ।
सम्मक्ककम्मकवया सवित्ति सिद्धिं धुदकिलेसा॥1952॥

एवं संथार गदो विसोधइत्ता वि दंसणचरितं ।
परिवडदि पुणो कोई झायंतो अट्टरुद्दाणि॥1953॥

ज्झायंतो अणगारो अट्टं रुद्धं च चरिमकालम्मि ।
जो जहइ सयं देहं सो ण लहइ सुग्गदिं खवओ॥1954॥

जदि दा सुभाविदप्पा वि चरिम कालम्मि संकिलेसेण ।
परिवडदि वेदणट्ठो खवओ संवार मारूढो॥1955॥

किं पुण जे ओसण्णा णिच्चं जे वा वि णिच्चपासत्था ।
जे वा सदा कुसीला संसत्ता वा जहाछंदा॥1956॥

गच्छंहि केइ पुरिसा पक्खी इव पंजरंतरणिरुद्धा ।
सरण पंजरचकिदा ओसण्णागा पविहरंति॥1957॥

अविसुद्धभावदोसा कसायवसगा य मंदसंवेगा ।
अच्चासादणसीसा मायाबहुला णिदाणकदा॥1958॥

सुहसादा किंमज्झा गुणसायी पावसुत्तपडिसेवी ।
विसयासापडिबद्धा गारवगरुया पमाइल्ला॥1959॥

समिदीसु य गुत्तीसु य अभाविदा सीलसंजम गुणेसु ।
परतत्तीसु पसत्ता अणाहिदा भावसुद्धीए॥1960॥

गंथाणियत्ततण्हा बहुमोहा सवलेसवणासेवी ।
सद्धरसरूवगंधे फासेसु य मुच्छिदा घडिदा॥1961॥

परलोगणिप्पिवासा इहलोगे चेव जे सुपडिबद्धा ।
सज्झायादीसु य जे अणुट्ठिदा संकिलिठ्ठमदी॥1962॥

सव्वेसु य मूलुत्तरगुणेसु तह ते सदा अइचरंता ।
ण लहंति खवोबसमं चरित्तमोहस्स कम्मस्स॥1963॥

एवं मूढमदीया अवंतदोसा करेंति जे कालं ।
ते देव दुभगत्तं मायामोसेण पावंति॥1964॥

किंमज्झ णिरुच्छाहा हवंति जे सव्वसंघकज्जेसु ।
ते देवसमिदिवज्झा कप्पंते हुंति सुरमेच्छा॥1965॥

कंदप्पभावणाए देवा कंदप्पिया मदा होति ।
खिभिसयभावणाए कालगदा होति खिभिसया॥1966॥

अभिजोगभावणाए कालगदा आभिजोगिया हुंति ।
तह आसुरीए जुत्ता हवंति देवा असुरकाया॥1967॥

सम्मोहणाए कालं करित्तु दो दुव्दुगा सुरा हुंति ।
अण्णं पि देव दुग्गइ उवयंति विराधया मरणे॥1968॥

इय जे विराधयित्ता मरणे असमाधिणा मरेज्जण्ह ।
तं तेसि बाल मरणं होइ फलं तस्स पुव्वुत्तं॥1969॥

जे सम्मत्तं खवया विराधयित्ता पुणो मरेज्जण्ह ।
ते भवणवासि जोदिसभोमेज्जा वा सुरा होंति॥1970॥

दंसण णाणविहूणा तदो चुदा दुक्खवेदणुम्मीए ।
संसारमण्डलगदा भमंति भवसागरे मूढा॥1971॥

जो मिच्छत्तं गंतूण किण्हलेस्सादिपरिणदो मरदि ।
तल्लेस्सो सो जायइ जल्लेस्सो कुणदि सो कालं॥1972॥

विजहना

एवं कालगदस्स दु सरीरमंतोबहिज्ज बाहिं वा ।
विज्जावच्चकरा तं सयं विकिंचंति जदणाए॥1973॥

समणाणं ठिदिकप्पो वासावासे तहेव उडुबंधे ।
पडिलिहिदव्वा णियमा णिसीहिया सव्वसाधूहिं॥1974॥

एगंता सालोगा णादिविकिठ्ठा ण चावि आसण्णा ।
वित्थिण्णा विद्धत्ता णिसीहिया दूरमागाढा॥1975॥

अभिसुआ असुसिरा अघसाउज्जोवा बहुसमा य असिणिद्धा ।
णिज्जंतुगा अहरिदा अविला य तहा अणाबाधा॥1976॥

जा अवरदक्खिणाए व दक्खिणाए व अध व अवराए ।
वसधीदो वण्णिज्जदि णिसीधिवा सा पसत्थत्ति॥1977॥

सव्वसमाधी पढमाए दक्खिणाए दुभत्तगं सुलभं ।
अवराए सुहविहारो होदि य उवधिस्स लाभो य॥1978॥

जदि तेसिं बाघादो दट्ठ्वा पुव्वदक्खिणा होइ ।
अवरुत्तरा य पुव्वा उदीचिपुव्वत्तरा कमसो॥1979॥

एदासु फलं कमसो जाणेज्ज तुमंतुमा य कलहो य ।
भेदो य गिलाणं वि य चरिमा पुण कट्ठदे अण्णं॥1980॥

जं वेलं कालगदो भिक्खू तं वेलमेव णीहरणं ।
जग्गण बंधणछेदणविधी अवेलाए कादव्वा॥1981॥

वाले बुद्धे सीसे तवस्सिभीरुगिलाणए दुहिदे ।
आयरिए य विक्किंचिय धीरा जग्गंति जिदणिद्वा॥1982॥

गीदत्था कदकज्जा महाबलपरक्कमा महासत्ता ।
बंधंति य छिंदंति य करचणंगुठ्ठयपदेसे॥1983॥

जदि वा एस ण कीरेज्ज विधि तो तत्थ देवदा कोई ।
आदाय तं कलेवर मुठ्ठिज्ज रमिज्ज बाधेज्ज॥1984॥

उयसयपडियावण्णं उवसंगहिदं तु तत्थ उवकरणं ।1
सागारियं च दुविहं पडिहारिय मपडिहारिं वा॥1985॥

जदि विक्खादा भत्तपइण्णा अज्जाव होज्ज कालगदो ।2
देहलसागारित्ति व सितवियाकरणंपि तो होज्ज॥1986॥

तेण परं संठाविय संथारगदं च तत्थ बंधित्ता ।
उठ्ठेंतरक्खणट्ठं गामं तत्तो सिरं किच्चा॥1987॥

पुव्वाभोगिय मग्गेण आसु गच्छंतं तं समादाय ।
अट्ठिदमणियत्तंता य पिट्ठदो दे अणिभंता॥1988॥

कुसमुट्ठिं घेतूण य पुरदो एगेण होइ गंतव्वं ।
अट्ठिदअणियत्तंतेण पिट्ठदो लोयणं मुच्चा॥1989॥

तेणकुसमट्ठिधाराए अव्वोच्छिण्णाए समणिपादाए ।
संथारो कादव्वो सव्वत्थ समो सर्गिं तत्थं॥1990॥

जत्थ ण होज्ज तणाइं चुण्णेहिं वि तत्थ केसरेहिं वा ।
संघरिदव्वा लेहा सव्वत्थ समा अवोच्छिण्णा॥1991॥

जदि विसमो संथारो उवरिं मज्झे व होज्ज हेट्ठा वा ।
मरणं व गिलाणं वा गणिवसभजदीण णायव्वं॥1992॥

जत्तो दिसाए गामो तत्तो सीसं करत्ति सोवधियं ।
उठ्ठेंतरक्खणट्ठं वोसरि दव्वं सरीरं तं॥1993॥

जो वि विरधिय दंसणमंते कालं करित्तु होज्ज सुरो ।
सो वि विवुज्झदि दट्ठूण सदेहं सोवधिं सज्जो॥1994॥

णत्ता भाए रिक्खे जदि कालगदो सिवं तु सव्वेसिं ।
एको दु समे खेत्ते दिवट्ठुखेत्ते मरंति दुवे॥1995॥

सदभिसमरणा अद्दा सादा असलेस्स जिट्ठ अदखरा ।
रोहिणिविसाहपुणव्वसुत्तिउत्तरा मज्झिमासेसा॥1996॥

गणरक्खत्थं तह्मा तणमयपडिविंबयं खु कादूण ।2
एक्कं तु समे खेत्ते दिवद्धुखेत्ते दुवे देज्ज॥1997॥

तट्ठाणसावणं चिय तिक्खुत्तो ठविय मडयपासम्मि ।3
विदिय वियप्पिय भिक्खू कुज्जा तह विदितदियाणं॥1998॥

असदि तणे चुण्णेहिं च केसरच्छारिट्ठियादिचुण्णेहिं ।
कादव्वोथ ककारो उवरिं हिट्ठा तकारो से॥1999॥

इस अवसर रि श्रावक घर सि जिा दिर्थ भी आए हों ।
भली-भाँेत उनकिा समझाकर उन सबकिा लौटा दविं॥2000॥

हमें प्राप्त हिा आराधन इस हतिु काय-उत्सर्ग करें ।
इच्छाकार एधष्ठाता सि करकि संघ वहाँ बैठि॥2001॥

सगणत्थे कालगदे खमणमसज्झाइयं च तद्विवसं ।
सज्झाइ परगणत्थे भयणिज्जं खमणकरणेपि॥2002॥

एदं पडिट्ठवित्ता पुणो वि तदियदिवसे उवेक्खंति ।
संघस्स सुहविहारं तरस गदी चेव णादंुजे॥2003॥

जदिदिवसे संचिट्ठदि तमणालद्धं च अक्खंद मडयं ।
तदिवरिसाणि सुभिक्खं खेमसियं तम्हि रज्जम्मि॥2004॥

जं वा दिसमुवणीदं सरीरयं खगचदुप्पदगणेहिं ।
खेमं सिवं सुभिक्षं विहरिज्जो तं दिसं संघो॥2005॥

जदि तस्स उत्तमंगं दिस्सदि दंता च उवरिगिरिसिहरे ।
कम्ममलबिप्पमुक्को सिद्धिं पत्तोत्ति णादव्वो॥2006॥

वेमाणिओ थलगदो समम्मि जो दिसि य वाणबितरओ ।
गड्डाए भवणवासी एस गदी से समासणे॥2007॥

ते सूरा भयवंता आहच्चइदूण संघमज्झम्मि ।
आराधणापडायं चउप्पयारा हिदा जेहिं॥2008॥

ते धण्णा ते णाणी लद्धो लाभो य तेहिं सव्वेहिं ।
आराधणा भयवदी सयला आराधिदा जेहिं॥2009॥

किं णाम तेहिं लोगे महाणुभावेहिं हुज्ज ण य पत्तं ।
आराधणा भगवदी सयला आराधिदा जेहिं॥2010॥

ते वि य महाणुभावा धण्णा जेहिं च तस्स खवयस्स ।
सव्वादरसत्तीए उवविहिदाराधणा सयला॥2011॥

जो उवविधेदि सव्वादरेण आराधणं कु अण्णस्स ।
संपज्जदि णिव्विग्घा सयला आराधणा तस्स॥2012॥

ते वि कदत्था धण्णा य हुन्ति जे पावकम्ममलहरणे ।
ण्हायंति खवयतित्थे सव्वादर भत्ति संजुत्ता॥2013॥

गिरिणदियादिपदेसा तित्थाणि तवोधणेहिं जदि उसिदा ।
तित्थं कथं ण हुज्जो तवगुणरासी सयं खवउ॥2014॥

पुव्वरिसीणं पडिमाओ वन्दमाणस्स होइ जदि पुण्णं ।
खवयस्स वंदओ किह पुण्णं विउलं ण पाविज्ज॥2015॥

जो ओलग्गदि आराधयं सदा तिव्वभत्तिसंजुत्तो ।
संपज्जदि णिव्विग्घा तस्स वि आराहणा सयला॥2016॥

सविचारभक्तवोसरणमेवमुववण्णिदं सवित्थारं ।
अविचारभक्तपच्चक्खाणं एत्तो परं वुच्छं॥2017॥

तत्थ अविचार भत्तपइण्णा मरणम्मि होइ आगाढो ।
अपरक्कम्मस्स मुणिणो कालम्मि असंपुहुत्तम्मि॥2018॥

तत्थ पढमं णिरुद्धं णिरुद्धतरयं तहा हवे विदियं ।
तदियं परमणिरुद्धं एदं तिविधं अवीचारं॥2019॥

तस्स णिरुद्धं भणिदं रोगादंकेहिं जो समभिभूदो ।
जंघाबलपरिहीणो परगणगमणम्मि ण समत्थो॥2020॥

जावय बलविरियं से सो विहरदि ताव णिप्पडीयारो ।
पच्छा विहरदि पडिजग्गिज्जंतो तेण सगणेण॥2021॥

इय सण्णिरुद्धमरणं भणियं अणिहारिमं अवीचारं ।
सो चेब जधाजोगं पुव्वुत्तविधी हवदि तस्स॥2022॥

दुविधं तं पि अणीहारिमं पगासं च अप्पगासं च ।
जणणादं च पगासं इदरं च जणेण अण्णादं॥ 2023 ॥

खवयस्स चित्तसारं खित्तं कालं पडुच्च सजणं वा ।
अण्णम्मि य तारिसयम्मि कारणे अप्पगासं तु॥ 2024 ॥

बालग्गिवग्घमहिसगयरिंछ पडिणीय तेण मेच्छेहिं ।
मुच्छाविसूचियादीहिं होज्ज सज्जो हु वावत्ती॥ 2025 ॥

जाव ण वाया खिप्पदि बलं च विरियं च जाव कायम्मि ।
तिव्वाए वेदणाए जाव य चित्तं ण विक्खर्त्त॥ 2026 ॥

णच्चा संवट्टिज्जं तमाउगं सिग्घमेव तो भिक्खू ।
गणियादीणं सण्णिहिदाणं आलोचए सम्मं॥ 2027 ॥

एवं णिरुद्धदरयं विदियं अणिहरिमं अवीचारं ।
सो चेव जधाजोग्गो पुव्वुत्तविधि हवदि तस्स॥ 2028 ॥

बालादिएहिं जइया अक्खित्ता होज्ज भिक्खुणो वाया ।
तइया परमणिरुद्धं भणिदं मरणं अवीचारं॥ 2029 ॥

णच्चा संवट्टिज्जं तमाउगं सिग्घमेव तो भिक्खू ।
अरहंतसिद्धसाहूण अंतिगे सिग्घमालोचे॥ 2030 ॥

आराधनणाविधी जो पुव्वं उववण्णिदो सवित्थारो ।
सो चेव जुज्जमाणो एत्थ विही होदि णादव्वो॥ 2031 ॥

एवं आसुक्कारमरणे वि सिज्झंति केइ धुदकम्मा ।

आराधयित्तु केई देवा वेमाणिया होंति॥2032॥

आराधणाए तत्थ दु कालस्स बहुत्तणं ण हु पमाणं ।

बहवो मुहुत्तमत्ता संसारमहण्णवं तिण्णा॥2033॥

खणमेत्तेण अणादियमिच्छादिट्ठी वि वद्धणो राया ।

उसहस्स पादमूले संबुज्झिता गदो सिद्धिं॥2034॥

सोलसतित्थयराणं तित्थुप्पण्णस्स पढमदिवसम्मि ।

सामण्णणाणसिद्धि भिण्णमुहुत्तेण संपण्णा॥2035॥

एसा भत्तपइण्णा वाससमासेण वण्णिदा विधिणा ।

इत्तो इंगिणिमरणं वाससमासेण वण्णेसिं॥2036॥

जो भत्तपदिण्णाए उवक्कमो वण्णिदो सवित्थारो ।

सो चेव जधाजोग्गो उवक्कमो इंगिणीए वि॥2037॥

पव्वज्जाए सुद्धो उवसंपज्जित्तु लिंगकप्पं च ।

पवयणमोगहित्ता विणयसमाधीए विहरित्ता॥2038॥

णिप्पादित्ता सगणं इंगिणिविधिसाधणाए परिणमिया ।

सिदिमारुहित्तु भाविय अप्पाणं सल्लिहित्ताणं॥2039॥

परियाइगमालोचिय अणुजाणित्ता दिसं महजणस्स ।

तिबिधेण खमवित्ता सवालवुद्धाउलं गच्छं॥2040॥

अणुसट्ठिं दादूण य जावज्जीवाय विप्पओगच्छी ।
अम्भदिगजादहासो णीदि गणादो गुणसमग्गो॥2041॥

एवं च णिक्कमिक्का अंतो वाहिं च थंडिले जोगे ।
पुढवीसिलामए वा अप्पाणं णिज्जवे एक्को॥2042॥

पव्वुत्ताणि तणाणि य जाचित्ता थंडिसम्मि पुव्वुत्ते ।
जदणाए संथरित्ता उत्तरसिरमधव पुव्वसिरं॥2043॥

पाचीणाभिमुहो वा उदीचिहुत्तो व तत्थ सो ठिच्चा ।
सीसे कदंजलिपुडो भावेण विसुद्धलेस्सेण॥2044॥

अरहादिअंतिगं तो किच्चा आलोचणं सुपरिसुद्धं ।
दंसणणाणचरित्तं परिसारेदूण णिस्सेसं॥2045॥

सव्वं आहारविधिं जावज्जीवाय वोसरित्ताणं ।
वोसरिदूण असेसं अम्भंतरबाहिरे गंथे॥2046॥

सव्वे विणिज्जिणंतो परीषहे विदिबलेण संजुत्तो ।
लेस्साए विसुज्झंतो धम्मं ज्झाणं उवणमित्ता॥2047॥

ठिच्चा णिसिदित्ता वा तुवट्ठिदूणव सकाय पडिचरणं ।
सयमेव णिरुवसग्गे कुणदि विहारम्मि सो भयवं॥2048॥

सयमेव अप्पणो सो करेदि आउंटणादि किरियाओ ।
उच्चारदीणि तथा सयमेव विक्किंचिदे विधिणा॥2049॥

जाधे पुण उवसग्गे देवा माणुस्सिया व तेरिच्छ ।
ताधे णिप्पडियम्मो ते अधियासेदि विगदभओ॥2050॥

आदितियसुसंघडणो सुभसंठाणे अभिज्जधिदिकवचो ।
जिदकरणो जिदणिदो ओघबलो ओघसूरो य॥2051॥

बीभत्थभीमदरिसणविगुव्विदा भूदरक्खसपिसाया ।
खोभिज्जो जदि वि तयं तधवि ण सो संभमं कुणइ॥2052॥

इढिढमदुलु वि उव्विय किण्णकिंपुरिसदेवकण्णाओ ।
लोलंति जदिवियतगं तधवि ण सो विम्भयं जाई॥2053॥

सव्वो पोग्गलकाओ दुक्खत्ताए जदि तमुवणमेज्ज ।
तध विहु तस्स ण जायदि ज्झाणस्स विसोत्तिया को वि॥2054॥

सव्वो पोग्गलकाओ सोक्खत्ताए जदि वि तमुवणमेज्ज ।
तध वि हु तस्स ण जायदि ज्झाणस्स विसोत्तिया को वि॥2055॥

सच्चित्ते साहरिदो तत्थोवेक्खादि बियत्तसव्वंगो ।
उवसग्गे य पसंते जदणाए थण्डिलमुवेदि॥2056॥

एवं उव सग्गविधिं परीसहविधिं च सोधिया संतो ।
मणवयणकायगुत्तो सुणिच्छिदो णिज्जिदकसाओ॥2057॥

इहलोए परलोए जीविदमरणे सुहे य दुक्खे य ।
णिप्पडिबद्धो विहरदि जिददुक्खपरिस्समो धिदिभं॥2058॥

वायणपरियट्टणपुच्छणाओ मोत्तूण तथय धम्मथुदिं ।
सुत्तच्छपोरिसीसु वि सरेदि सुत्तत्थमेयमणो॥2059॥

एवं अट्टवि जामे अनुवट्टो तच्च ज्झादि एय मणो ।
जदि अधिच्चा णिद्वा हविज्ज सो तत्थ अपदिण्णो॥2060॥

सज्झायकालपडिलेहणादिकाओ ण संति किरियाओ ।
जम्हा सुसाणमज्झे तस्स य झाणं अपडिसिद्धं॥2061॥

आवासगं च कुणदे उवधोकालम्मि जं जहिं कमदि ।
उवकरणपि पडिलिहइ उवधोकालम्मि जदणाए॥2062॥

सहसा चुक्करकलिदे णिसीधियादीसु मिच्छकारे सो ।
आसिअणिसीधियाओ णिग्गमणपवेसणं कुणइ॥2063॥

पादे कंटयमादिं अच्छिम्मि रजादियं जदावेज्ज ।
गच्छदि अधाविधिं सो परणीहरणे य तुसिणीओ॥2064॥

वेउव्वणमाहारयचारणखीरासवादि लद्धीसु ।
तवसा उप्पण्णासु वि विरागभावेण सेवदि सो॥2065॥

मोणाभिग्गहणिरदो रोगादंकादि वेदणाहेदुं ।
ण कुणदि पडिकारं सो तहेव तण्हाछुहादीणं॥2066॥

उवएसो पुण आइरियाणं इंगिणिगदो वि छिण्णकधो ।
देवेहिं माणुसेहिं व पुट्ठो धम्मं कधेदित्ति॥2067॥

एवमधक्खादविधिं साधित्ता इंगिणी धुदकिलेसा ।
सिज्झंति केई केई हवंति देवा विमाणेसु॥ 2068॥

एवं इंगिणिमरणं वाससमासेण वण्णिदं विधिणा ।
पाओगमणणिमित्तो समासदो चेव वण्णेसिं॥ 2069॥

पाओवगमणमरणस्स होदि सो चेव वुवक्कमो सव्वो ।
वुत्तो इंगिणिमरणस्सुक्कमो जो सवित्थारो॥ 2070॥

णवरिं तणसंथारो पाओवगदस्स होदि पडिसिद्धो ।
आदपरपओगेण य पडिसिद्धिं सव्वपरियम्मं॥ 2071॥

सो सल्लहिददेहो जम्हा पाओवगमणमुवजादि ।
उच्चारदिविकिंचणमवि णत्थि पवोगदो तम्हा॥ 2072॥

पुढवी आऊतेऊवणप्फदितसेसु जदि वि साहरिदो ।
वोसट्टचत्तदेशे अधाउगं पालए तत्थ॥ 2073॥

मज्जणयगंधपुप्फीवयारपडिचारणे पि कीरंते ।
वोसट्टचत्तदेहो अधाउगं पालए तधवि॥ 2074॥

वोसट्टचत्तदेहो दु णिक्खिवेज्जो जहिं जधा अंगं ।
जावज्जीवं तु सयं तहिं तमंगं ण चालेज्ज॥ 2075॥

एवं णिप्पडियम्मं भणंति पाओवगमणमणमरहंता ।
णिमया अणिहारं तं सिया य णीहारमुवसग्गे॥ 2076॥

उवसग्गेण य साहरिदो सो अण्णत्थ कुणदि जं कालं ।

तम्हा वुत्तं णीहारमदो अण्णं अणीहारं॥2077॥

पडिमापडिवण्णा वि हु करंति पाओवगमणमप्पेगे ।

दीहद्धं विहरंता इंगिणिमरणं च अप्पेगे॥2078॥

जिा उसिर्ग रिषह अरु देर्भक्ष सहन कर सकति हैं ।

मरण-खेमेत्त जरा भी आए उसि खुशी सि वरति हैं॥2079॥

कोसलय धम्मसीहो अट्ठं साधेदि गिद्धपुठ्ठेण ।

णयरम्मिय कोल्लगिरे चंदसिरिं विप्पजहिदूण॥2080॥

पाडलिपुत्ते धूदाहेदंु मामयकदम्मि उवसग्गे ।

साधेदि उसभसेणो अट्ठं विक्खाणसं किच्चा॥2081॥

अहिमारण णिवदिम्मि मारिदे गहिदसमणलिंगेण ।

उद्दाहपसमणत्थं सत्थग्गहणं अकासि गणी॥2082॥

सगडालएण वि तथा सत्तग्गहणेण साधिदोअत्थो ।

वररुइपओगहेदुं रुठ्ठे णंढे महापउमे॥2083॥

एवं पण्डियमरणं तवियप्पं वण्णिदं सवित्थारं ।

वुच्छामि बालपण्डियमरणं एत्तो समासेण॥2084॥

देसेक्क देसविरदो सम्मादिट्ठी मरिज्ज जो जीवो ।

तं होदि बालपण्डिद मरणं जिणसासणे दिट्ठं॥2085॥

पंच य अणुव्वदाइं सत्तयसिक्खाउ देसजदि धम्मो ।
सव्वेण य देसेण य तेण जुदो होदि देसजदी॥2086॥

पाणवधमुसावादादत्तादाणपरदार गमणेहिं ।
अपरिमिदिच्छादो वि अ अणुव्वयाइं विरमणाइं॥2087॥

जं च दिसावेरमणं अणत्थदंडेहि जं च वेरमणं ।
देसावगासियं पि य गुणव्वयाइं भवे ताइं॥2088॥

भोगाणं परिसंखा सामाइयमतिहिसंविभागो य ।
पोसहविधी य सव्वो चदुरो सिक्खाउ वुत्ताओ॥2089॥

आसुक्कारे मरणे अव्वोच्छिण्णाए जीविदासाए ।
णादीहि वा अमुक्को पच्छिमसल्लहणमकासी॥2090॥

आलोचिदणिस्सल्लो सघरे चेवारुहिंतु संथारं ।
जदि मरदि देसविरदो तं वुत्तं बालपण्डिदयं॥2091॥

जो भत्तपदिण्णाए उवक्कमो वित्थरेण णिद्धिट्ठो ।
सो चेव बालपण्डिदमरणे णेओ जहाजोग्गो॥2092॥

वेमाणिएसु कप्पोवगेषु णियमेण तस्स उववादो ।
णियमा सिज्झदि उक्कस्सएण वा सत्तमम्मि भवे ॥2093॥

इय बालपंडियं होदि मरण मरहंतसासणे दिट्ठं ।
एत्तो पण्डिदपण्डिदमरणं वोच्छं समासेण॥2094॥

साहू जधुत्तचारी वट्टअंतो अप्पमत्तकालम्मि ।
ज्झाण उवेदि धम्मं पविठ्ठुकामो खवगसेढिं॥2095॥

सुचिए समे विचित्ते देसे णिज्जंतुए अणुण्णाए ।
उज्जुअआयददेहो अचलं बंधेतु पलि अंकं॥2096॥

वीरासणमादीयं आसणसमपादमादियं ठाणं ।
सम्मं अधिट्ठिदो अथ वसेज्जमुत्ताणसयणादि॥2097॥

पुव्वभणिदेण विधिणा ज्झायदि ज्झाणं विसुद्धलेस्साओ ।
पवयणसंभिण्णमदी मोहस्स खयं करेमाणो॥2098॥

संजोयणाकसाए खवेदि झाणेण तेण सो पढमं ।
मिच्छत्तं सम्मिस्सं कमेण सम्मत्तमवि य तदो॥2099॥

अथ खवयसेढिमधिगम्म कुणइ साधू अपुव्वकरणं सो ।
होइ तमपुव्वकरणं कयाइ अप्पत्तपुव्वंति॥2100॥

अणिवित्तिकरणणमे णवमं गुणठाणयं च अधिगम्म ।
णिद्दाणिद्दा पयलापयला तथ थीणगिद्धिं च॥2101॥

णिरयगदियाणुपुव्विं णिरयगदिं थावरं च सुहुम च ।
साधारणादवुज्जोवतिरयगदिं आणुपुव्वीए॥2102॥

इगविगतिगचदुरिंदियणामाइं तथ तिरिक्खगदिणामं ।
खवयित्ता मज्झिल्ले खवेदि सो अठ्ठुवि कसाए॥2103॥

तत्तो णपुंसगित्थीवेदं हासादिछक्कपुवेदं ।
कोधं माणं मायं लोभं च खवेदि सो कमसो॥2104॥

अध लोभसुहुमकिट्ठिं वेदंतो सुहुमसंपरायत्तं ।
पावदि पावदि य तथा तण्णामं संजमं सुद्धं॥2105॥

तो सो खीणकसाओ जायदि खीणासु लोभकिट्ठीसु ।
एयत्त वितक्कावीचारं तो ज्झादि सो ज्झाणं॥2106॥

झाणेण य तेण अधक्खादेण य संजमेण घादेदि ।
सेसाणि घादिकम्माणि समयमवरंजणाणि मदो॥2107॥

मत्थय सूचीए जधा हदाए कसिणो हदो भवदि तालो ।
कम्माणि तथा गच्छंति खयं मोहे हदे कसिणे॥2108॥

णिद्वापचलाग दुवे दुचरिमसमयम्मि तस्स खीयंति ।
सेसाणि घादिकम्माणि चरिमसमयम्मि खीयंति॥2109॥

तत्तो णंतरसमए उप्पज्जदि सव्वपज्जयणिबंधं ।
केवलणाणं सुद्धं तध केवल दंसणं चेव॥2110॥

अव्याघादमसंदिद्धमुत्तमं सव्वदो असंकुडिदं ।
एयं सयलगणंतं अणियत्तं केवलं णाणं॥2111॥

चित्तपडं व विचित्तं तिकालसहिदं तदो जगमिणं सो ।
सव्वं जुगदं पस्सदि सव्वमलोगं च सव्वत्तो॥2112॥

वीरियसमणंतरायं होइ अणंतं तथेव तस्स तदा ।
कप्पातीदस्स महामुणस्स विग्घम्मि खीणम्मि॥2113॥

तो सो वेदयमाणो विहरइ सेसाणि ताव कम्माणि ।
जावसमत्ती वेदिज्जमाणयस्साउगस्स भवे॥2114॥

दंसणणाणसमग्गो विरहदि उच्चावयं तु परिजायं ।
जोगणिरोधं पारभदि कम्मणिल्लेवणट्ठाए॥2115॥

उक्कस्सएण छम्मासाउगसेसम्मि केवली जादा ।
वच्चंति समुग्घादं सेसा भज्जा समुग्घादे॥2116॥

जेसिं आउसमाइं णामगोदाइं वेदणीयं च ।
ते अकदसमुग्घादा जिणा उवणमंति सेलेसिं॥2117॥

जेसिं हवंति विसमाणि णामगोदाउवेदणीयाणि ।
ते दु कदसमुग्घादा जिणा उवणमंति सेलेसिं॥2118॥

ठिदिसंतकम्मसमकरणत्थं सव्वेसि तेसि कम्माणं ।
अंतोमुहुत्त सेसे जंति समुग्घादमाउम्मि॥2119॥

ओल्लं संतं वत्थं विरल्लिदं जध लहु विणिव्वादि ।
संवेढियं तु ण तथा तथेव कम्मं पि णादव्वं॥2120॥

ठिदिबंधस्स सिणेहो हेदू खीयदि य सो समुहदस्स ।
सडदि य खीणसिणेहं सेसं अप्पट्ठिदी होदि॥2121॥

चदुहिं समएहिं दंड कवाड पदरजगपूरणाणि तदा ।
कमसो करेदि तह चेव णियत्ती चदुहिं समएहिं॥2122॥

काऊणाउसमाइं णामागोदाणि वेदणीयं च ।
सेलेसिमभ्रुवेंतो जोगणिरोधं तदो कुणदि॥2123॥

बादरवचिजोगं बादरेण कायेण बादरमणं च ।
बादरकायंपि तथा रंभदि सुहमेण काएण॥2124॥

तथ चेव सुहुममणवचिजोगं सुहमेण कायजोगेण ।
रंभित्तु जिणो चिट्ठदि सो सुहमे काइए जोगे॥2125॥

सुहमाए लेस्साए सुहुमकिरियबंधगो तणो ताधे ।
काइयजोगे सुहुमम्मि सुहुमकिरियं जिणा झादि॥2126॥

सुहुमकिरिएण झाणेण णिरुद्धे सुहुमकाययोगे वि ।
सेलेसी होदि तदो अबंधगो णिच्चलपदेसो॥2127॥

माणुसगदितज्जादि पज्जत्तादिंज्जसुभगजसकित्तिं ।
अण्णदरवेदणीयं तसबादरमुच्चगोदं च॥2128॥

मणुसाउगं च वेदेदि अजोगी होहिदूण तं कालं ।
तित्थयरणामसहिदाओ ताओ वेदेदि तित्थयरो॥2129॥

देहतियबंधपरिमोक्खत्थं केवली अजोगी सो ।
उवयादि समुच्छिणाकिरियं तु झाणं अपडिवादी॥2130॥

सो तेण पंचमत्ताकालेण खवेदि चरिमज्झाणेण ।
अणुदिण्णाओ दुचरिमसमये सव्वाओ पयडीओ॥2131॥

चरियसमसम्मि तो सो खवेदि वेदिज्जमाणपयडीओ ।
बारस तित्थवरजिणो एक्कारस सेससव्वण्हू॥2132॥

णामक्खएण तेजोसरीरबन्धो वि खीयदे तस्स ।
आउक्खएण ओरालियस्स बंधो वि खीयदि से॥2133॥

तं सो बंधणमुक्को उट्ठं जीवो पओगदो जादि ।
जह एरंडयबीयं बंधणमुक्कं समुप्पपदि॥2134॥

संगजहणेण बलहुदयाए उट्ठं पयादि सो जीवो ।
जध लाउगो अलेओ उप्पददि जले णिबुड्डो वि॥2135॥

झाणेण य तह अप्पा पउइदो जेण जादि सो उट्ठं ।
वेगेण पूरिदो जह ठाइदुकामो वि य ण ठादि॥2136॥

जह वा अग्गिस्स सिहा सद्दावदो चेव होहि उट्ठगदी ।
जीवस्स तह सभावो उट्ठगमणलप्पवसियस्स॥2137॥

तो सो अविग्गहाए गदीए समए अणन्तरे चेव ।
पावदि जयस्स सिहरं खित्तं कालेण य फुसंतो॥2138॥

एवं इहहं पयहिय देहतिगं सिद्धखेत्तमुवगम्म ।
सव्व परिययायमुक्को सिज्झादि जीवो सभावत्थो॥2139॥

ईसिप्पभाराए उवरिं अत्थदि सो जोयणम्मि सीदाए ।
ध्रुवमचलमजरठाणं लोगसिहरमस्सिदो सिद्धो॥2140॥

धम्माभावेण दु लोगगे पडिहम्मदे अलोगेण ।
गदिमुवकुणदि हु धम्मो जीवाणं पोग्गलाणं च॥2141॥

जं जस्स संठाणं चरिमसरीरस्स जोगजहणम्मि ।
तं संठाणं तस्स दु जीवघणं होइ सिद्धस्स॥2142॥

दसविधपाणाभावो कम्माभावेण होइ अच्चंतं ।
अच्चंतिगो य सुहदुक्खाभावो विगद देहस्स॥2143॥

जं णत्थि बंधहेदं दु देहगहणं ण तस्स तेण पुणो ।
कम्मकलुसो हु जीवो कम्मकदं देहमादियदि॥2144॥

कज्जाभावेण पुणो अच्चंतं णत्थि फंदणं तस्स ।
ण पओगदो वि फंदणमदेहिणो अत्थि सिद्धस्स॥2145॥

कालमणंतमधम्मो पग्गहिदो ठादि गयणमोगाढो ।
सो उवकारो इट्ठो अठिदि सभावेण जीवाणं॥2146॥

ते लोककमत्थयत्थो तो सो सिद्धो जगं णिरवसेसं ।
सव्वेहिं पज्जाएहिं य संपुण्णं सव्वदव्वेहिं॥2147॥

पस्सदि जाणदि य कहा तिण्ण वि काले सपज्जाए सव्वे ।
तह वा लोगमसेसं पस्सदि भयवं विगदमोहो॥2148॥

भावे सगविसयत्थे सुरो जुगवं जहा पयासेइ ।
सव्वं वि तथा जुगवं केवलणाणं पयासेदि॥2149॥

गदरागदोसमोहो विभवो णिरुस्सओ विरओ ।
बुधजणपरिगीदगुणो णमंसणिज्जो तिलोगस्स॥2150॥

णिव्वावइत्तु संसारमहग्गिं परमणिव्वुदिजलेण ।
णिव्वादि सभावत्थो गदजाइजरामरणरोगो॥2151॥

जावं तु किंचि लोए सारीरं माणसं च सुहदुक्खं ।
तं सव्वं णिज्जिण्णं असेसदो तस्स सिद्धस्स॥2152॥

जं णत्थि सव्वबाधाउ तस्स सव्वं च जाणइ जदो से ।
जं च गदज्झवसाणो परमसुही तेण सो सिद्धो॥2153॥

परमिद्धिं पत्ताणं मणुसाणं णत्थि तं सुहं लोए ।
अव्वाबाध मणोवमपरम सुहं तस्स सिद्धस्स॥2154॥

देविंदचक्कवट्ठी इंदियसोक्खं च जं अणुहवन्ति ।
सद्द रस रूवगंधप्परिसप्पयमुत्तमं लोए॥2155॥

अव्वाबाधं च सुहं सिद्ध जं अणुहवन्ति लोग्गे ।
तस्स हु अणंत भागो इंदियसोक्खं तयं होज्ज॥2156॥

जं सव्वे देवगणा अच्छर सहिया सुहं अणुहवन्ति ।
तत्तो वि अणंतगुणं अव्वावाहं सुहं तस्स॥2157॥

तीसु वि कालेसु सुहणि जाणि माणुसतिरिक्खदेवाणं ।
सव्वाणि ताणि ण समाणि तस्स खणमित्तसोक्खेण॥2158॥

ताणि हु रागविवागणि दुक्खपुव्वाणि चेव सोक्खाणि ।
ण हु अत्थि रागभवहत्थि दूण किं चि वि सुहं णाम॥2159॥

अणुवमममेयमक्खयममलमजरमरुजमभयमभवं च ।
एयंतियमच्चतियमव्वाबाधं सुहमजेयं॥2160॥

विसएहिं से ण कज्जं जं णत्थि छुदादियाउ बाधाओ ।
रागादिया य उवभोगहेदुगा णत्थि जं तस्स॥2161॥

एदेण चेव भणिदो भासण चंकमणचिंतणादीणं ।
चेव्वाणं सिद्धम्मि अभावो हदसव्वकरणम्मि॥2162॥

इय सो खाइयसम्मत्तसिद्धदाविरियदिट्ठिणाणेहिं ।
अच्चंतिगेहिं जुत्तो अव्वावाहेण य सुहेण॥2163॥

अकसायत्तमवेदत्तम कारकदाविदेहदाचेव ।
अचलत्तमलेवत्तं च हुंति अच्चंतियाइं से॥2164॥

जम्मणमरणजलोघं दुक्खपरकिलेससोगदी चीयं ।
इय संसार समुद्वं तरंति चदुरंगणावाए॥2165॥

एवं पण्डिदमरणेण करंति सव्वदुक्खाणं ।
अंतं णिरंतराया णिव्वाणमणुत्तरं पत्ता॥2166॥

एवं आराधित्ता उक्कस्साराहणं चदुक्खंधं ।
कम्मरयविप्पमुक्का तेणेव भवेण सिज्झंति॥2167॥

आराधयित्तु धीरा मज्झिममाराहणं चदुक्खंधं ।
कम्मरयविप्पमुक्का तच्चेण भवेण सिज्झंति॥2168॥

आराधयित्तु धीरा जहण्णमाराहणं चदुक्खंधं ।
कम्मरयविप्पमुक्का सत्तमजम्मेण सिज्झंति॥2169॥

एवं एसा आराधणा सभेदा समासदो वुत्ता ।
आराधण णिबद्धं सव्वंपि हु होदि सुदणाणं॥2170॥

आराधणं असेसं वण्णेदुं होज्ज को को पुण समत्थो ।
सुदकेवली वि आराधणं असेसं ण वण्णिज्ज॥2171॥

अज्जजिणणंदिगणी, सव्वगुत्तगणि अज्जमित्तणंदीणं ।
अवगमिय पादमूले सम्मं सुत्तं च अत्थं च॥2172॥

पुव्वाययरियणिबद्धा उवजीवित्ता इमा ससत्तीए ।
आराधणा सिवज्जेण पादिलभोइणा रइदा॥2173॥

छदुमत्थदाए एत्थ दु जं बद्धं होज्ज पवयणविरुद्धं ।
सोधेंतु सुगीदत्था तं पवयणवच्छलत्ताए॥2174॥

आराधणा भगवदी एवं भत्तीए वण्णि दा संती ।
संघस्स सिवज्जस्स य समाधिवरमुत्तमं देउ॥2175॥

असुरसुरमणुयकिण्णर रविससिकिंपुरिस महियवरचरणो ।

दिसउ मम बोहिलाहं जिणवरवीरो तिहुवणिंदो॥2176॥

खमदमणियमधराणं धुदरयसुहदुक्खविप्पजुत्ताणं ।

णाणुज्जोदियसल्लेहणम्मि सुणमो जिणवराणं॥2177॥

पाठ-स्रोत: मूल गाथाएँ जैन गाथा डेटाबेस (टंकण-श्रेय: Nikky Jain, nikkyjain.github.io) से — केवल प्राचीन मूल पाठ लिया गया है; अनुवाद/अन्वयार्थ सम्मिलित नहीं · मूल पाठ प्राचीन एवं public domain; टंकण-श्रेय यथोक्त · मूल e-text ↗
यह मूल पाठ है — अर्थ/टीका सम्मिलित नहीं। अशुद्धि दिखे तो GitHub पर [shastra/bhagavati-aaraadhanaa.md](https://github.com/shastra/bhagavati-aaraadhanaa.md) सुधारें।

श्रुतधारा · भगवती आराधना — मूल पाठ · स्रोत: मूल गाथाएँ जैन गाथा डेटाबेस (टंकण-श्रेय: Nikky Jain, nikkyjain.github.io) से — केवल प्राचीन मूल पाठ लिया गया है; अनुवाद/अन्वयार्थ सम्मिलित नहीं